

RUKA

Ñeti garosikao

Ruka ñeti epovoz ñeti kapot ev. Met Ruka aban pop pi Zuda bon Grik porihanañap ok, met pi Kristoz mañairooh-abanari 12 porihanañ nap bon. Met pi goerah Grik ñe pimovonañ skurutak lokohot het hodad ahov bahapuh, dokta abanap ravat lamari meñizooh. Met pi tin pimauz ñevonañ menoohap ok. Met Kristo hamarrah heh-porah Ruka pim herisin et narë, oñ pi Polinañ honeo gogot tooh, ma añarab mod Kriston eteoharihö ahoam piin mañoohan hatevetet pimaz hodadeo bah, ma nariz ñeti menooh-poñ amun rekö hat hodadeo bah. Tat ñeti epov menahan hez.

Met Zuda añarab bon, oñ Grik añarab pimeri Iesuz ñetiv tin hatevetet pi map tin tamah-pop paru amun meñizapan hat hamarrah erah, pot hodad tapanez homet Ruka ñeti poñ menah. Ma modariz namen ñeti nañ amun piuhö tep epatak menah.

Met Iesu hamarrah hehaekanañ maot hasahan krismasañ 30-z zut bon tah-porah Ruka ñeti epov red menah.

Aban Ruka Iesuz ñetiv menahat ev

Ruka ñeti epov menahavoz kapot ev

1 ¹⁻⁴ Aban ahop Tiopilas, ne nimaz homet ñeti epov ev menomaz toh. Met batam God hahan hehat Iesu añaraboz ñaravatak emat het tooh-ñetiv pinañ honeo het eteoh-pori haovai emoohan aban nari pim ñeti poñ main main menahan hezaek ne houloñ map rekö hahö. Povoz ne parum menahan hez-poñ bahoneo batat pim kapot tahaekanañ tooh-ñetiñ tep honetak menat nihaz meeman emapanen Iesuz ñeti hateteoñ-poñ ni rekö hat kapotaz tin hodad ravat barotap batat hekez hat ev menomaz toh.

Enzolip Sekaraian mañahat ev

⁵ Met batam aban ahö nap pim abatao Erod pi Zudia zeisik korav ahop ravat heh. Met pi pot ravat heh-porah aban mod nap Sekaraia amun poek heh, met pi Godiz homet anumaihol bareñ elat mañarohap ok, met aban pinañ honeo paru gog pot tooh-togü potaz abatao Abaisa pot mañooh. Met Sekaraiaz añapuz abatao Elisabet, met añ popuz aban kapotakari

amun anumaihol bareñ elat mañaroooh. ⁶Met Sekaraiar añapuz het tovai soohao Godiz hahan Moses menahan hehat tin baval hat tovai sooh, povoz pi parupimaz biñ ravat heh. ⁷Met parup hehapuh Elisabet ñaro navat hehan parup het añavai ravat heh.

⁸⁻⁹Tahapuh Sekaraiaz togut Abaisa mañooh-pot Godiz homet anumaihol bareñ elat mañarohopanez aliz poñiz nasik Sekaraiar pim modari emat Godiz tup ahomakeh gogot tohot hehapuh parum toohat gog nao tahan Sekaraiaz abatao ou ravahan pi iñidoh romevok hehaek bot muz ulagï tinavonañao bat zeï pomakez kohat giruvok lokat mañarapanen God ulagï tin povon hatevetepanez hat pi bat kohat lokah. ¹⁰Met bot pov mañarahan ñadoohan Zuda añarab mañ mañohopanez emat topourat-hehari iñidoh mañeo hahot heh. ¹¹Tahan kohat poek Godiz enzolip erat bot ulagiv mañarat bizahan ñadooh-arü posiz teritak rouvat hehan, ¹²Sekaraia etet rak tat ñaihet tah. ¹³Tahan enzolip Sekaraian epat mañah, “Ni tovai ñaihet totun. Met God nim mañeo haoñit hat haveteh, povoz nim añap Elisabet tokat ñekevonañ ravat ro nap batapan. Tapanen pim abatao Zoan pot mañekë. ¹⁴Met ro pop batapanen hepanen pimaz ni biñ ahov ravat heken añarab modari amun piin etet biñ ravat hepan. ¹⁵Met ro pop nonop batapanez porah Godiz Pul Tinap pih rekö ravat hepanezaek God etet hepanen aban abatavonañ ahop ravat hepanepuh pi bain ivovor iv kez modañ nainam hepan. ¹⁶Tat pi Israel añarabon Godiz ñetiv mañohopanen ahovokaro hatevetet non horiorö betet loporizaro boreurat God parum ahoputihar ravohopan. ¹⁷Met ro batapanez popuz tohopanezat batam propet aban Elaiza Godiz ñetiv hahot kez tohot heh-popuz zut pi kezavonañ het tohopanepuh papahol parum ñarohol mogao metat berat main ravat hepanezaek papaholon mañohopanen hodad tinao bat maot parum ñaro porinañ honeo ravat hepan. Ma añarab hat man man tat Godiz ñetiv hat haveteh elat tohopanez porin mañohopanen paru hatevetet hodad tinao bat tin tovai sohopanepuh darim Amip emapanez ñai bizat het etevai sohopan.”

¹⁸Met enzolip Sekaraian pot mañahan pi hatevetet hañiv epat mañah, “Ae ne añavai haravohon nem añap amun añ añavaip haravahag, ni tairao nañaireken ne ñeti nañeñ-okovoz, Rotap ok nañameñ, pot homem?” ¹⁹Met pot mañahan enzolip hatevetet hañiv epat mañah, “Ne Gabriel Godinañ honeo hezap ev, met pi ñeti tin epov niin bar nañomaz hat nañat nemeehan ne eroh. ²⁰Met God hahan hez-porah rotapuv ou ravapanezao niin ne ev nañohon hatevetet barotap navat, oñ ñeti okov neen nañeñ, povoz petev nim ñeo bavon navatohog, ni ñeo nak heken nim añap ropuz ñekevonañ ravat hepanepuh batapanenahoh ni maot ñeo hakë,” pot mañah.

²¹Pot enzolip mañoohan Sekaraia kohat zeï giruvok houloam hehan añarab pi berevapan hat pimaz iñidoh gaa tat het eteohari pi naverev tahan paru home

midin tat, “Sekaraia pi tair tohot houloam hez batah?” pot paru hahot ahoam heh. ²²Tahan Sekaraia berevahapuh parun ñeo namañ, rouvat am het mar nenañinañ kohat tahavoz parun zu metahan paru epat homeh, Peti pi kohat hehaek potaz nao bavatahan etehapuh ok emat tamah, pot homet etet heh. ²³Met Sekaraia aliz pim gog pot tooh-poñ bon tahan pim zeitak maot sat heh. ²⁴Tahan tokat pim añap Elisabet ñekevonañ ravat kohat pim zeimakeh ñonihol 5 am hehapuh pi epat haoh, ²⁵“Met batam ne ñaro navat hehon añarab nem modari neen etet ñeti horiv nañoohavoz tu ravat het tovai emoooh, oñ petev Godihö ne neñizahan ñekevonañ ravoh, povoz nem tuav bon tahaek ne ev biñ ravat hez.” Pot pi hat modariz zeñik helakao nas, oñ am pim zeimakeham heh.

Enzolip Marian ropuz mañah

²⁶⁻²⁷Met ñari añ tohai nap Maria pi Galili zeisik pim zeitaz abatao Nasaret poek heh, met pim abü bapanez au hahan hehapuz abatao Zosep, pi Devid batam aban ahop ravat heh-popuz iz mimiholohanañ nap. Met Maria poek hehan Elisabet ñekevonañ ravat hehan ñonihol 5 bon tahan 6 popuh God pim enzolip Gebriel meehan Nasaret zeitak emah. ²⁸Tat Marian epat mañah, “Eñarim ae, God pi orah rezah ni masakao nanat ninañ hez.” ²⁹Pot mañahan enzolipuz ñeti mañah-poraz kapot pi tin hodad nat, povoz home midin tahapuh ñaihet tat heh. ³⁰Tahan enzolipuhö maot epat mañah, “Maria, ni tovai ñaihet totun. Met God nim hezhezavon eteamahan ni tin hez. ³¹Oñ hatevetet, tokat ni ñekevonañ ravat ro nap batat ro popuz abatao Iesu mañekë. ³²Met Godihö hapanen ro pop pim iz mimip Devidiz urutak rouvat korav ahop ravat hepanen añarabohö piin etet epat hahopan, ‘Rotap God abarah het mapori ritou metat hezapuz rop ok,’ pot pimaz hahopan. ³³Met pi tapup ari Zekopoz iz mimiholoz amun korav ahop ravat hepanez pov bon natotü, oñ pohao het am hepan.” Gebriel pot Marian mañah.

³⁴Tahan Maria enzolipun epat mañah, “Met ne tohai abup navap eveg, tair tat ro hameñ-okop batomaz ok nañameñ?” ³⁵Pot at mañahan enzolip ñeti hañiv epat mañah, “Met Godiz kezao ninañ hepanen pim Pul Tinap niiti emat rekö ravapanen ro tin pop nim ñekevok ou ravapan. Tapanen ni bateken hepanen añarab piin etet epat hahopan, ‘Godiz ro tinap ev,’ pot pimaz hahopan. ³⁶Met nim añ azap Elisabetez añarabohö pi ñarohol bonop pot haoh-pop amun añavai haravat hezaek petev pi ropuz ñekevonañ ravat hezan ñonihol 6 totoi ev bon tapanez tah. ³⁷Met God rekot nonair nai mapotü tohopanezap ok, povoz pim ñeti hah-epov rekot niil ou ravapan.” ³⁸Pot mañahan Maria enzolipun epat mañah, “Ne Godiz as ñarip ev, povoz pim zaitivok niin nañahan emat neen nañeñ-okatam netap.” Pot mañahan enzolip Maria betet sah.

Maria sat Elisabeten eteh

³⁹Met enzolip pot hat sahan Maria aviam het bal hat Elisabeten etepan hat pimotoü bahou batat zuam pim zeit betet Zudia zeisik dañeñik

zei ahö nat demahan hehaekaz hat sah. ⁴⁰Sohot sa berevat Sekaraiaz zeimakeh lokat Elisabeten etet pot mañah, “Eñarim ae, ne nihaz helakao emohog, ni tin heza?” ⁴¹Pot mañahan Elisabet Mariaz ñeti mañahavon hatevetevaiaim pim ñekevok rop biñ ravat lek tat sat em tah. Tahan piih Godiz Pul Tinap map rekö ravat hodadeo manahan, ⁴²pi ñeo ñarah hat epat Marian mañah, “Eñarim ae, Godihö masakao ni nanat petev tin netamah-povohö añ modariz metamahao ritou metat hez. Met nim ñekevok ro hez-okop amun God masakao manamahap ok. ⁴³Met ne añ abatao bon betezap eveg, tair tat ni nem Amipuz nonop nehaz helakao emeñ?” ⁴⁴Pot mañat Elisabet Marian maot epat mañah, “Met ni ñetiv nañeñin ne hatevetevaiaim nem loporih rop hezaek nim ñeti hañivoz biñ ravat lek tahan hateveteohö. ⁴⁵Met ni Godiz ñetiv nañahat rotap ravapanez homeo barotap bateñ, povoz biñavonañ tovai sookë.” Pot Elisabet Marian mañah.

Maria biñ ravat hahat ev

- ⁴⁶Pot mañahan Maria biñ pimau ravat epat hah,
 “Met nem loporih nem Amipuz abatao bat hel batat hez.
- ⁴⁷Ma God pimop ne ba navatat hez-popuz homet biñavonañ hez.
- ⁴⁸⁻⁴⁹Met ne añ abatao bon betez hez-epop pim irih hezan pi nemaz unun naman, oñ am homeme hez, povozahoh ne pimaz homet biñavonañ hez. Met pi neeh pim kezao ba ou batat tin ahö nao netah, povoz orah rezah añarab mapori darim map ahop tin pov netahavoz paru hodad tohopan. Met pim abatao bat hel batat, Pi abat tinavonañap ok, pot pimaz hamoh.
- ⁵⁰Met añarab tairari pim irih het tovai sohopanez pori pi masakao manohopan, met paru petev hez-nenari pot nametotü, oñ tokat parum roholor ro izahol amun taput metohopan.
- ⁵¹Met God pop pim kezao ahö hezan tin mapotuhar tamahap ok. Tat aban tairari parumauz heriñ bat hel batat zaitivonañ tovai samah-pori pi ruamahan pihanañ main ravat hez.
- ⁵²Ma pi hamahan aban korav ahö nari er hor ravamahan aban abatañ bon betez hez-narihoen abatañinañari ravamah.
- ⁵³Met añarab nonair nai bon hezari meñizamahan paru tinatunañ tovai samah, ma nonair naituz ahö ravat hezari piuhö meamahan nai nav betezam samah.
- ⁵⁴⁻⁵⁵Met batam God darim iz mimip Abraam popur iz mim modari meñizohopanez au mañahan hehat pi unun naman, oñ parur parum roholor ro izahol meñizohot petev amun dari Israel añarab pim irih het tovai sameg-eperiz orah rezah zakep tat eñizamah.”
- ⁵⁶Pot Maria hat bon tahapuh pi Elisabetenañ parup hehan ñon nasikaro nas bon tahan pim zeitakaz maot boreurat sah.

Elisabet rop batat Zoan mañah

⁵⁷Tahan Elisabet het tokat pi rop batah. ⁵⁸Tahan pim kapotakari pi rop batahao hahan hatevetet paru emat pinañ honeo Godihö masak ahö piin mañairahavoz paru mapori biñ ravat heh.

⁵⁹Tat hehan alizañ 7 bon tahan zeirevai aliz 8 posik parum toohat parupimeri ropuz biz kosis elapan hat em topourahapuh kosis elat pim papapuz abatao ropun mañapan hat paru hah. ⁶⁰Tahan pim nonop pat, “Evo, pim abatao Zoan pot mañak.” ⁶¹Pot hahan parupimeri piin epat mañah, “Auma, met aban aripim kapotak nap abat okat nao parum napun namañ.” ⁶²Pot mañat met paru, “Ropuz abat tairao papap pimauhö mañapanen dari hatevetek,” pot hat marañinañ zu metah. ⁶³Tahan Sekaraia parun mañairapanez zisiz zu metahan bat emat manahan, Pim abatao Zoan mañak, pot menat mañairahan paru agol atat etet heh. ⁶⁴Met pot tovai nen tapurah Sekaraia maot ñeo hahapuh pi Godiz abatao bat hel batat biñ mañah. ⁶⁵Tahan paru poek hehari pim hahavoz rak tahapuh pim tah-ñeti pov haovai soohan Zudia zeisiz zeidañeñik an pap manah. ⁶⁶Met rotap Godiz masakao ro popunañ heh, povoz pim ñetiv haovai soohan hateveteohari pimaz homet pot haoh, “Ro pop tokat pi ahö ravat tair tohopanezap ok?” Pot paru haovai sooh.

Sekaraia biñ ravat hahao ev

⁶⁷Met ro popuz papap Sekaraiaz loporih Godiz Pul Tinap an pap manat meñizahan tokat ou ravapanez ñetiv pi epat hah,

⁶⁸“Met God dari Israel añaraboz ahö popuz biñ haok. Met dari hori hegiek eñizat non tinaoroh eñehan hez, povoz pimaz biñ haovai sook.

⁶⁹Met batam Devid pim ñeo baval haovai emooh-popuz iz mimiholohanañ aban kez tat maot dari pimeri ba avatapanezap pimauhö ba ou havatahan hez.

⁷⁰Met batam propet abanari pim pot tohopanezat ñetiv bar haovai emooh.

⁷¹Met Godihö dari Israel añaraboz kaev ravat bahori avatohopanezari ma darimaz hori homehopanez porihanañ maot avapan.

⁷²⁻⁷⁵Ma pi tapupuhö pim hahan heh-tin pot tat darim iz mimihol meñizat zakep metohopan, pot propet abanari ourah haoh. Met batam darim iz mimip Abraamin epat au mañah, ‘Met arir arim iz mimihol modari kaev ravat bahori etohopanen, ne ari eñizat heman tin het ñaihet natotü, oñ orah rezah nemaz homevai sohot nem ñetiv tinam hatevetet nem zut tinaharam tovai sohopek.’ Met ñeti tin ahö mañahan heh-pov pi unun naman hezaek am homehot hez.”

- 76 Met Sekaraia pot hat maot pim ropun etet epat mañah,
 “Met nem rop, ni darim Amipuz garosik sovai pim nonor ba oñ batovai sooken, añarab nimaz pot hahopan, ‘Met epop God mod mapori ritou metat hez-popuz propet aban pim hamahañ hateveteamahap eveg etei,’ pot nimaz hahopan.
- 77 Met niuhö darim Amip ou ravat pim añarab hori hezaek parum hori tohopanez poñ ol betehot maot pimeri bavatapanez pov parum mañooken hodad ravohopan.
- 78-79 Met rotap God darim ahop pi zakep ahovonañ hezap okeg, petev dari mapori kuturutak het ñomakaz homet ñaihet tat hezaek, pim masak tinao abarahanañ meepanen erat gitapuz zut alizao anat hepanen, dari tin barai ñarohot pim non tinaoroh lop tinarizaronañ biñ ravat hek.”

Pot Sekaraia hah.

80 Met Sekaraiaz rop ahö ravovai pim hodad tinao amun ahö ravovai emoohaek, pi ahö haravat pim zeï kapot betet añarab bonoek ham betez nonair nai bon heh-porah sat heh. Met tokat pi borourat emat Israel añarabon ñetiv mañohopanezat ravahan, pi main sat hehaekanañ maot emat ou ravahan paru piin eteh.

Maria rop batah-ñetiv

Matiu 1:18-25

2 ¹⁻²Met batam paru añaraboz abatañ tepatak namen heh. Met tokat Iesu batapanezao totoi ravah-porah Roma zeï maposikaroz aban korav ahop ravat hehap Sisa Ogastas, pi kapot tat añarab pim irih heh-poriz abatañ menapanez homet hah. Met pot homet haharah pim irih Siria zeisik aban ahö modap pim abatao Kuirinias heh. ³Met abatañ menapanez hahan añarab mapori taputahar tapan hat nap nim zeï kapotakarohaz sooh. ⁴⁻⁵Tahan Zosep pi Devidiz iz mimip ok, met Betelem zeitak Devid ahö pop batah, povoz abatañ menapanez hahan hatevetet, Zosep pim añ bapanez au hahan hehap Maria bavizat, parup Galili zeisik Nasaret zeitak hehaekanañ bal hat zeï pot betet parupim abatavokaro menapanez hat, Zudia zeisik Betelem zeitak sah. Met Maria ñekevonañ heh. ⁶Met parup zeï potak sa berevat hehapuh rop batapanez kohat bahan Maria hateveteh. ⁷Met poek añarab map zeïnik beo rezat hehan, parupim zeï hepanezamakez mel tovai soohan bon tah, povoz bol kauholoz zeimakeh sa lokat het pim ro garosikap batat, dim givorah bapoti urahapuh, bol kauholoz sisiñiñ bizohopanen nohopanez teket matut tahan hehaek bizahan orat heh.

Enzolihol boloholoz koravorin mañah

⁸Met kutur potak aban nari zeï potaz totoi het iñidoh hovisik bol sipsipiholoz korav heh. ⁹Tahan God pim alizavonañ enzolip meehan

erahan alizao parum etañik ma okat epat rouvat al tezahan, paru enzolipun etet ahoam ñaihet pimau tahapuh dei dei tah. ¹⁰⁻¹¹Tahan enzolip aban porin epat mañah, “Evo, ari tovai ñaihet totunei, oñ hatevetei. Ne ñeti tin nao arin añomaz ev emoh. Met petev kutur epatak Devidiz zei kap okatak ñari añ nap rop batah. Met ro pop darim Amip Kristo tapup pi batam Godihö ari añarab pimeri maot ba avatapanez au hahan hezap petev ou haravat hez. Met ñeti arin añoh-epov rekot ari añarab zei maposikaroharizaro hatevetet biñ ravat hepekezo evog, ¹²bar añoman ari sat etei. Met ro hamoh-pop batat givorah bapoti urat bol kauholoz sisiñiñ biamahan namah-tek potak bizahan hezaek sat etepekepuh, Enzolipuz ñeti dein añahao rotap ev ravah, pot homepek.”

¹³Pot enzolip mañoaiam enzol modari ahovokaro revahanañ enzol garos erat het mañooh-popuz hehaek erat Godiz biñ ravat daa epes paru hah,

¹⁴“Abarah God het mapori ritou metat hezapuz homet biñ haovai sohok.

Met hamarrah God ari tairariz homeme hez-porinañ pim masakao pohao het hepanen, guai ravat tin masak hepek.”

Pot paru hat sah.

Sipsipiholoz koravori sat ropun eteh

¹⁵Met pot hat paru enzolihol maot boreurat abarah helat iz ravat sah. Tahan bol sipsipiholoz korav ravat heh-aban pori enzolipuz mañahavoz homet epat nae nap mañah, “Kar, dari sat Betelem zeitak Godihö enzolip meehan emat ro añahapun etekag, erohol sak sei.” ¹⁶Pot hat paru Mariar Zosep hehaekaz melahar sahapuh ro goe pop bol kauholoz sisiñiñ biohan nooh-tek potak bizahan orat hehaek, ¹⁷sat etehapuh enzolip emat ro popuz ñetiv parun bar mañahat añarab zei potak heharin mañovai soohan hateveteoh. ¹⁸Met mañoohan hateveteoh-pori agol atat nae nap epat mañooh, “Ui, ñeti tairao ev emat darin añamah batah,” pot hah. ¹⁹Oñ Maria pim ropuz ñetiv Godiz enzolip erat aban porin mañahan hatevetet emat parun mañahavoz pim loporih bizat homeme heh. ²⁰Met aban bol sipsipiholoz koravori Betelem zeitak soohaekanañ maot borourat parum hehaekaz sohot enzolipuz mañahan sat etehavoz homehapuh, paru biñ ravat Godiz abatao bat hel batat, “Enzolipuz añahan sat etegiv rotap ravah,” pot nae nap mañovai sooh.

Pim abatao Iesu mañah

²¹Met tokat alizañ 7 bon tahan aliz zeirevaizasik parum toohat tat ropuz biz kosis elah. Tat pim abatao mañapanez hat garos nonop ñekevonañ narav heharati enzolipuhö erat bar mañahat homet, “Iesu,” pot mañah.

Iesu tup ahomakeh bat sah-ñetiv

22-24 Met batam Moses ñeti kateñ hahaek navok epat hah, “Zuda añahol ñarohol havatapanepuh honep honep maot Godiz etañik tin ravapanez hat id pururuañariv ma parupim zut modañariv basat, añ pop pimauhö pot natotü, oñ aban gog pov tohopanez nap manapanen bat id poñariv urat mañarapan.” Pot pi hahan menahan hez. Met mod epov amun menahan hez, God epat hah, “Met añ nap pim ro garosikap batapanepuh nemop bavatapanen hepan.” Met batam epovokaro hahan menahan hezavoz homet tokat ñon honersiz zut bon tahan Zoseper Maria taput tapan hat rop bat Zerusalem zeitak sah.

25 Met porah Zerusalem zei potak aban Godiz homet het tin tovai sooh-ñapuz abatao Simion poek heh. Met God Israel añarab meñizapanez hahan hehaek, aban pop homet pi ñai bizat etehot heh. Met Godiz Pul Tinap pinañ honeo het, 26 garos epat piin hodadeo hamanahan heh, Met ni nañomotü, oñ am biriri heken darim Ahopuhö Kristo meepanen emat eñizapanez au hahan hez-pop ou ravapanen, etetahoh tokat ni ñomekë. Pot Pul Tinapuhö piin hodadeo manahan hehaek Simion popun etepanez homet heh. 27 Met pop Pul Tinapuhö Godiz tup ahomakeh sapanez hodadeo manahan pi garos tup pomakez romevok sa lokat hehan, Mariar Zosep amun Mosesiz ñetiv menahan hehat tapan hat rop bat em lokovai Simion ropun etet, 28 ba opitit Godiz biñ ravat epat hah,

29-31 “Nem Ahop, nim Pul Tinapuhö neen au nañahan hehovoz rotapuv petev añarab maporitü ou ravahan dei eñizat nimeri maot ba avatapanez epopun nemaüz etañinañ etehoek ni haken ne nim gog aban epop lop tinarinañ het ñomom.

32 Met kuturutak havoñad rañiamegipuh nonoron tin etevai samegivoz zut epop añarab maporizaron hodad tinao manohopanen, paru Zuda bon oñ añarab zei modasikaroharizaro Godiz homevai sohopan. Tapanepuh paru Israel añarab epopuz kapotakariz abatao bat hel batohopan.”

33 Pot Simion ro popuz hahan nonopur papap hatevetehapuh agol atat home midin tohot heh. 34 Tahan Simion God parup meñizohopanez mañahapuh Marian epat mañah, “Ni hatevet, Met Godihö ro epop meehap ev, met pi ahö ravat Godiz hahan hezat tohopanezaek Israel añarab piuhö epat metohopan. Met nari pim gog tohopanezavon etet kaev ravohopanez pori piuhö bahori batohopan, met añarab pim tohopanezat etet zait tohopanez pori piuhö tinaek meñehopanen hepan. Met pi Godiz nonor ba ou batohopanen nari pimaz kaev ravat ñeti horiv hahopan. 35 Tohopanen parum kil homehopanezañ piuhö ba ou batohopanen añarab modari hodad tohopan. Met nap kaizas bareñamahan kakam ahov hateveteamahavoz zut nim loporih pimaz zakepiv ahoam tookë.” Pot Simion Marian mañah.

³⁶Met Godiz tup ahö pomakez romevok añ nap heh, met pim abatao Ana, met pim papapuz abatao Panuel, met Panuel popur pimeriz abatao Aser, pot mañooh. Met añ pop Godiz ñetiv añarabon mañoohap ok. Met pi tohairah abup bat hehan krismasañ 7 bon tahan abup ñomahan, ³⁷pi añ hapurip pim main am het añ añovai ravat hehan pim krismasañ 84 bon ravah. Tahan pi tup pomak betet naek nas, oñ orah rezah poek het mañ hahot heh, ma porah karah Godiz abatao bat hel batat tin piin mañ mañohopanez hat, gipizoz ahaoh hat nainam het mañ haohap heh. ³⁸Met Simion ro popuz ñetiv hat bon tahan Mariar Zosep rop bat hehaek nakoe añ pop emat Godiz abatao bat hel batah. Met God Zerusalem añarab hori hehaek meñizat maot non tinaoroh meñepanez hat ñai bizat etet heh-porin añ popuhö ropuz ñetiv parun mañooh.

Nasaret zeitak maot sah-ñetiv

³⁹Met Zoseper añap Godiz homet tapanez hahan hehao tat bon tahan parup rop bat maot Galili zeisik Nasaret zeitak sat heh. ⁴⁰Tahan poek rop het ahö ravovai kez tat gogot tohopanezat ravovai soohan God meñizat masak metoohan pi hodad ahovonañap ravat heh.

Tup ahomakeh Iesu sat tah-ñetiv

⁴¹Met orah rezah krismasañik paru Israel añarab Zerusalem zeitak sat paru topourat Godiz parumeri meñizoohan tin hehavoze homet anumair gipiz arö tat nooh-povoz abatao Pasova mañooh. Met pot toohavoze homet Zoseper Maria orah rezah paru honeo poek sat topourooh. ⁴²Met Iesu pim krismasañ 12 ravahan parum topourat toohat maot tapanez hat paru nonopur papap sah. ⁴³⁻⁴⁴Met sat Zerusalem ze ahö potak hehapuh Pasovaz homet gipiz arö tat nooh-pov bon tahan Iesu am poek hehan, nonopur papap Nasaret parum zeit hotoh hehaekaz nonorozañ sohot epat homevai sooh, Met peti deipim kapotak modarinañ honeo pi garos ok hasah, pot homet soohaek hapanezai ravahan, non pavarah ze natak parupim kapotak modari orapanez tat hehaek sat etehan, ⁴⁵pi bon tahan orat zeirevai aliz modasik modari am parumatakarohaz soohan parup maot poekanañ borourat Zerusalem zeitak mel tapanez hat emah.

⁴⁶Met poek maot emat mel toohan bon tahan orat zeirevai aliz modasik melahar soohan pi am bonoam hehan orat zeirevaizasik Godiz tup ahomakez romevok sat etehan, Iesu aban ahorinañ toutat het parum haohat hatevetet pi hañ parun at mañohot heh. ⁴⁷Met pi hodad tinavonañ het parum haoh-ñeti poñiz hañiv tin mañoohan aban hateveteoh-mapori agol atat heh. ⁴⁸Met pi pot tohot hehan nonopur papap emat etet home midin tat hehapuh nonopuhö epat mañah, “Nem rop, met dei nim papap nimaz mel tat zakepiv ahoam tat maot ev emegig, tairaz ni okat deip eteñ?” ⁴⁹Pot hahan Iesu hañiv parupin epat mañah, “Met ne nem

Papapuz hodadevok pim tup epamakeh ev het hamoh-epovoz arip hodad nat het nemaz zeï modaņik mel toogi?”⁵⁰ Pot maņahan nonopur papap pim maņahavon hatevetet hodad nat, oņ parup am homehot heh.

⁵¹Tahan Iesu pim nonopur papapunaņ paru borourat maot Nasaret parum zeitakaz sah. Met pi poek sat hehapuh pim nonopur papapuz haohat baval hat tohot hehan, Maria ropuz haovai tovai emoohavoz pim loporih ahoam homehot heh. ⁵²Met Iesu ahö ravovai pim hodadeo ahö ravovai soohan, God ma aņarab modari pim toohavon etet, Pi ro aban tinap ok, pot pimaz hodad ravat heh.

Zoaniz ñetiv maņoohat ev

Matiu 3:1-12; Mak 1:1-8; Zon 1:19-28

3 ¹Met Sekaraiaz rop Zoan ham betez nonair nai bon heharah sat hehan, Godihö piin ñetiv maņooh. Met maņooh-porah Roma aban zeï maposikaroz korav ahop ravat heh-popuz abatao Sisa Taiberias, met pi poek map ahop ravat hehan krismasaņ 14 bon hatahan modavoz ñon nari bon tah. Met Sisa popuz irih Zudaholoz zeisik aban ahö ravat heh-popuz abatao Pontias Pailat, met modap Erod pop amun pi Galili zeï mod posikaz ahop ravat hehan, pim nanep Pilip pop amun Ituria ma Trakonitis zeï posikaroz ahop ravat heh, met Lisantias pi Abilene zeï posiz ahop ravat heh. ²Met Zudia zeisik aban Anasir Kaiapas parup anumaihol bareņ elat maņaroohariz aban ahoņariv ravat heh. Met ev menoh-ahö eperi heh-porah God Zoanin pim tohopanezat ñetiv bar maņahan hateveteh. ³Tahapuh pi ham betez porah hehaek betet Zodan iveriz nakoe zeï posizaņ sohot ñeti epov aņarabon maņovai sooh, “Met arim horiņ map betet loporizaro borourepeken ivoh emeehoman, God arim hori tovai emameg-poņ ol betehopan.” Pot Zoan aņarabon maņovai sooh.

⁴Met batam propet aban Aisaia pim tepatak epat menahan hez,

Met ham betez narah aban nap het ñeo ñarah epat hahopan, “Arim Amip emapaneg, pimaz homet ari ñai bizat pim nonor ba oņ batohozei.”

⁵Tat pi tin emohopanez nonair nai ur elat gupoņ ked mezat daņeņ menat nonor pekü hezaek ba oņ batat nonoroh heleņ hezaek tiz betet batin batohopeken tin opep ravohop.

⁶Tapanen dari aņarab mapori God maot pimeri ba avatapanez hahan hez-popun etet hodad ravook. *Aisaia 40:3-5*

Pot Aisaia menahan hezaek Zoan emat menahan hez-taput toohan rotapuv ou ravoooh.

⁷Met Zoan propet aban Aisaiaz menahan hez-taput tat Godiz ñetiv aņarabon maņovai soohan, aņarab ahovokaro pihö ivoh memeehopanez hat emat topourah. Tahan pi parun epat maņah, “Ae, ari hamal ñaro eperi, tokat God arim hori tamegiņiz haņiv etapanez ñetiv tairapuhö

hahan ari hatevetet ivoh emeeman pov bazei manepok hat nehaz emeg?
⁸Met, 'Deim horiñ betet loporizaro boroureg,' pot hapek, povoz tin tovai sohopeken arim tohopekezavon dei etet, 'Rotap parum horiñ betet hodad tinao maot bah,' pot arimaz haok. Met arimam tovai, 'Abraam deim iz mim tinap ok, povoz dei pim zut Godiz ñarohol ravat hez,' pot hamegi? Evo, pot ari haotunei. Met rotap ne arin epat añom, God rekot hel upai epeñ bat Abraamizari matut tapanen ou ravat pim ñarohol ravat hepan.
⁹Met God zi kapoñik enarinañ menapanez baval hat kip tat ñai bizat etet hez. Tat zi tairañ uloñ tin navad hepanez poñin etet pi menat itiñadek betepanen map ñadapan."

¹⁰Pot mañahan añarab hatevetet ñaihet tat piin epat at mañah, "Ui erom, povoz dei tair tak?" ¹¹Pot at mañahan pi ñeti hañiv parun epat mañah, "Met aban tairap dim houloñariv oraepanezap pimau nap bat aban mod dimip bon hepanezap manap. Ma aban gipiz ahö oraepanezap pi zu taput gipiz bon hepanezari natü manap."

¹²Pot parun mañovai aban takes monis booh-nari piuhö ivoh memeeapanez hat honeo emat hehaek paru piin epat at mañah, "Añairameñip ae, met dei amun tair tak?" ¹³Pot at mañahan pi hañiv parun epat mañah, "Met ari takes monisiz Roma gavman aban ahoriz hamahat tat moni pos tinam bohozei, oñ moni modas revah bizapanen arim bepekez añarabon mañotunei."

¹⁴Pot mañahan ñai aban nari honeo emat hehaek piin epat at mañah, "Erom, dei amun tair tak?" Pot hahan pi parun epat mañah, "Met ari tovai kez tat añarab arim modariz monis givogí botunei, ma moreg hat paru nari ñevok basat bizotunei, ma arim gogovoz monis anohopanezarah revah modas bizat anohopanez homet, 'Darim moni mod nas revah bizat anapan nak,' pot haotunei."

¹⁵Met añarab Zoaniz mañoohat hatevetet parumam biñ ravat nae nap epat mañooh, "Met okop God meepanen erat eñizapanez haohap Kristo tapupu? Ma tairapuhö ok hamah?" Pot pimaz home houloñ homet haoh. ¹⁶Tahan Zoan hatevetet parun epat mañah, "Evo, met aban arim hameg-okop nem tokat emapanepuh pim kezavohö nem kezao ritou metat hepan. Met pop pi aban abat ahovonañap ok, oñ ne aban goe abatao bon betezap ev, povoz ne pi aban ahop hahö-popunañ toutat deip ñetiv hakaz rekot bon. Met ne iv et pei upaivonañ emeamoh, oñ popuhoh Godiz Pul tinap ari añarab anapan. Tapanen dari itiñadek nai beteamegin ñadat bon tamahavoz zut arim horiñ bavon batapan. ¹⁷Met aban hamoh-pop pim savoris bat hez. Tamahaek aban nari uitikapiz gogot tovai uit kosiñ bamain batamahapuh, kos poñ savorisinañ holat itiñadek beteamahan ñadamahan uit tinakap parum zeñik bat em biamahavoz zut pi ari añarab pot etohopan." ¹⁸Met Zoan parun pot mañat Godiz baiñetinao añarab tin hatevetehopanez hat ñeti nañir nañiti bavatat parun mañooh.

Zoan kakam zeimakeh memerizah*Matiu 14:3-4; Mak 6:17-18*

¹⁹Met Erod Galili zeisiz aban ahö ravat heh-pop pim nanepuz añap Erodias batep tat bat hehapuh hori modañ amun tovai sooh, povoz Zoan aban popun ñe kezao epat mañah, “Ni hori ahoñ tameñip ok.”

²⁰Pot mañahan Erod kaev ravat hori ahö modao tat Zoan memeriipanez mañahan paru pi bat kakam zeimakeh memerizah.

Zoan Iesu ivoh memeeh-ñetiv*Matiu 3:13-17; Mak 1:9-11*

²¹Met Zoan garos kakam zeimakeh bat namemeriz heharah pi añarab modari ivoh memeehanam, Iesu amun piiti sahan ivoh memeeh. Tahan Iesu mañ haohan Zoan etet hehan abar elat okat epat tahan, ²²Godiz Pul Tinap id pururuapuz zut Iesuz gagaih erah. Tahan abarahanañ ñe nao epat hah, “Ni nem rop, ne loporí nihar nanat nim tameñivon etet nimaz ahoam biñ ravamoh,” pot hah.

Iesuz iz mimiholoz abatañ ev*Matiu 1:1-17*

²³Met Iesuz krimsañ 30 ravahan pi pim gogot kapot tat tovai emooh. Met pi popuz papap Zosep, pot añarab homet heh.

²⁴Met Zosepez papapuz abatao Ilai,
met Ilai popuz papapuz abatao Matat,
met Matat popuz papapuz abatao Livai,
met Livai popuz papapuz abatao Melkai,
met Melkai popuz papapuz abatao Zanai,
met Zanai popuz papapuz abatao Zosep.

²⁵Met Zosepez papapuz abatao Matataias,
met Matataias popuz papapuz abatao Emos,
met Emos popuz papapuz abatao Neam,
met Neam popuz papapuz abatao Eslai,
met Eslai popuz papapuz abatao Nagai.

²⁶Met Nagai popuz papapuz abatao Meat,
met Meat popuz papapuz abatao Matataias,
met Matataias popuz papapuz abatao Semen,
met Semeniz papapuz abatao Zosek.

²⁷Met Zosekez papapuz abatao Zoda,
met Zodaz papapuz abatao Zoanan,
met Zoananaz papapuz abatao Resa,
met Resaz papapuz abatao Serubabel,
met Serubabel popuz papapuz abatao Sialtiel,

- met Sialtieliz papapuz abatao Nerai.
- 28 Met Nerai popuz papapuz abatao Melkai,
 met Melkaiz papapuz abatao Edai,
 met Edai popuz papapuz abatao Kosam,
 met Kosamaz papapuz abatao Elmadam,
 met Elmadam popuz papapuz abatao Er.
- 29 Met Era popuz papapuz abatao Zosua,
 met Zosua popuz papapuz abatao Eliese,
 met Eliesez papapuz abatao Zorim,
 met Zorim popuz papapuz abatao Matat,
 met Matat popuz papapuz abatao Livai.
- 30 Met Livaiz papapuz abatao Simion,
 met Simion popuz papapuz abatao Zuda,
 met Zuda popuz papapuz abatao Zosep,
 met Zosepez papapuz abatao Zonam,
 met Zonam popuz papapuz abatao Elaiakim.
- 31 Met Elaiakimiz papapuz abatao Melia,
 met Meliaz papapuz abatao Mena,
 met Mena popuz papapuz abatao Matata,
 met Matataz papapuz abatao Netan,
 met Netan popuz papapuz abatao Devid.
- 32 Met Devid popuz papapuz abatao Zesi,
 met Zesiz papapuz abatao Obet,
 met Obet popuz papapuz abatao Boas,
 met Boas popuz papapuz abatao Salmon,
 met Salmoniz papapuz abatao Nason.
- 33 Met Nason popuz papapuz abatao Aminadap,
 met Aminadapiz papapuz abatao Atmin,
 met Atmin popuz papapuz abatao Anai,
 met Anaiz papapuz abatao Ebron,
 met Ebron popuz papapuz abatao Peres,
 met Peresiz papapuz abatao Zuda.
- 34 Met Zudaz papapuz abatao Zekop,
 met Zekop popuz papapuz abatao Aisak,
 met Aisak popuz papapuz abatao Abraam,
 met Abraamiz papapuz abatao Tera,
 met Teraz papapuz abatao Neo.
- 35 Met Neoz papapuz abatao Serak,
 met Serak popuz papapuz abatao Reu,
 met Reuz papapuz abatao Pelek,
 met Pelek popuz papapuz abatao Ebe,
 met Ebez papapuz abatao Sela.

- 36 Met Selaz papapuz abatao Kainan,
 met Kainan popuz papapuz abatao Apaksat,
 met Apak-sat popuz papapuz abatao Siem,
 met Siem popuz papapuz abatao Noa,
 met Noaz papapuz abatao Lamek.
- 37 Met Lamek popuz papapuz abatao Metusela,
 met Metuselaz papapuz abatao Inok,
 met Inok popuz papapuz abatao Zaret,
 met Zaret popuz papapuz abatao Maalalel,
 met Maalalel popuz papapuz abatao Kenan.
- 38 Met Kenaniz papapuz abatao Inos,
 met Inosiz papapuz abatao Set,
 met Set popuz papapuz abatao Adam,
 met Adam God kapot tat matut tahan hehap ok.

Seten Iesu zu metah-ñetiv

Matiu 4:1-11; Mak 1:12-13

4 ¹Met Godiz Pul Tinap Iesuh rekö ravat meñizat hodadeo manahan, pi Zodan iveriz nakoe hehaek betet ham betez añarabor nonair nai bon heharah sat heh. ²Tahan Seten emat au alizañ 40 Iesu pim hapanezat tapan hat zu metohot heh. Met pot metooh-porah Iesu gipiz nain hehapuh ginaz map hori ravat heh. ³Tahan Seten piin epat mañah, “Erom ni Godiz rop, pot hameñ, povoz haken hel epov nim gipiz ravapanen nekë.” ⁴Pot mañahan Iesu Godiz ñetivoti homet het ñeti hañiv piin epat mañah, “Baiñetinavoz Tepatak epat red menahan hez, Met gipiz nenatuhar dari añarab novai sookan darim loporizaroh tin hekazao ou naravotü.”

⁵Pot mañahan Seten Iesu bavizat revah naek helat parup rouvat hehapuh, hamarrah zeisikaroh aban korav ahorir añarab irih heharir zeirurumar nonair nai mapotun tapuratiam mañairahan eteh. ⁶Tahan epat mañah, “Met map nañairohon eteñin tinahar hez-okotü nemotuhar ok, povoz nemaуз zaitivok tairap au mañomaz pop rekot pim bapan. ⁷Met ni nem abatao bat hel batat rariñ rez bareñat^a nen, ‘Nem ahop,’ pot neen nañekë, povoz ne nonair nai tin nañairohon eteñ-okotü niin au nañoman, niuhohar map okotuz korav ahop ravat hekë.” ⁸Pot mañahan Iesu ñeti hañiv piin epat mañah, “Met Baiñetinavoz Tepatak epat menahan hez, Met God nenap darim ahop hat pi nenapuz abatao bat hel batat arim ahop bavatohozei. Pot menahan hezaek ne nim hameñ-okat natotü.”

⁹Pot Iesu mañahan Seten Iesu bavizat Zerusalem zeitak sat akah revah Godiz tup tovë ahomakez tokovok meñet maot epat mañah, “Ni Godiz

^a 4:7 Pavar 7 -Met porah aban korav ahop hehan pim irih hehari piin ñetiv mañapanen tin hatevetepanez hat pim totoi emat rariñ rez bareñat piin mañoooh.

rop, pot hañi? Povoz epekanañ ni peg hat hamarah hotoh okoek meñet sa. ¹⁰Met Baiñetinavoz Tepatak epat menahan hez,

Met God pim enzoliholon mañat meepanen emat nimaz tin korav ravat hepan.

¹¹Tat parum marañik ni navapanen hel okoñihö nim eñañik naneelotü.

Buk Song 91:11-12

Pot menahan hez, povoz ni epekanañ meñet seken pi neñizapanen ni hori naravotü.” Pot Seten piin mañah. ¹²Tahan Iesu ñeti hañiv piin epat mañah, “Tin hañ, oñ epat amun menahan hez, Met ni nap betez nao tekez homet, Nem ahop God ne neñizapanen tom, pot hat pi zu metotun. Pot menahan hez, povoz pi nem ahö pop zu metom hat, betezam ne epekanañ peg hat okoek nameñetü.”

¹³Met Iesu pot mañahan Seten pim mañapanezat tapan hat zu metoohaek, pi betet tokat mod narah pi maot emat zu metapanez homet sah.

Iesu pim gogot kapot tah

Matiu 4:12-17,23-24; Mak 1:14-15,39

¹⁴⁻¹⁵Met Godiz Pul Tinap pinañ honeo het bakez batoohan pi Galili zeisik maot borourat sahapuh, Zudaholoz topour zeñik lokat Godiz ñetiv mañoohan, zeï posik añarab mapori pim mañooh-ñetiv hatevetet pimaz biñ ravat heh.

Nasaret pimeri pi kos rez manah

Matiu 13:53-58; Mak 6:1-6

¹⁶Met Iesu zeï posizañ sohot Nasaret pim zeï kapotak pi goerah het ahö ravah-poek sa berevah. Tat parum gogot natotuz aliz poñiz nasik pim toohat tapan hat paru Zudahol honeo parum topour zeimakeh sa lokat hehapuh pi ñeti nao rekö hapan hat bal haz rouvat heh. ¹⁷Tahan aban nap Baiñetinavoz Tepat bahapuh pi manahan barah hat etet propet aban Aisaia popuz batam menahan hezao epat rekö hah,

¹⁸“Met darim Ahopuz Pul Tinap nenañ hezan, ne añarab betez nonair nai bon hezarin pim ñeti tinao mañomaz hat ba ou navatat nañat nemeeh. Met añarab horivohö birepez zut demahan hezari neohö babiloman, paru maot tinam tovai sohapan. Ma etañ kutariz zut hezarin mañohoman, paru maot tin etet homehopanez hat ok ba ou navatah, ma tairari modarihö bat hor batamahan honoñaivonañ hez-pori baverevoman, tin hepenez hat ba ou navatah. ¹⁹Ma God pim añarab hori hezaek masakao manapanez pov totoi ravovai sah, pot añarabon mañat meñizohomaz hat ba ou navatah.” *Aisaia 61:1-2*

²⁰Met Iesu pot rekö hat bon tahapuh tepat bapoti urat aban manah-pop maot manat toutah. Tahan añarab topour zeï pomakeh heh-pori, Pi ñeti

mod nao mañapan, pot homet paru piinaharam map et bameet hehan, ²¹ pi parun epat mañah, “Met Baiñetinavoz Tepatak menahan hezat rekō hahon ari hateveteg-epovoz rotapup petev ne ev ou haravat hez.” ²² Pot pi parun mañat am ñetiñ mañoohan paru hatevetet parum loporizaroh muz tahan paru homeme het epat nae nap mañooh, “Ae, met pi okop Zosepez rop ok.” ²³ Met pot paru hahan Iesu parun epat mañah, “Met ari epat peti neen nañepek batah, ‘Ni aban lamari batin batameñip okeg, nimaузari batin bat.’ Ma mod epov amun nañepek, ‘Kapaneam zeitak red povor kao tooñin emat dein añah-poñiz zut nañ ev nim zeı kapotak tooken eteok.’ Pot ari neen nañepek batah. ²⁴ Oñ ne arin epat añoman hateveteı, Met propet aban Godiz ñetiv hamah-nap pimaуз zeı kapotakarın mañamahan paru porı pimaz kaeв ravat hez. ²⁵ Met batam propet aban Elaiza heharah krismasañ 3 met modavoz ñonihol 6 Israel zeisik utar napel hehan gin ahov tat heh. Met pot tat hehan añ hapurihol ahoam zeı posik het gin ñomat heh, ²⁶ oñ God Elaiza Zuda porı meñizapanez nak, oñ Saidon zeı pat posik añ hapurı pat nap Sarepat zeitak gin hehaek meñizapanez hat meehan sah. ²⁷ Ma propet aban mod nap Elaiza Israel zeisik heharah añarab ahoam obuloñ pohao tat hehari Elaiza popuhō paru batin navat, oñ Siria zeı pat posikanañ aban nap pim abatao Neman nen pop pim obul poñ tat hehaek emahan, Elaiza popuhō pi batin batah.” Pot Iesu parun mañah.

²⁸ Met Iesu ñeti pov mañahan añarab topour zeı pomakeh hehari hatevetet epat homeh, Met darim tamegivoz hat ok ñai añah, pot parum loporizaroh homet gitait ravat mogao ahoam tah. ²⁹ Tahapuh Iesu bat parum zeı pot rop navoz totoi demahan heh, povoz paru epat hah, “Dari pi baverevat helakapuh sesevok betekan sat ñomapan.” Pot hat pinañ honeo paru helah. ³⁰ Tat totoi helahapuh Iesu parum ñaravatak soohaek pi lipohar sat sah.

Iesu pitup aban napuh menahaek ruah

Mak 1:21-28

³¹ Met Iesu poek hehaekanañ iriti sohot Galili zeisik Kapaneam zeitak sah. Tat poek hehapuh parum gogot natotuz aliz poñiz nasik paru Zudahol parum topour zeimakeh lokat hehan Iesu lokat parun baiñetinao bar mañooh. ³² Tahan añarab hatevetet hehari parum marahol ker menat epat homeoh, Ui aban okop pi ñeti mageı epeñiz maupuhō ok hamah. ³³ Pot homet hehan aban napuh pitup menat hehaekanañ epat ñeo ñarah hah, ³⁴ “Ni Iesu Nasaret zeitakanañap dei tair etekez hat ev emeñ? Ni Godiz nemeehan emeñ-tinap, pot dei hodad hezag, dei bahori avatekez emeñi?”

³⁵ Pot hahan Iesu epat ñai mañah, “Tovai ni maot okat haotun, oñ aban okop betet ni berevat sa.” Pot mañahan pitup berevapanez tat aban pop

hamarah bavetehan sa ñodat ur nakel, oñ tinam hehan pitup pihanañ berevat sah. ³⁶Met pim pot tahavon añarab etet agol atat hehapuh paru epat nae nap mañooh, “Ui, pei magei tairao ev tah batah. Tat pi aban okopuh pitup menat hehaek hodad ahovor kezavonañ het mañahan hatevetet berevat sah?” ³⁷Met Iesu pot tahavoz añarab ñetiv haovai soohan zeï porih map an pap manat sah.

Saimoniz añ lelamap batin batah

Matiu 8:14-15; Mak 1:29-31

³⁸Met Iesu topour zeï pomak betet Saimoniz zeimakeh sahan, pim añ lelamap lam mid midiv tat orat hehaek paru pi meñizapanez Iesun bar mañah. ³⁹Tahan pi sat añ pop arusik orat hehaek nakoe rouvat lam mid mid pov bon tapanez mañah. Tahan añ pop tin ravat bal hahapuh parum gipiz bareñat tezat manahan nah.

Iesu añarab ahovokaro batin batah

Matiu 8:16-17; Mak 1:32-34

⁴⁰Met gitap bañodoohan añarab ahovokaro parumeri lam navor nao tat hehari bavizat batin batapanez hat Iesuz nakoe bat emah. Tahan pi honep honepuh pim marañ bizat parum lam tat heh-poñ bavetehan tin ravah. ⁴¹Met añaraboh pitü menat hehari ruahan berevat sapanez tat ñeo ñarah epat hah, “Ni Godiz rop ok.” Pot mañovai berevat sah. Met pitü pori, Iesu pi Kristo Godiz au hahan hezap ev, pot paru hodad, povoz paru maot hapan hezavoz pi parun ser mañat ah ñeo mañah.

Iesu zeï nañik ñetiv bar mañooh

Mak 1:35-39

⁴²Met orat zeit maok al teevai soohan Iesu bal hat zeï pot betet añarab bonoek pim main het pim Papapun mañ mañapanez hat sat hehan, añarab pimaz mel tovai emohot pi hehaek etet pi paru betet maot modaek sapan hezavoz mañah. ⁴³Tahan Iesu epat mañah, “Met God arim koravopuz masakavoz roketak hepekez ñetü añamoh-pov arim zeï nen epatakam het añohom bon, oñ ne añarab zeï modasikarin amun mañovai sohomaz au nañahan hez, povoz rekot ne am sat mañovai sohom.” ⁴⁴Pot mañahapuh poekanañ pi zeï modañik sat paru Zudaholoz topour zeïñik lokat ñetü pov mañovai sooh.

Iesu aban narin ñetiv mañah

Matiu 4:18-22; Mak 1:16-20

5 ¹Met aliz nasik Iesu Genesaret iv havevoz kupavok pi sat hehan, añarab ahovokaro Godiz ñetiv hapanen hatevetepanez hat, paru emat topourat pim okat epat rouvat pi ba atalip metah. ²Tahan Iesu

etehan bout natakaro iv havë povoz gaorevok beri hat em bizahan oraehan, pisihol booh-abanari parum dev kitü ivov betehot hehan pi eteh. ³Tat Saimon popuz boutitak helat epat mañah, “Erom ae, nim boutit beken deip havevok aviam hon ravopain.” Pot mañahan pim hahat tahan Iesu boutitak toutat hehapuh añarabon pim ñetiv mañooh.

⁴Met pim ñetü mañoohao bon tahan Saimonin pot mañah, “Ari aban ninañ gogot tameg-eperi boutit epekanah bat iv havevoz lopotak tovë er horat hezaek sat dev kitü betet pisihol bepek,” pot mañah. ⁵Tahan Saimon ñetü hañiv piin epat mañah, “Nem ahop ae, haopat kutur epatak dei gog ahov tat dev ki epotü upaiam betevai houloam sat em toogin zeit al teehan dei pis nari nav, oñ ni hañ povoz dei maot betet etek,” pot mañah. ⁶Tahapuh sat parum dev kitü betehan iv havevok er horahan, pisihol ahoam ki potuk holat map atalip tahan ki potü beri hahan porourapanez tat heh. ⁷Tahan Saimon bout modatak hehari meñizapanez as hahan emahan, pisihol dev kitunañ beri hat boutitakaroh bizahan honoman manahan, havevok er horapanez tat heh. ⁸⁻¹⁰Tahan Saimon pim abat modao Pita pot tahavon etet pir aban paru honeo hehari pisihol ahoam baholahavoz homet agol atat dei dei ahoam tah, ma Sebediz roñariv Zemisir Zon parup Saimoninañ honeo pisihol boohañariv, parup amun povon etet taput tat heh. Tahan Saimon Iesuz eñañik rariñ rez bareñat^b epat mañah, “Nem Amip ae, met ne aban horip eveg, ni ne nevetet sekez nañamoh.” Pot mañahan Iesu epat mañah, “Ni ñaihet totun, oñ ni añarab batogü manat Godiz ñetiv mañooken hatevetehopanez gogot añañirohom.” ¹¹Met Iesu pot mañahan paru boutitakaro beri hat gaorevok bat emat parum boutitakaror nonair nai map betet Iesunañ honeo sah.

Iesu aban obuloñinañap batin batah

Matiu 8:1-4; Mak 1:40-45

¹²Met Iesu zeï natak sat hehan narah aban pim herisik map obuloñ pohao tat heh-ñap piin etet emat hamarrah ñodahapuh epat mañah “Nem ahop ae, ni rekot ne batin navatekez zait tekë, povoz haken ne tin ravom.” ¹³Pot mañahan Iesu aban popuz herisik maras ut urahapuh epat mañah, “Ne zait toh, povoz ni tin rav.” Pot mañovai obuloñ tapuraham map bon tahan aban pop tin ravah. ¹⁴Pot metahapuh Iesu aban popun ah ñeo epat mañah, “Ni sekepuh añarab modarin nem ev netoh-ñetiv tovai mañotun, oñ ni sat aban anumaihol bareñ elat mañaramahariz napun nim heris mañaireken pi etet, ‘Rotap epop tin haravah,’ pot nimaz hap. Tapanen batam Mosesiz hahan hezat ideñariv bat ni Godiz hañiv metekë. Teken añarab modari niin etet nim tin raveñivoz paru hodad ok hatapan. Tapanen ari honeo maot hepek.” Pot piin ah ñeo mañahan sah.

^b 5:8-10 Pavar 8 sat 10 -Met porah aban korav ahop hehan pim irih hehari piin ñetiv mañapanen tin hatevetepanez hat pim totoi emat rariñ rez bareñat piin mañooh.

¹⁵Met zeï psik Iesuz tooh-ñetiv an pap manahan map hateveteh. Tahapuh añarab ahovokaro lamao tat hehari batin batohopanez hat, ma pi ñetiv hahopanen hatevetehopanez hat nen tapurah Iesuhaz emooch.

¹⁶Met porah karah Iesu pim main ravat sat añarab bonoek pi Godin mañ mañohot heh.

Iesu eñar mar ñomat hehap batin batah

Matiu 9:1-8; Mak 2:1-12

¹⁷Met aliz nasik Iesu ñetiv añarabon mañohot hehan Galili zeisik zeï natakanañ natakanañ, ma Zudia zeisik Zerusalem zeï ahö potakanañ, ma zeï mod map potak katak Parisi abanari met aban ñetü kateñiz mañairahol hehaek, paru honeo emat het hatevetehot heh. Tahan añarab lamari bat emohopanen batin batohopanez Godiz kezao Iesu hamanahan hehaek pi lamari batin batohot hehan, ¹⁸aban eñar mar ñomat heh-
nap pimeri bi tav tavas tat bavizat bat emahapuh kohat Iesu hehaek basapan hat tat etehan, ¹⁹añarab zeimakeh map atalip tat hehan paru balokapanez bapap tat het arop ririñasizañ rao rao revah helahapuh, zeï aropos atvat demahan hehaek ur edat bapor rezat aban lamap orat heh-bi tav tavasik bitom kiñi urat kohat meehan, Iesuz nakoe añarab togü manat hehaek er horah. ²⁰Met meehan er horahan Iesu aban lam pop bat emoohari, Piuhö rekot aban epop batin batapan, pot paru homeo badae batat bat emahavoz Iesu hodad ravat aban lamapun epat mañah, “Erom, ne nim hori tovai emooñ-poñ ok ba haol beteohö,” pot mañah.

²¹Pot mañahan Parisi abanarir aban ñetü kateñ añarabon mañoohari parumam pot homeh, Met aban epopuhö rekot napuz hori tapanez nao baol navetetü, oñ God nenapuhoh baol beteamahap ak. Met pi Godiz zut ravapan hat okat mañahan dari hatevetegin tin narav. ²²Pot homeohan parum homeoh-pov Iesu zuam hodad hatat parun epat mañah, ²³“Tairaiz arim loporizaroh nemaz okat homeameg? Met ne aban epopun pot mañoh, ‘Nim hori het tovai emooñ-poñ ba ol haveteohö,’ pot ev mañoh, oñ rotap baol haveteohö ma baol navet, povoz ari etet hodad nat. Oñ aban epopun, ‘Ni bal haz,’ pot mañoman pi petev bal hapanen ari etepekezaek nem kezao ou ravapanen hodad tepek. ²⁴Met ne Añaraboz Nanep ev het ari añaraboz hori tamegiñ ol betehomaz kez pov neeh hez-pot hodad tepekez hat ne aban epopun, ‘Ni bal haz,’ mañoman pi bal hapanen etet nem kezavoz ari hodad tepek.” Iesu parun pot mañat aban lamapun epat mañah, “Erom, ni bal hat houlorumet bat nim zeitakaz sa.” ²⁵Pot mañahan añarab etet hehan aban pop bal hat pimotü bat sapanez tat Godiz abatao bat hel batat biñ haovai pim zeitakaz sah. ²⁶Tahan añarab map poek hehari etehapuh agul atat hehapuh, Godiz biñ ravat epat haovai sooh. “Ui, dei mamog pei ou ravah-akavoz zut navon et naré hegiek petev ou ravahan eteg.”

Iesu Livaiz as hah-ñetiv
Matiu 9:9-13; Mak 2:13-17

²⁷Met Iesu aban lam pop batin batahapuh pi iñidoh berevat etehan, aban takes monis boohap pim abatao Livai pim takes monis booh-zeimakeh toutat hehan Iesu piin etet epat mañah, “Erom, ni emeken deip honeo sopain.” ²⁸Pot mañahan Livai bal hat pim gog toohat betet Iesunañ parup honeo sah.

²⁹Met tokat Livai pim zeimakeh añarab emapanen Iesunañ honeo gipiz tez bizat napanez as hahan emah-porah, aban Livaiz takes monis boohat booh-nari, ma hori modañ tooh-nari em lokahapuh paru honeo toutat het nooh. ³⁰Tahan Parisi aban nari, ma aban ñeti kateñiz mañairahol parunañ honeo heh-nari poek gipiz nooh-ñetiv hatevetet emat etet Iesuz mañairooh-abanarin epat at mañah, “Erohol ae, ari tairaiz aban hori tamah-okorinañ honeo toutat gipiz nameg,” pot mañah. ³¹Tahan Iesu hatevetet parun epat mañah, “Aban nap lamao nat tinam hepanen meñizat batin batapanez aban mod nap pihaz nasotü, oñ aban nap lamao tat hepan, povoz meñizat batin batapanezap pihaz sapan. ³²Met povoz zut ne, ‘Dei aban tin tamegiri ev,’ pot hamah-poriz hat ne naem, oñ aban hori tamah-tapuri meñizoman, parum loporizaro boreurapanez hat ne emoh,” pot mañah.

Gipiz nain hehavoiz at mañah
Matiu 9:14-17; Mak 2:18-22

³³Met añarab nari Iesun epat mañah, “Met Zoaniz mañair abanari porah karah Godin mañ mañohopanez hat gipizor ivovoz ah ñeo hat nain het mañ hamah, met Parisi aban pori paru am taput tamah, oñ nim mañairameñ-abanari paru gipizor ivov am novai samah.” ³⁴Pot mañahan Iesu navoti bavatat hañiv epat mañah, “Met añarab nari parum kapotak nap emapanen, paru pinañ honeo het biñ ravat gipiz nohopan. ³⁵Oñ tovai sohot ñai aban narihö aban pop basapanez porah pim kapotakari pimaz zakep tat gipiz nain hepan.”

³⁶Iesu pot mañat navokaro navoti bavatat epat ñetiv mañah, “Met aban nap pim dim giv topar kelapanen giv tet magei nar kelapanez poek nameotü. Met pi pot tapan, povoz maot zuam giv tet magei pot meeapanen hepanezaek dim topar kelapanen puiorö maot ahö ravapan. ³⁷Met mod nao amun epat hez, Aban nap iv ñerë hep mamog biipanen oraet hop hop hatat hepaneiz povok ivov holapanen emat beo rezapanepuh zuam rapat ozourapan, ³⁸oñ iv ñerë hep magei tinavok ivov holapan, povoz rapat naverevotü, oñ tin hepan.” ³⁹Pot mañat maot epat mañah, “Met añarab bain iv mamogao nohot, ‘Bain iv mamog epovohar muzeo ev,’ pot hat bain iv mageivoiz kaev ravamah,” pot mañah. (*Pot Iesu ñetiv paru añarab*

tairari batam haovai emooh-ñeti poñi zait tat pim ñeti mageivo kaev ravat hehari bain iv mageivor mamogavoti bavatat mañah.)

Paru uit uloñ tavat nahan mañah

Matiu 12:1-8; Mak 2:23-28

6 ¹Met tokat parum gogot natotuz aliz poñiz nas al tezahan Iesur pim mañairooh-abanari uit av nañiz ñaravavozañ sohot mañairooh-abanari uit uloñ tavat marañik utur zoñ tat kosiñ betet uviñ novai sooh. ²Tahan Parisi aban nari etet parun epat at mañah, “Erohol ae, met petev darim gogot natotuz alizas eveg, tairaiz ahaoh hahan hezao elat ari aliz epesik gog okov tat uit uloñ tavat nameg?” ³⁻⁴Pot at mañahan Iesu parun epat mañah, “Evo, paru horiv ok nat, oñ Devid darim iz mim ahop ravat hehapuz tah-ñeti pov ari rekö hamegiek tin hodad nata? Met Devid popur pimeri emohot gin ñomat gipizoz mel tahan bon tahan, pi kohat Godiz tup ahomakeh bereñ Godiz au hat bizooh-nañ aban anumaihol bareñ elat mañaramah-nenari nohopan, pot hahan hezaek Devid aban pot toohariz nap bon, oñ am lokat berë poñ bat nat pimeri amun manahan nah. ⁵Oñ ne Añaraboz Nanë epop darim gogot natotuz aliz hahan hezañiz maup ravat hezap ev.” Pot parun mañah.

Maras hori hehap batin batak

Matiu 12:9-14; Mak 3:1-6

⁶Met paru Zudaholoz gogot nat heh-aliz mod nasik Iesu parum topour zeimakeh lokat añarabon ñetiv mañohot het etehan, aban mar giñas bel ravat ñomat heh-nap poek emat heh. ⁷Tahan Parisi abanari, ma aban ñeti kateñiz mañairahol emat hehaek Iesun etet kil pot homeoh, Met darim gogot nat-aliz epesik peti pi aban okop gogot tat batin batapan, ma tair? Met pi pot tapan, povoz dari pi ñevok bizak. ⁸Pot paru homeohan Iesu parum homeoh-pov zuam hodad tat pi aban maras bel ravat hehapun epat mañah, “Ni bal hat ev emat rouv.” ⁹Pot mañahan aban pop em rouvat hehan Iesu aban mod pimaz pot homet etet heh-porin epat at mañah, “Met Mosesiz menahan hez-poñ baval hat tovai darim gogot nat hez-alizañik dari modari meñizat tin metohok, ma am et mereet hekan horiam hepan?” ¹⁰Pot mañahapuh aban porin et bameet hehapuh aban maras bel ravat hehapun epat mañah, “Erom, nim maras tu haz mee.” Pot mañahan aban pop pim maras tu hez meehan tin ravah. ¹¹Met pot Iesu mañahan tahavoz paru etet kaev ravat gitait ravahapuh nae nap epat mañah, “Dari aban akap tair metak?”

Iesu pim mañairahol 12 bamain batak

Matiu 10:1-4; Mak 3:13-19

¹²Met pot toohaekanañ Iesu aliz nasik dañ navok sat mañ hahot hehan kutur ravat maot al tezah. ¹³Tahan Iesu pim mañairooh-añarab

ahovokaron as hahan pim nakoe em topourahan, paruhanañ abanari 12 bamain batahapuh aban poriz abatao aposor pot mañah. ¹⁴Met aposor mañah-aban poriz abatañ ev,

Saimon, met Iesuhö pim abat modao Pita mañah-pop,
met pim bosip Anduru,
met Zemisir,
Zonir,
Pillipir,
Batolomiur,

¹⁵ Matiur,

Tomasir,
met Zemis modap Alpiasiz ropur,
Saimon modap, pi Selot porihanañ nap.^c

¹⁶ Met Zudas Zemis modapuz ropur,

Zudas Iskeriot, pi tokat Iesu bapanez bar mañat mañairahap.

Paru pori ba ou batah.

Añarab ahovokaro batin batah

Matiu 4:23-25; Mak 3:7-12

¹⁷Met pot tahapuh, Iesur mañairooh-abanari 12 pori dañ povok hehaekanañ irih gup atvat navok er horat hehan, poek pim ñetiv mañoooh-añarab ahovokaro heh. Met añarab modari Zudia zeisikanañ nari, ma Zerusalem zeï potakanañ nari, ma iv havevoz totoi Taiar Saidon zeï ahö potakarohanañ nari, añarab ahö povokaro amun map emat poek heh. ¹⁸Met paru poriz nari Iesu ñetiv hahopenan hatevetehopanez hat emooh, met nari lamao tat hehari, ma pituhol menat hehari batin batohopanezam hat bat emooh. Toohan pi mapori batin batoooh. ¹⁹Met paru mapori batin batohopanez kezao ahö Iesuh heh-pot paru hodad, povoz pim nakoe emat parum marañ piih ut urat tin ravapanez hat rez kin kin tooh.

Iesu ñeti navor nao mañah

Matiu 5:1-12

²⁰Met Iesu pim mañairooh-abanarin etet epat mañah,

“Met ari nonair naitü bonori, God arim koravopuz masakavoz roketak hakez, povoz ari non biñavonañ hepekezaoroh hasameg.

²¹ Met ari petev gin ñomat hezari, biñavonañ hepekez non pooroh ari hasameg. Pot haravat hez. Met God eñizohopenan ari rekö ravat hepek.

^c **6:15** Pavar 15 -Met Selot mañah-pori Roma ñai aban patari parumaz korav ravat hehaek, sapanen parum zeis maot parumauhö korav ravat hepenez kilam gogot toohari ok.

Met ari iñir zakep tamegiri, ari biñavonañ hepekez non pooroh hasameg. Pot haravat hez. Met tokat ari maot biñ ravat kek hahopek.

22 Met ari ne Añaraboz Nanepuz ñeo baval hat tovai sohopeken añarab modari arim tohopekezavon etet batiu tiu batovai hori etovai arimaz ñeti moregañ hat paru, ‘Hori tamahari ok,’ pot hahopanez porah arim loporizaroh am biñavonañ hepek.

23 Met batam Godiz propet abanari tin tovai emoohan aban pot ari etohopanez añamoh-poriz izaholohö paru hori ahoñ metooh. Met povoz zut paru ari etohopanen, tokat abarah God hañ tinao ari anapanen bepekez homet biñ pimau ravat hezei.

24 Mai zakep, ari monir zeirurum ahotunañari petev potuz biñ ravat, Dei tin tovai sameg, pot homeameg, oñ tokat abarah ari biñ ravat tin naketü.

25 Mai zakep, ari petev gipiz nat ñequeo hatat hezan tovai samegiri, tokat giñaz map hori ravepek. Ma ari petev kek hat biñavonañ tovai samegiri tokat ari zakep ahov tat ahoam iñ hahot hepek.

26 Ui mai zakep, met batam arim iz mimihol propet aban moregariz biñ ravat parum abatañ bat hel batat mañooh, met ganö parum moreg pori pot metoohavoz zut añarab modari arimaz biñ ravat arim abatañ bat hel batapanen, tokat parunañ honeo hañ horiñ ariti ou ravapan hezag, tinam homet hez.” Pot Iesu parun mañah.

Darimaz kaeveri masak metook

Matiu 5:38-48

27 Pot mañat maot epat mañah, “Met petev ari nem ñetiv hateveteamegirin epat añom, Met paru tairari arimaz kaev ravat hori etohopanezariz arihoen hañ kaev ravat hori metotunei, oñ tin metohozei.

28 Met tairari arim teri nai bat edemat bizat hepenezari, ma hori modañ etohopanez poriz ari God meñizohopanen hodad tinao maot bapanez hat piin mañ mañohepek.

29 Met nap nim girapotak nourapan, povoz ni hañ pi urotun, oñ girap modat rez maneken maot nourap. Ma tairap nim dim tamaravokap neteepanez pop nim dim modap amun bat manek.

30 Ma nap niuhö nai manek hazapanen ni bagiz gut totü, oñ am man. Ma mod napuhö nim nai pim bapanen tokat poi pi maot ni nanapanez mañotun.

31 Met arim modarihö tin tairao etohopanez ari homet zait tat hepekez potam paru metohozei.

32-33 Met añarab horiri parumaz zait tat hezariz masak metamah, met ari taput tat arimaz zait tat hepenez nenariz ari zait tat masak metohopek, povoz God ari pot metohopekezavoz hañ tinao anapane? Evo, ari hañ tinao naanotü. Met paru aban Godiz hodad nat hezari parum kapotak nenarinañ toutat ñetiv hahot hez, oñ modariz paru kaev ravat

hez. Met ari amun parum tamahat tovai ari patariz kaev ravat arim kapotak nenarinañ toutat ñetiv hahopek, povoz tin ravapane? Evo, tin naravotü. ³⁴Ma arim mod narihö natuz mañ añapanen hamanepekepuh maot paruhö tokat hañitü anapanez homepek, povoz God ari hañ tinao anapane? Evo, met paru Godiz hodad nat hezari taput tamah, oñ ari modari arim natü manat tokat paruhöz hañ natü anapanez hom namee hepek, povozahoh pi hañ tinao tokat ari anapan. ³⁵Met arim kapotak bonori ma arimaz zait nat hepanezari tin metohopek, ma nari natü manat hañitü paruhoen anapanez namañ hepek, povoz God pimauhö pot metohopekezavoz hañ tinao ari anapanen, pi map ahö ravat hez-popuz ñarohol ravat hepek. Met arim Pap pop tairari parumauz zaitivok hori nenañ tovai samah-pori amun pimauhö masakao paru am manamah. ³⁶Met pim paru pot metamahavoz zut mod hori etohopanezariz ari zakep tat tin metohozei,” pot mañah.

Añarab modariz tohopanezavoz an natotü

Matiu 7:1-5

³⁷Iesu pot mañat maot epat mañah, “Met ari modariz tohopanezañin etet an tat homehotunei, ma parum tohopanez nañin etet, ‘Horiv ok tah,’ pot zuam haotunei. Met modariz hori etohopanezañiz ari unun manat kos rez manohopek, povoz God amun zu taput etat arim tamegiñin etet an tat nakaotü, oñ arim hori tohopekez poñiz unun manat kos rez manohopan. ³⁸Met ari añarab modari meñizohot tairatuz paru tekü tohopanez potü manohopekezavoz zut God ari amun anohopan, oñ pi ari modariz manohopekez potam naanotü, oñ revah modañ bizat ahoam anohopan. Met arim modari naiz hahopanen naman tohopek, povoz God zu taput ari naanotü.”

³⁹Met Iesu navotü bavatat ñeti epov amun parun epat mañah, “Aban etañ kut tat hepanez napuhö aban etañ kut tat hepanez modap bat nonoron mañairapane? Evo, oñ parup houloñariv sesevok honeo edat sapan,” pot mañah. ⁴⁰Tat ñeti modao maot epat mañah, “Met aban hodadevonañ nap aban modarin ñetiñ badede mañohopanezaek pim irih het hatevetehopanez pori pi ritou nametotü, oñ paru pi hahopanen hodadeo bovai sohohahoh tokat bon tapanez porah mañohopanez popuz hodadevoz zut pihoen hodadeo bapan.

⁴¹Met ni nap nim etavok et kulup ahot hezan, tairaiz nim modapuz etavok et kulup goerap lokat hezaekan eteameñ? Tat nim et kulup ahotaz hodad nat, ⁴²oñ nim modapun pot mañameñ, ‘Erom ae, ni kil heken ne nim et kulup goe okarap banevetem.’ Pot ni moreg okov mañameñipun epat nañom, Met garos nimaüz etavok et kulup ahot hezaek bavetet tin etekepuhoh, rekot nim modap meñizat pim et kulup goerap hepanezaek ba mevetek,” pot mañah.

Zi tinameder horimedez ñetiv*Matiu 7:15-20, 12:33-35*

⁴³Met Iesu ziñiti bavatat ñeti modao epat mañah, “Met zi tinamedek ul horiñ badapane? Ma zi horimedeke zi ul tinañ badapane? Evo, pot bon, ⁴⁴oñ dari zi ul tinañin etet, ‘Zi tinamed ev,’ pot hameg, met zi ul horiñin etet, ‘Zi horimed ev,’ pot hameg. Met bi mabororepek rekot tiompos uloñ navadotü, ma zen zen betezañik zi ul tin nakaz nañ navadotü. ⁴⁵Met zi ul poñiz zut aban napuz loporih tairao an pap manat hez-pov gizasikanañ bar haz beteamah. Met aban tin nap pim loporihanañ home tinao hepanezaek ñeti tinañ hahopan, oñ aban hori nap pim loporihanañ home horiv hepanezaek ñeti hori nenañ hahopan,” pot mañah.

Zeimakezaro demahavoz ñetiv*Matiu 7:24-27*

⁴⁶Met pot mañat Iesu maot epat mañah, “Met tairaz ari nemaz, ‘Deim Amip, deim Amip,’ pot nañameg, oñ ari pot hat nem ñetiv hatevetet baval nak tameg? ⁴⁷Met ari nem hamoh-ñeti epeñ hatevetet baval hahopekez pori tairavoti zut tat añom? ⁴⁸Met aban hodad tinavonañ nap pim zeimak demapanez garos pi ham kez tinarah hamauruñ kedet bahahav kez bareñ dao hat zeimak demapan. Tapanen teptep ahov haret urohopenen ut ahov pelohopenen iveri ñai reehopanepuh, zeï pomak kezao pi bahahav bareñat tin demapanen hepan, povoz ba naedotü. ⁴⁹Met ari nem hamoh-ñeti epeñ hatevetet baval nak hepekez pori tairavoti zut tat añom? Met aban kut nap pim zeimak demapanez hat apor pap tat bahahav helok bareñapanepuh zeimak demapanen hepanen, teptep ahov urohopenen ut honoñai ahov pelohopenen iveri ñai rezat emat zeï pomak bareñ edapanen, map hori ravapan,” pot mañah.

Roma gog aban nap batin batah*Matiu 8:5-13*

7 ¹Met Iesu parun ñeti poñ map mañat bon tat Kapaneam zeitak maot sah. ²Met poek Roma ñai abanariz ahö napuz gog aban pim zait tat heh-nap ñomapanez lam ahov tat oraeh. ³Met Iesu emat poek heh-ñetiv ahö pop hatevetet Zuda aban korav narin Iesu emat aban pop batin batapanez mañat asiv meehan, paru Iesuhaz sah. ⁴⁻⁵Tat epat ahoam bar mañooh, “Met Roma aban ahö nap pi aban tinap, dari Zudaholoz zait tat tin etamahap. Tat pi deim topour zeimakez homet monis bizahan Kapaneam zeï epatak demahan hez, povoz ni sat pi meñizat pim gog abanap lamao tat hezaek batin batekez hat ev emeehan emeg.”

⁶Pot mañat Iesu bavizat paru honeo aban popuz zeimakez totoi honoohan Roma aban ahö pop pim hat nari asiv meehan Iesu soohaek

emat pim hahat zu epat mañah, “Met Roma aban ahö pop epat niin nañakaz hat emeehan dei ev emeg. Met pi aban horivonañapuz zeimakeh ni tinap rekot sa nalokotü. ⁷Met tair tat pi horip ni tinapuhaz ev nonoroh emameñiek emapan? Oñ epekam het ni ñe nenaohaken pim gog abanap tin ravapan. ⁸Met pi pim ahö ravat hezariz irih het parum mañamahat tamah, ma pim irih ñai aban modariz pi korav ravat hez. Tamahaek poriz napun epat mañamah, ‘Ni ok sa,’ hamahan am pim hamahaek samah, ma modapun, ‘Ni ev em,’ pot mañamahan am emamah, ma pim gog aban napun gog nao tapanez mañamah-porah pim mañamahatam am tamah. Met povoz zut ni ev het ñe nenaohaken pim gog aban popuz lamao bon tapanen tin ravapan. Pot niin nañakaz hat dei emeehan nihaz emegit ok nañeg.” ⁹Pot hahan Iesu aban popuz ñetü hahavoz hatevetehapuh pi homehot het añarab pinañ honeo sooharin epat mañah, “Met rotap aban pat akap nemaz homeo badae batah-akavoz zut Israel añarab nemerih ne gogot tovai emohoeok pot navon ne et narë.” ¹⁰Pot mañahan aban asiv meehan emoohari borourat zeimakeh maot sat etehan aban lamao tat hehap tin haravat heh.

Rop ñomahan baviriri batah

¹¹⁻¹²Met tokat zei nataz abatao Nein zei potak añ nap abup ñomahan hapurip paru rop nen hehapuh met rop ñomahan añarab paru zei potak hehari añ non pop meñizat aban rop basat baveirapanez hat bat temeraz haitokoroh hareohan Iesur pim mañairooh-abanarir añarab ahovokaro honeo paru zei potakaz emahan paru nae nap bavizah. ¹³Met bavizovai Iesu añ popun etet pimaz zakep tat epat mañah, “Eñarim ni iñ haotun.” Pot mañahapuh ro ñomahap bi tav tavasik bat emoohaek Iesu maras bizahan aban bat emoohari gaa tah. ¹⁴Tahan Iesu aban ro ñomahapun epat mañah, “Erom, bal haz.” ¹⁵Pot hahan aban rop bal hat ñeo hahan Iesu ropuz marasiz bat añ nonop manah. ¹⁶Tahan añarab parunañ honeo emoohari etet ñaihetivonañ honeo dei dei horiv tovai Godiz biñ ravat epat nae nap mañah, “Met Godihö darimaz zakep tahapuh eñizapanez hat propet aban ahö epop meehan darim ñaravatak emahap ev.” ¹⁷Pot hat añarab ñetü Iesuz tah-pov nae nap mañovai soohan Zudia zeisik ma zei modasikaroh map ahö ravat sah.

Zoaniz mañairañariv Iesuhaz meeh

Matiu 11:1-19

¹⁸Met Zoan ivoh memeohap kakam zeimakeh hehan pim mañair abanari Iesuz tovai sooh-ñetü povon hatevetet sat piin bar mañah. ¹⁹Tahan Zoan pim mañairooharihanañ nañariv meeapanen sat Iesun epat mañapanez mañah, “ ‘Met tokat nap emapan, pot menahan hezan dei ñai bizat etevai samegig, ni tapupu? Ma mod nap tokat ok emapanez dei ñai

biit etet hek?’ Pot at mañei.” ²⁰Pot pi mañat meehan aban poñariv Iesu hehaek sa berevat epat mañah, “Zoan ivoh emeoh-popuhö dei epat niin at nañakaz hat emeehan ev emeg. ‘Met tokat nap emapanez menahan dei ñai bizat etet hezag ni tapupu? Ma mod nap tokat emapanez dei etet hek?’”

²¹Met pot parup sat Zoaniz hahat Iesun mañooh-porah pi añarab ahovokaro lam ahoñ tat hehari batin batooh, ma pi paruh pituhol menat hehaek ahoam ruoh, ma etañ kutari etañ batin batoohan paru eteoh. ²²Povoz Iesu parupin ñeti hañiv epat mañah, “Met arip sat Zoanin petev nem tamohon etet hateveteameg-epeñiz bar mañei. Met paru etañ kut tat heharir, eñañ hori ravat heharir, aban obuloñ pohao tat heharir, hat koveñ unun manat heh-pori, map batin batamohovoz ñetiv, ma ñomamahari maot baval hamohovoz, ma añarab, ‘Dari hori hezaek tairap eñizapan,’ pot hahot hezari Godiz baiñetinao hateveteamahavoz ñetiv, map nem tamohon eteameg-epeñiz ñetiñ sat piin bar mañei. ²³Met tairap nem tamohovoz homet, ‘Rotap emapanez hah-tapup ev, pot homet lop houlorizaronañ naketuz pop pim loporih biñ ravat hepan,’ pot sat piin mañei.”

²⁴Pot mañahan parup sahan Iesu Zoaniz ñetiv añarabon epat mañah, “Met batam Zoan ham betez nonair nai bon heh-narah hehan, ari poek tair tohavon etepekez hat soog? Met havos teptepivok ba saem tamahavoz zut aban betez napun etepekez hat soogi? ²⁵Ma aban nap dimir giv tinatü tat hehapun etepekez hat soogi? Evo, pot bon, met paru dimir giv tinatü tat hezari zei ahö tinañik hez, oñ ham betez narah pori nakez. ²⁶Ma ari Godiz propet aban napun etepekez hat soogi? Met rotap ari sat Godiz propet abanapun eteog, met piuhö propet aban modari map ritou metat hez. ²⁷Met batam Godiz propet aban napuhö Zoan emat tohopanez ñetiv epat menahan hez,

Hatevetei, nem ñetiv hahopanezap meeman pi garos ravat emat nim nonor ba oñ bathopan. *Malakai 3:1*

Pot menah. ²⁸Met rotap epat añoman hatevetei. Met Zoan piuhö nem nonor ba oñ batah, povoz pi aban ahop ravat het añarab mod mapori ritou metat hez, oñ añarab God parum koravopuz masakavoz roketak hepanez pov ou ravapanezaek añarab tairari masak povok hepanez porihö Zoan ritou metat hepan.”

²⁹Met pot Iesu haohan paru takes monis boohari, ma añarab modari garos Zoan ivoh memeoh-pori hatevetet epat haoh, “Met rotap God non tinaorö petev darin añairamah,” pot haoh, ³⁰oñ Parisi abanarir aban ñeti kateñiz mañairahol hatevetet ivoh memeepanen, Godiz nonoroh sohopanez kaev ravat kos rez manat heh.

³¹Met Iesu maot epat mañah, “Ari petev hez-eperiz tamegivoz tairavoti zut tat haom? ³²Met ñaro daparih het ekerë tamahariz zut ari tameg.

Met ñaro poriz narihö biñ ravat tenaveñ urovai modarin epat mañamah, ‘Met ari emepeken deinañ honeo daat mezak.’ Pot mañamahan mod pori kaev ravat epat hamah, ‘Evo, dei kaev.’ Pot hamahan tapurihö maot iñ mazamañ haovai mod porin epat mañamah, ‘Ari emepeken dari honeo het iñ mazamañ haovai iñ haok.’ Pot hamahan mod pori maot kaev ravat epat hamah, ‘Evo, dei iñ mazamañ haovai iñ haokaz kaev raveg.’ Met ari petev hezari ñaro poriz zut tameg. ³³Met Zoan ivoh memeohap emahapuh, pi goerahanañ pohao bain ivov nain heh. Tat porah karah pi gipiz nainotuz ahaohat hehan ari etet ñaroholotï zut tat añohovoz zut pimaz kaev ravat, ‘Pitup menat hezan pi rumurat okat tamah,’ pot ari pimaz haog. ³⁴Oñ ne Añaraboz Nanep emat gipizor bain ivov nohot hezan ari etet ñaroholotï zut tat añohovoz zut ari kaev ravat nemaz pot hameg, ‘Aban epop pi gipizor bain ivov ahoam nohot pi aban takes monis bamaharir horï tamah-modarinañ ñod reet hez,’ pot nemaz hameg. ³⁵Met Godiz hodad tinao ari bat hegitin dei Zoaniz tin hodad teg narab, oñ ari pot nat, kut hez.” Pot parun mañah.

Iesuz eñañik ueriv ur memelah

³⁶Pot hat bon tahan tokat Parisi aban nap gipiz bareñat Iesur modariz as hahan sat pim zeimakeh paru toutat gipiz tezat nooh. ³⁷Met parum zeipotak añ horï tooh-nap hehaek Iesu aban popuz zeimakeh paru toutat gipiz nooh-ñetiv hatevetet pi sat ñerë nao helevonañ matut tat uer ulagï tinao mañar meehan hehaek zum tat basat gipiz noohaek lokah. ³⁸Tat Iesuz eñañiz totoi rouvat iñ hahot hehan esoroñ Iesuz eñañik ñodoohan pim gag tae tovetanañ tok rizat olohot het eñañik tot novai uer ulagï tinavonañ pov baouzourovai ur memelooh.

³⁹Met pot tohot hehan Parisi aban Iesu emat paru gipiz napanez as hahpop etet pot homeoh, Añ epop pi horï tamahap ev, oñ aban epop Godiz propet aban naputin añ epopuz horï tamahavon hodad ravat meehan sah narab. ⁴⁰Pot homeohan Iesu aban popuz homeh-povoz hodad tat epat mañah, “Saimon, deip ñetï nao haopain.” Pot hahan Saimonihö epat mañah, “Añairameñip ae, haken ne hatevetem.” ⁴¹Pot mañahan Iesu pim pot homeohavoz homet ñetï epov epat mañah, “Met aban nap monisinañap hehapuh pi aban nap monï 500 kina manat aban mod nap monï 50 kina manat parupin pot mañah, ‘Tokat nem monï okosiz hañis arip ne nanepek.’ Met pi pot manat mañahapuh sah. ⁴²Met sat hehaekanañ tokat pi maot emat pim monisiz hañis bapanez hat monis manah-poñarivin as hahan emat monï hañis manapanezat rekot bon, povoz parup pap tah. Tahan aban monis manahap parupimaz zakep tat pot mañah, ‘Met arip monis bonoñariv, povoz nem monis maot ne navotü, oñ am sat hezei.’” Met ñetï pov hat Iesu Saimonin epat at mañah, “Saimon, ni tair homeameñ, monis manat maot navotuz hahapuz aban poñarivihanañ tairap ahoam pimaz

zait tat homeme heh?” ⁴³Pot at mañahan Saimon homet epat hah, “Aban monis ahoam manahan hañis naman tahap pimaz zait tat homeme heh batah.” Pot hahan Iesu hañiv epat hah, “Rotap ok hañ.”

⁴⁴Pot mañahapuh Iesu havee tat añ popun etet Saimonin epat mañah, “Erom, añ epopuz tin netamahavon et hareeñi? Met nim zeimakeh lokohon ni dari Zudaholoz tamegit tat nem eñañ ivoh nevetepanez nim as rohohon namañ, oñ añ epop pim esoroñinañ nem eñañ ivoh betet gag tae tovetanañ olamah. ⁴⁵Met ne emohon ni ba noupiti tot nanein, oñ añ epop nem eñañik ahoam tot neinohot hez. ⁴⁶Met darim tamegit nem gagavok ni ueriv ur nanemel teñin, pi uer ulagi tinavonañao bat emat nem eñañik ba ozourat ur nemelah. ⁴⁷Povoz ne niin ñeti nao nañoman hatevet. Met añ epop nemaz zaitiv ahoam tat hezag et hareeñi? Erom, pim horiv ahoam hehaek haoloh. Oñ napuz horiv aviam olohomaz-pop pi nemaz aviam zait tapan.” ⁴⁸Pot Iesu Saimonin mañat añ popun epat mañah, “Nim hori tooñiv map haoloh.” ⁴⁹Pot hahan mod pinañ honeo het gipiz nohot heh-pori parumam pim pot hahavoz kaev ravat nae nap epat mañah, “Met aban epop tair heripuhö añ epopun, ‘Ne nim horiv haoloh,’ pot mañah?” ⁵⁰Pot haohan Iesu añ popun maot epat mañah, “Ni nemaz homeo badae bateñ, povoz ni hori heñiekanañ Godizap maot haraveñig, bal hat lop tinarinañ sohoz,” pot mañah.

Iesunañ añ sohariz ñetiv

8 ¹Met pot tat tokat Iesu God darim korav ahopuz masakavoz roketak hekaz ñeti tin pov zei ahö potak katak ma zei goe modañik mañovai sooh. Tahan pim mañairooh-abanari 12 pinañ honeo paru sooh. ²Met añ narih garos pituhol menat hehan Iesuhö ruah-pori, ma lam modañ tat hehan batin batah-pori amun parunañ honeo sooh. Met añ poriz napuh pituhol 7 menat hehan Iesuhö ruat batin batah-popuz abatao Maria pi Magdala zeitakanañap. ³Met añ modap amun Erodiz gogotaz koravop Kusaz añañ pim abatao Zoana, met añ modapuz abatao Susana, ma añ modari amun paru honeo soohaek añ map pori parumauz moniñinañ gipiz bat bareñat Iesur pim mañairooh-abanari tez manovai tin korav ravat sooh.

Aban nap uit biñ avasik beteh-ñetiv

Matiu 13:1-9; Mak 4:1-9

⁴Met paru soohan zei ahö natakarošanañ añarab ahovokaro Iesuz nakoe emat topourat hehan Iesu uit biñiti bavatat ñeti nao parun epat mañah, ⁵“Met aban nap uit biñ avasik betepanez^d hat basah. Tahapuh pi bi poñ betevai

^d **8:5** Pavar 5 -Met parum toohat uit bi poñ darim ñedeamegivoz zut nañed, oñ hamarrah betevai sat em toohan berevooh. Met Mak 4:1-9 akopun eterë.

soohan bi nañ nonoroh ñodahan añarab sat em toohari bi poñ mezovai sat em tooh, ma idehol arat emat toutat amun nooh. ⁶Met bi mod nañ helevoz revah hamar aviam hehaek ñodah. Tat poek berevahapuh hamar haleñaiv bon, povoz maot zuam ñu ravah. ⁷Met bi mod nañ zen zeneñ hehaek ñodat poñinañ honeo berevahapuh zen zen poñihö ahö ravat bamezahan uit uloñ navad. ⁸Met bi mod nañ ham haleñai tinarah ñodat tinam berevahapuh uloñ ahö mapoam badat heharopok 100, met modañik amun 100 ahoam badah.” Met Iesu ñeti pov mañat añarabon epat mañah, “Met ari hat koveñinañari okeg, nem hahö-epovon hatevetet tinam hodad ravei,” pot mañah.

Iesuz borë ñetiñiz kapotaz at mañah

Matiu 13:10-23; Mak 4:10-20

⁹Pot mañahan pim mañairooh-abanari ñeti povoz kapotaz basat em tat piin at mañah. ¹⁰Tahan Iesu epat parun mañah, “Met Godiz masakavoz roketak hepekez nonor iz ravat hezaek petev ari nenari pimauhö hodadeo anamah, oñ paru modarin nañir nañiti bavatat mañamohovoz kapot ev. Paru etañinañ et hareamah, oñ tin et narë hez, ma hat koveñinañ hateveteamah, oñ paru kapotaz tin hodad narav hez,” pot mañah.

Uit biñ beteh hahavoz kapot bar mañah

¹¹Tat maot epat mañah, “Met ñeti añoh-epovoz kapot ev, met Godiz baiñetinavoz uit biñiti bavatat ok añoh. ¹²Met bi nañ nonoroh ñodat oraehan idehol emat nah-pot añohoñiz zut añarab nari Godiz baiñetinao hateveteamahan Seten emat ganö paru baiñetinao tin hatevetet homeo badae batapanen God paru maot pimeri bavatapan hezag, Ne paru pim ñetiv hateveteamahaek maot baveteman paru Godiz homeo badae navat hepan. Pot homet baveteamah. ¹³Met bi nañ helevoz revah ñodat berevat zuam ñu ravah, pot añoh-poñiz zut añarab nari Godiz ñetiv hatevetet zuam biñ ravat bahorë hat hez, oñ medeñeñ revah moruat heh añoh-poñiz zut parum loporizaroh ñeti pov tin naviz, povoz honoñai povor kao paruti ou ravamahan ñeti povoz kaev ravat beteamah. ¹⁴Met bi nañ zen zeneñ hehaek ñodat berevahan bamezah, pot añohoñiz zut añarab nari Godiz ñeti povon hatevetet bat tovai parum ham heriñiz tohopanezat ahoam homeamah, ma moniñir nonair naiz ahoam homeamah, povoz parum loporizaroh tin hepanezao ou narav hez. ¹⁵Met bi nañ ham haleñairah ñodat berevat ul tinañ badah, pot añohoñiz zut añarab nari Godiz ñetiv hatevetet parum loporizaroh tin bizat het ñeti povoz hahan hezat baval hat ul tinañ badahavoz zut paru rez kek tat tin tovai samah.

Ramuñad ba iz navatotü

Mak 4:21-25

¹⁶Met aban nap pim ramuñad rañizat kohat hapisiz giruvok, ma arusiz irih ogolerah bizat ba iz batapane? Evo, rekot pot natotü, oñ pim

ramuñad ourah badapanen ñadohot al tezat hepanen añarab mod kohat emat hepanez pori alizavok tin het etohopan. ¹⁷Met petev Godiz ñetivov kapot iz ravat hezaek añarab hodad nat hez-mapoñ tokat piuhö ba ou batapanen paru hodad ravapan.

¹⁸Met ne ñetiv hamohon ari hateveteamegiek tin homet tovai sohozei. Met tairap Godiz ñetivon hatevetet bat hepanez pop revah piuhö hodad modao manapanen pim loporih hodadeo ahö ravohopan, oñ mod tairap pim ñetivon hatevetet homet zait nat hepanez pop Godihö hatevetepanez pov maot pimau bapanen pi kerë hapan,” pot mañah.

Iesuz nonopur bosihol emahan hahat ev

Matiu 12:46-50; Mak 3:31-35

¹⁹⁻²⁰Met Iesu añarabon pot ñetiv mañovai soohan narah pim nonopur bosihol pihaz emahan añarab ahovokaro zeï pim heh-pomakeh kohat lokat pi balopotak batat atalip tat hehan pim nakoe emapanez paru bapap tah. Povoz iñidoh hehan nap kohatihanañ parun etet Iesun epat mañah, “Erom ae, nim nonopur bosihol niin etepan hat iñidoh ev emat gaa tat hez.” ²¹Pot mañahan Iesu parun epat mañah, “Rotap pi ok hah, oñ añarab tairari Godiz ñetiv hatevetet baval hat hezari nem nonoholor bosihol ravat hez,” pot mañah.

Iesu hadao bagaa batah

Matiu 8:23-27; Mak 4:35-41

²²Met aliz nasik Iesur mañairooh-abanari boutitak helat pi parun pot mañah, “Erohol ae, dari iv havë epovoz okatasiti sak.” Pot mañahan paru hatevetet boutitak helat sohot, ²³Iesu au gom metahan au orat hehan had ahov iv havevok haret patao urooh. Tahan iv haveo ñai mol mol hat boutitak ivov kohat lokat beo reehan havevok er horat paru emiv elat ñomapanezat ravah. ²⁴Tahan pim mañairooh-abanari sat Iesu bazageri metahapuh epat mañah, “Deim ahop ae, dari totoi ev havevok er horat emiv elakaz tegig, ni bal haz.” Pot mañahan Iesu bal hat hadavor haveo ñai toohaek bon tapanez mañahan had ahö urooh-pov bon tahan haveo maot pim hehat ravah. ²⁵Tahan Iesu parun epat mañah, “Met ari nemaz homeo tin badae navat hez.” Pot mañahan paru ñaihet tat home midin tahapuh parumam epat nae nap mañah, “Ae, pi hadavor iv havevon mañahan pim ñeo hatevetet zuam hahat tat bon tahag, aban epop tairap ev?”

Pituhol menat hehap batin batah

Matiu 8:28-34; Mak 5:1-20

²⁶Met Iesur mañairooh-abanari boutitak helat Galili zeisikanañ iv havevozañ soohaek okatasiti sat Gerasa añaraboz zeisik sah. ²⁷Tat paru

poek berevat Iesu boutitakanañ er horahan zeï potakanañ aban pituhol menat heh-nap haret Iesu bavizah. Met aban pop orah rezah dimir giv nat barekap het zeitak nakezap, oñ pi mosik ñomoohari baveirooh-poek sat heh. 28-29 Met aban pop pituhol menoohan rumurooh-aliz poñik pim heris bahorï batapan hezavoz aban modari pim eñar marah bi kezañir seniñinañ demat beteohan oraet orah rezah pi bi poñ bavilat beteohan pituholohö ham ñai ñai betezarah maot bat sooh. Met aban pop Iesu bavizahan pi zuum pitü aban popuh menat hehapun epat mañah, “Ni aban epop betet berevat pataek sa.” Pot mañovaïam aban pop pim eñañik rariñ rez bareña^e ñeo ñarah hat epat hah, “Iesu God mapori ritou metat ahop ravat hezapuz rop, ni ne tair netekë hat ev emeñ? Erom, ni ne kakamao netotü, pot ok nañamoh.” 30 Pot hahan Iesu aban popun epat mañah, “Erom, nim abatao haz.” Pot mañahan aban pop pituhol ahö piïh heh, povoz hañiv epat mañah, “Met dei ahovokaro hez, povoz nem abatao Ahovokaro.” 31 Pot mañahan pituhol Iesun kezao epat mañah, “Ni dei pohao hañ horiv etohopanen horï ravakazaek sakaz añotun.”

32 Pot mañovai etehan bolohol ahoam totoi daparavah sisiñiñ nohot hehan pituhol parun etet Iesun epat mañah, “Met ni dei emeeken sat bol akarih lokak.” 33 Pot hahan Iesu parum hahat tat meehan pitü pori abanap betet sat boloholok lokah. Tahan bolohol daparavazañ porü hat sat kohat iv havevok ñodat emiv elat ñomah.

34 Met aban boloholoz koravori pot tahavon etet paru porü hat sat parum zeï potakaroh añarab heharin ñeti pov mañovai sahan 35 añarab aban pituhol menat hehan ruahan sahap, “Taek hez,” pot hat etepanez emah. Met emat etehan aban pituhol menat hehap pim hodadeo tin ravahan pi dimir giv tinatü tat Iesuz nakoe toutat hehan añarab emat piin etet ñaihet tat agol atat heh. 36 Met Iesu pot tahan etet heh-porihö añarab modari emahan aban pituhol menat hehap batin batahan tahat-ñetiv parun bar mañah. 37 Met Gerasa zeï posikari paru mamog pot navon et narë heh, povoz ñaihetiv horiam tahapuh Iesu parum zeï pos betet zeï mod nasitï sapanez mañah. Tahan paru zeï pos betet boutitak helat sapanez toohan, 38 aban pituhol menat hehan baverevah-pop emat Iesunañ honeo sapanez mañahan Iesu piin epat mañah, 39 “Evo, ni deip honeo nasotü, oñ nim zeitak sat God ni tin netahavoz ñetiv añarabon bar mañohez.” Pot mañahan aban pop maot borourat pim zeitak sat Iesu pi batin batahavoz ñetiv añarab poekarin map bar mañooh.

Añ napur ñariñ nap batin batah

Matiu 9:18-26; Mak 5:21-43

40 Met Iesu poekanañ maot boreurat Galili zeisik mamog pim hehaek sahan añarab pimaz gaa tat ñai bizat etet hehari piin etet biñ ravat

^e 8:28-29 Pavar 28-29 -Met porah aban korav ahop hehan pim irih hehari piin ñetiv mañapan tin hatevetepanez hat pim totoi emat rariñ rez bareña^t

heh. 41-42 Met poek aban Zudaholoz topour zeimakez korav ahop ravat hehapuz abatao Zairas pop pim ñari nenap ñomapanez tahan pi Iesuz nakoe emat rariñ rez bareñat ñarip batin batapanez kezao epat mañah, “Ni nem zeimakeh emat nem ñari nenap batin batekez zait tat ev emat nañoh,” pot mañah. Met ñari popuz krismasañ 12 ravat heh.

Pot mañahan Iesu Zairasinañ parup nonoroh soohan añarab ahovokaro pim okat epat rouvat pi balopotak batat sooh. 43 Met porihanañ añ nap pi krismasañ 12 poñik uveo meehot lam zeitak koravori pi batin batapan hat sooh, oñ pi tin narav, am heh. 44 Met añ pop pi Iesuz kosimarah emahapuh pim dimipuz tetemarah ut urahan pim uveo meohaek zuam bon tah. 45 Tahan Iesu paru maporin epat at mañah, “Met arihanañ tairapuhö neeh ut noureñ?” pot hahan paru mapori, “Evo, dei niuh ut nanour,” pot hahan Pita Iesun epat mañah, “Erom ae, añarab ahovokaro ev nim okat epat emat map ni ba atalip netat het ni ok ut nouramahag, tairaz ni okat hameñ?” Pot mañah. 46 Tahan Iesu epat mañah, “Evo, nap neeh ut nourahan nem kez nao piiti sahan ne hateveteohö, povoz arin ok at añoh.” 47 Pot hahan añ pop, Iesu hodad hatat ok hah, pot pi homet dei dei tahapuh emat Iesuz eñañik ñodat pim tohot emat piuh ut urat tin ravahavoz kapot bar mañahan añarab pim okat epat hehari map hateveteh. 48 Tahan Iesu piin epat mañah, “Eñarim, nim homeo neohö batin navatomaz ni homeo badae bateñ, povoz ni tin haraveñig, lop tinarinañ sohoz.” Pot añ popun mañah.

49 Met Iesu pot mañovaiam Zairasiz zeimakehanañ aban nap emat Zairasin epat mañah, “Erom ae, nim ñarip hañomahan ne ev emohog, ni darim añairamahap betez bavizat emameñ.” 50 Pot mañahan Iesu hatevetet Zairasin epat mañah, “Erom, nim loporih honoñai totun, oñ nemaz homeo badae bateken dari sakan nim ñarip maot bal hapanezap ok.” 51 Pot mañat paru Zairasiz zeimakeh sah. Tahapuh Iesu añarab pinañ sooharin, “Epek hezei,” pot mañat bagaa batahapuh Pitar Zemisir Zonir ñari ñomahapuz nonopur papap nenam pinañ lokapanez mañahapuh paru zeimakeh sat lokah. 52 Tahan ñari añ popuz kapotakari iñir zakep tohot hehan Iesu parun etet epat mañah, “Evo, ñari okop nañom, oñ pi ok au unun orat hezag, ari tovai ahoam iñ haotunei,” pot mañah. 53 Tahan añarab hatevetet ñari pop rotap hañomah, pot paru hahomet heh, povoz Iesuz hahavoz paru kek mui ahoam tohot heh. 54 Tahan ñarip oraeh-zei girü povok Iesur pinañ honeo emah-pori sa lokat Iesu ñaripuz marasiz bat epat mañah, “Ñari epop, ni bal haz.” 55 Pot mañahan ñarip maot biriri ravat bal hahan Iesu paru pi gipiz manapanen napanez mañah. 56 Met pot tahavoz nonopur papap agol atat home midin tat hehan Iesu ah ñeo parupin epat mañah, “Met arip nem toh-ñeti epov tovai añarab modarin mañotunei.” Pot parun mañah.

Iesu pim mañairahol meehan sah

Matiu 10:5-15; Mak 6:7-13

9 1 Met narah Iesu pim mañairooh-abanari 12 poriz as hahan emat pim nakoe topourahan pituhol menat hepanezarir, lam modañ tat

hepenezari batin batohopanez kezao paru manah. ²Met pot metahapuh pi parun ñetiv epat mañah, “Met ari sat añarabon God arim koravopuz masakavoz roketak hepenez ñetiv bar mañovai lamari batin batovai sohozei. ³Met ari sohopekez hat arim heriñ tin metohopekez homet arim irañir kizovetur moniñir dim modarir gipizor potü tovai basotunei.” ⁴Pot mañat maot epat mañah, “Met ari sohot zeï natak sepeken añarab nari emat ari avat sat parunañ orepekez zait tat zeï tairañik avat sapanez poñikam lokat het gog ev au añat emeemaz toh-epañ tovai zeï modañik sa orotunei, oñ anohopanez poñikam hezei. ⁵Met zeï mod natak sat berevepeken añarab arimaz kaev ravat orohopekez zeï nañ naan tapan, povoz arim eñañik parum zeï potakanañ ham tomol moleo ñed bat hepenezaek teur betet zeï pot kos rez manat sepeken paru etet, ‘Ui, dari paru ganö meteg,’ pot hapan.” ⁶Met Iesu pot mañahan pim mañairooh-abanari sat zeï posik zeï potak katak añarabon baiñetinao bar mañovai lamao tat hehari batin batovai sooh.

Erod Iesuz ñetivon hatetet hahao ev

Matiu 14:1-2; Mak 6:14-16

⁷⁻⁸Met Iesuz pot tovai emooh-ñetiñ haohan hatevetet añarab nari epat haoh, “Zoan ivov emeohap maot birirĩ ravat bal hat hez.” Pot haohan añarab mod nari epat haoh, “Evo, propet aban Elaiza batam hehap maot birirĩ ravat bal hat hez.” Pot haohan mod nari epat haoh, “Evo, met Godiz propet aban batam heh-mod nap maot birirĩ ravat hez.” Pot paru Iesuz kapotaz main main haohan Erod Galili zeï posiz aban ahop hatevetet basat em tat heh. ⁹Tat pimam epat homeoh, “Met ne batam hahon paru Zoaniz gagai men elahan hañomah, oñ petev tairapuhö gogot tamahan ne pim ñetiv hateveteamoh?” Pot hat pi Iesun etepanez hat zait tat heh.

Iesuhö añarab ahov gipiz manah

Matiu 14:13-21; Mak 6:30-44; Zon 6:1-15

¹⁰Met Iesuz mañairooh-abanari soohaekanañ maot borourat emat Iesu bavizat parum tovai soohat ñetiv map Iesun mañah. Tahan pi hatevetet añarab mod mapori poek betet pim mañairooh-aban nenarinañ paru zeï nataz abatao Betsaida mañooh-poek sah. ¹¹Met paru poek sahan añarab ahovokaro paru sahao hatevete hapuh parum tokat sahan Iesu parun etet biñ ravat bat sa batahapuh parun Godiz masakavoz roketak sat hepenez ñeti pov mañovai, añarab lamari batin batohot poek heh.

¹²Met gitap bañodapanez toohan mañairooh-abanari 12 pori emat Iesun epat mañah, “Erom ae, dari mosik ev hezag añarab okorin mañeken zeï totoi demahan hez-okoñik sat gipiz bat napanepuh orap.” ¹³Pot mañahan Iesu parun epat mañah, “Evo, met povoz arihö etet gipiz natü paru manei.” Pot mañahan pim mañairooh-abanari epat

piin mañah, “Ae, met deim bereñ mar nas met pis honeñariv nenam ev oraezag dei sat parum gipiz napanez natü zum takaz hameñi?” Pot mañah. ¹⁴Met abanari 5 tauseniz zut hehan parum añaholor ñarohol amun poek togü manat hehavoiz homet mañairooh-abanari pot hah. Pot at mañahan Iesu pim mañairooh-abanarin epat mañah, “Ari añarabon mañepeken toguñ main main 50 naek, 50 naek, pot toutovai sap.” ¹⁵Pot mañahan paru Iesuz hahat mañahan añarab toguñ main main mañahat toutovai sah. ¹⁶Tahan Iesu bereñ mar nas met pis honeñariv bat abaran etet gipiz potuz Godin biñ mañahapuh gipiz pot bapezat mañair abanari manahan paru añarab manovai sah. ¹⁷Tahan añarab mapori nohot kaev ravahan kametü hov kitü 12 bizahan oraehaek bavelahan map beo rezah.

Pita Iesuz kapot bar hah
Matiu 16:13-20; Mak 8:27-30

¹⁸Met aliz nasik Iesu main ravat sat mañeo hahot hehan pim mañairooh-abanari emahan pi parun epat at mañah, “Met paru añarabohö nemaz homet tairap hamah?” ¹⁹Pot mañahan paru epat hah, “Añarab narihö nimaz Zoan ivoh memehap pot hamah, met mod narihö, ‘Elaiza batam hehap,’ pot hamah, met mod narihö, ‘Godiz propet aban batam ñomah-mod nap maot biriri ravat hez,’ pot nimaz hamah.” ²⁰Pot mañahan Iesu parunahoen epat maot at mañah, “Met arimauhö nemaz tairap hameg?” Pot mañahan Pita epat hah, “Ni Kristo, Godihö eñizekez au hahan hezap,” pot mañah.

Pi ñomapanez maot bar mañah
Matiu 16:20-28; Mak 8:30-38; Zon 12:23-26

²¹Met Pita pot hahan Iesu parun ah ñeo epat mañah, “Ari tovai nemaz hag-okat modarin bar mañotunei.” ²²Pot mañat maot epat mañah, “Met ne Añaraboz Nanep tokat aban tup ahomakez korav ahorir anumaihol bareñ elat mañaramahariz ahorir aban ñeti kateñiz mañairahol ne kos rez nanat kakam ahov netapan. Tat paru mod narin mañapanen ne navat ur noñomapanen, nevizapanen oraet aliz nasikaro bon tapanen zeirevaizasik maot baviriri navatapanen bal haom.”

²³⁻²⁴Pot Iesu parun mañat añarab ahovokaron epat mañah, “Met tairap nenañ emohopanez pop ne nemaiz zaitiv betet nem Papapuz hahat baval hat pim zaitivok samoh-povoz zut pi pop nem tamoh-epat tovai emohot pot homehopan, Met ne Iesuz zaitivok sohoman modari honoñai tairao netapanez, ma ur noñomapanez hapanen ne kaev ravat ñaihet tat pi navetetü. Pot nemaz homet emookez pop nenañ honeo pohao tin het hekë. Oñ nap pim heris tin hepanez homet ñaihet tapanez pop pi pohao tin naketü, oñ hori ravapan. ²⁵Met nap pi hamarrah nonair nai map hez-potü bat hepanepuh Godiz homet naketuz pop ñomapanen

pim nonair nai potuhö rekot pi tin hepanež meñizapane? Evo, potuhö rekot nameñizotü. ²⁶Met aban nap nemaz ma nem ñetiv hapanež kaev ravapanezap tokat ne Añaraboz Nanep nem alizavor nem Papapur enzoliholoz kezavor alizavonañ maot ou ravat eromazarah ne aban popuz kaev ravat piin et nareotü. ²⁷Met ari hatevetepeken ne rotap epat añom. Tokat ari eperihanañ nari nañom biriri hepeken, Godiz masakavoz roketak hepekez pov ou ravapanen etepekepuhoh tokat ñomepek,” pot mañah.

Iesuz heris pat ravah-ñetiv

Matiu 17:1-8; Mak 9:2-8

²⁸Met Iesu pot mañahan het au alizañ 8 bon tahan pi Pitar Zemisir Zon bavizat agarë dañ navok pi mañ hapanež hat paru sat heh. ²⁹Tahapuh Iesu mañeo haohan pim heris pat ravahan pim dimir giv map aer ravat het uasiz tamahavoz zut livaliv tooh. ³⁰⁻³¹Met pot tovaïam propet aban batam heh-nañariv Mosesir Elaiza Iesuz hehaek ou ravat paru honeo rouvat hehan parupim herisikaro amun aliz ahov al tezat livaliv toohan, Godiz hahat Iesu tovaï sohopenen Zerusalem zeitak ur ñomapanen tapanezat ñetiv paru nae nap mañohot heh. ³²Met paru pot hahot hehan Pitar pim modañariv au gom toohaekanañ maot etañ elat etehan, Iesuz alizavon eteh, met pim alizavonañ honeo aban mod poñariv rouvat amun hehan eteh. ³³Tahan aban poñariv Iesu betet maot sapanez toohan Pita pim tin hapanezao bon ravahan betezam Iesun epat mañah, “Deim ahop ae, dari ev tin hez-povoz biñ ravohog, rekot dei zei goe nañ nim namak, Mosesiz namak, met Elaizaz namak, pot demak.” ³⁴Pot mañovaiam unit abarahanañ erat paru bamezahan mañairooh-aban pori un potan etet ñaihet tat hehan ³⁵un potaz ñaravatakanañ ñe nao epat hah, “Met nem rop, arimaz hat ba ou batohop ok, povoz ari pim ñetiv hahopenen tinam hatevetehozei.” ³⁶Pot haovaiam unitar aban mod poñariv bon tahan Iesu main hehan paru eteh. Met mañairooh-aban pori poek tahan etehao mod narin namañ, oñ parum etehatam homet heh.

Pitup menat hehap batin batah

Matiu 17:14-21; Mak 9:14-29

³⁷Met paru dañ povok hehaekanañ zeit al tezahan Iesur mañairooh-abanari er horat añarab ahovokaro emoohan paru bavizah. ³⁸Tahan añarab poriz ñaravatakanañ aban nap ñeo ñarah hat Iesun epat mañah, “Añairameñip ae, ni nem ro epopun eterë. Met pi nem ro nenap ev, ³⁹oñ orah rezah pitü hori nap pi kezao menat baveteamahan ñodat ñeo ahoam hamahapuh hodadeo bavon batamahan tur tem tamahapuh pim heris teperat oraezan agolasikanañ giz gihov reamah. Met pitü pop menat hezaek bon nat, oñ orah rezah bahori metamahan rop map hori

ravovai samah. ⁴⁰Met nim mañairameñ-abanari pitü pop ruapanez ne ahoam parun mañoohon paru bapap tah.” ⁴¹Pot hahan Iesu paru porin epat mañah, “Beuo, ne houloam arinañ ev het añamohon ari hatevetet arim gagañik hodad tinao nav het kut tat nemaz homeo badae navat hezavoz homet arimaz nem loporih honoñai tamoh, oñ arinañ am heman ari tairarah nemaz tin homeo badae batepek?” Pot mañat aban popun epat mañah, “Kar erom, nim rop ev bat em.” ⁴²Pot mañahan rop magei bat emoohan pitup maot ro pop bahorì metahan hamarrah ñodat tur tem hat teperat oraeh. Tahan Iesu pitup ruat rop batin batat pim papap maot manah. ⁴³Met pot tahan añarab ahovokaro Godiz kez ahò povon etehapuh paru ñaihet tat agol atat heh.

Iesu pim ñomapanez ñetiv maot mañah

Matiu 17:22-23; Mak 9:30-32

Tat paru Iesuz tahan etehavoz ahoam homeohan Iesu pim mañairooh-abanarin epat mañah, ⁴⁴“Met ari ñeti añomaz toh-epovon hat koveñ bizat tinam hatevetei. Met ne Añaraboz Nanep aban napuhö aban mod narin mañairapanen ne navapan.” ⁴⁵Pot hahan paru Iesuz ñeti mañah-povon hatevetehapuh Iesu hamarrah aban ahop ravat hepan, pot homet hehaek pim hahavoz kapot iz ravahan paru tin hodad narav tahapuh pim ñeti hah-povoz paru at mañapanez ñaihet tat am heh.

Aban tairap ahop ravapan?

Matiu 18:1-5; Mak 9:33-37

⁴⁶Met Iesuz mañairooh-abanarihanañ tairap ahop ravat hepanen modari pim irih hepan pot hat, “Ne arim ahop ravom,” pot hahan modapuhö, “Evo, ne arim ahop ravom,” pot paru kilam ñetiv nae nap mañat ser haovai sooh. ⁴⁷Tahan Iesu parum haohat hodad haravahapuh pi ñaro goe nap bat emat pim nakoe barouvat ⁴⁸parun epat mañah, “Met tairapuhö nemaz homet ñaro goe epopuz zut nap meñizat tin metat hepanez pop ne amun ok neñizat tin hanetapanezavoz zut ravat hepan. Met aban ne neñizapanez pop ne main naneñizotü, oñ nem Pap nemeehan eroh-pop amun ok meñizapan. Met aban nap pi añarab modari meñizat parum gogot metohopanez popun God etet, ‘Aban ahop ok,’ pot pimaz hahopan.” Pot Iesu parun mañahan hateveteh.

Dari eñizohopanezapuz ñetiv

Mak 9:38-40

⁴⁹Met pot hahan Zon Iesun epat mañah, “Deim ahop ae, dei etegin aban napuhö pituholon nim abatao mañat ruoh, oñ pi darinañ honeo nakezapuhö pot tooh, povoz dei pin, ‘Evo, ni okat totun,’ pot ah ñeo mañeg.” ⁵⁰Pot hahan Iesu pim mañairooh-abanarin epat mañah,

“Evo, met aban tairap darim gogot bahori navatotuz pop pi dari eñizohopanezap ok, povoz ari tovai pi bagaa batotunei,” pot mañah.

Sameria nari parumatak naorotuz hah

⁵¹Met God Iesu abarahaz maot bat helapanez pov totoi ravahan pi Zerusalem zeitak sapanez homet heh, povoz nonoroh sooh. ⁵²Tat aban nari asiv meehan sat bar mañapanez garos ravat sohot Sameria zeisik ze natak añarab potakari ze namak manapanen paru orapanez sat mañah. ⁵³Met paru Sameria añarab pori epat haoh, “Zuda añarab emat deinañ naorotü.” Pot haovai emooh. Met Zerusalem ze pot Zudaholoz ze ahot ok, pot paru hodad, povoz paru sat zeimakez at mañahan Iesu Zerusalem ze potak sapanez emooh-pov paru hodad ravahapuh kaev ravat zeimak namanotuz hahan Iesu tokat emoohan hahat piin mañah. ⁵⁴Tahan pim mañairooh-abanañariv Zemisir Zon parum pot hahavoz homet Iesun epat at mañah, “Deim ahop ae, ni gu haken dei hakan rekot abarahanañ itiñad ou ravat erat añarab okori ñadat bavon batapan ma tair?” ⁵⁵Pot at mañahan Iesu borourat parupin ñai mañat hañiv epat mañah, “Evo, arip okat haotunei.” ⁵⁶Pot mañat paru ze pot betet modatak sah.

Iesunañ honeo sapanez aban nap hah

Matiu 8:18-22

⁵⁷Met paru nonoroh soohan aban napuhö emat Iesun epat mañah, “Erom ae, met nim sookezaek deip honeo sohopainez ne zait toh.” ⁵⁸Pot mañahan Iesu piin epat mañah, “Met had bedehol parum oramah-tekeñ hez, ma idehol parum oramah-zezeñ amun hez, oñ ne Añaraboz Nanep ze hemaz namak bon, povoz nim nañeñ-okovoz tinam hometahoh em.” ⁵⁹Pot mañat pi aban modapun epat mañah, “Ni emeken deip sopain.” Pot mañahan aban mod pop hañiv epat mañah, “Nem ahop ae, ni gu haken ne sat het nem papap ñomapanen baveiromapuhoh emoman deip honeo sohopain.” ⁶⁰Pot mañahan Iesu hañiv epat mañah, “Met paru nemaz homeo badae navat hepanezari parumeri ñomohopanen baveirohopan, oñ ni nenañ honeo deip sohopainepuh God arim koravopuz masakavoz roketak sat hepanez ñetiv ni añarabon bar mañookë.” ⁶¹Pot mañahan aban mod napuhö Iesun epat mañah, “Erom ae, ne ninañ honeo deip sohopainez netamah, oñ gaa teken ne garos sat neneri maras manatahoh maot emom.” ⁶²Pot hahan Iesu aban popun epat mañah, “Met aban nap nenañ honeo sohopanez pop maot borourat kosimarati pim nonair nai zeitakatuz, ma gog mod navoz maot homet lop houlorizaro bat hepan, povoz pi Godiz masakavoz roketak het gogot natotuzap ravat hepanezap ok,” pot mañah.

Iesu abanari 72 meehan sah

10 ¹Met pot mañahapuh tokat Iesu pi abanari 72 ba ou batat honeñariv honeñariv baverat ze ahö potak katak, ma ze goe pim

sapanez poñik paru garos meeapanen sapanez tah-porah ²pi parun epat mañah, “Met ari emeeman sepekez teg-epovoz tairavotì zut tat añom? Met av epesik gipiz ahoam map utap hatat hez, oñ gog aban sat gipiz potü bat batogü manapanezari aviam hez, povoz ari av epesiz maupun mañ mañohopeken pi gog aban modari ba ou batapanen sat gipiz potü bat batogü manohopan.

³Met gog emeeman sat tovai sohopekez pot gog honoñai ahot ok, povoz epat añom, Met sohopeken had bedeholohö bolohol menamahavoz zut modarihö arimaz kaev ravat bahorì etohopan. ⁴Met sepekez tat tovai arim heriñ tin metohopekez homet moniñ ma kizovetü bat sotunei, ma eñ suñ meet sotunei, ma nonoroh ari sohopekepuh añarab modari bavizat ñetiv ahoam hahotunei, oñ am ñeo mañovai sohozei. ⁵Met pot tovai ari sohot zeì natak berevat zeì namakeh lokat toutat het pomakeh hepanezarin epat mañei, ‘Godiz masakao arinañ hepanen lop tinarizaronañ ari hezei.’ ⁶Met pot mañepeken zeì pomakez aban maup masak etohot hepan, povoz arim mañepekez pov rotap ravap, oñ ari masak naetotuzat ravapan, povoz mañepekez pov arimautì maot emapan. ⁷Met zeì bat sa avatapanez pomakeh am hepekepuh tovai zeì modamakeh sotunei, oñ pomakeam het zeì potakarìn Godiz ñetiv mañohopeken paru gipiz anohopanen ari, Ui dari hañ tairai paru manak, pot hometunei. Oñ gog abanari gogot tamahan hañiv manamahavoz zut ari amun añarab meñizat tohopekezavoz hañiv paruhö gipizor ivov ari anohopan.

⁸Met zeì natak ari sepeken mar anat avat sat eñepanepuh gipiz arim nain hepekez natü bareñat tez anapan, povoz am nei. ⁹Tat zeì potak am het lamari batin batovai añarabon epat mañei, ‘Met Godiz masakavoz roketak sat hepekez pov totoi arih emapanez tah,’ pot mañohozei. ¹⁰Met pot mañat ari zeì mod natak sat berevepeken paru arim ñetiv hatevetepanez kaev ravapan, povoz ari nonoroh sat rouvat het parun epat mañei, ¹¹‘Ae, ari Godiz masakavoz roketak hepekez pov petev arim totoi ravah-ñetì tin pov dei arin añakaz hat emegin ari kaev raveg, povoz arim ham tomol moleo deim eñañik ñed bat hezaek maot ev teur betekaz teg.’ Pot parun mañat teur betet sei. ¹²Met pot etapanez añarab poriz epat añom, Met batam añarab Sodom zeitak heh-pori horì povor kao ahoam tooh, povoz tokat God ari añarab ñevok evizapanezarah pi Sodom pori hañ horiv metapan, oñ zeì añarab het arimaz kaev ravapanezatak hepanez poriz horivohö Sodom añaraboz batam tooh-pov ritou metat map ahö ravapanezaek God paru hañ horì ahö mapov metapan,” pot mañah.

Parum toohavoz homet mañahat ev

Matiu 11:20-24

¹³Iesu pim mañairooh-aban 72 porin pot mañahapuh boreurat añarabon epat mañah, “Ui, ari Betsaidar Korasin zeitakaroh añarab eperi,

met ne arim zeitakaroh lamari batin batat pituhol ruoh, oñ ari arim horiv navet am hez, povoz mai zakep ari honoñai ahov tokat bepekezari ok. Met batam Taiar Saidon zei potakaroh añarab Godiz hodad natari hehaek aban nap poek sa het nem red tamoh-epeñiz zut nañ tat añarab lamari batin batoohatin parum horiv betepanez hat zakep tat boteo hol ruat kir kizeñ tat heh narab, oñ ne arin red povor kao añairamohon arim horiv navet. ¹⁴Povoz tokat ari añarab mapori ñevok eviipanezarah Taiar Saidon zei potakarohari parum horivoz hañiv aviam bapan, oñ arim horivoz hañiv ari ahoam bepek.” ¹⁵Pot hahapuh modarin epat mañah, “Ae ari Kapaneam zeitakari, arim abatañ bat hel batat abarah helepekez homeamegi? Evo, ari poek rekot nahelotü, oñ horiñ tamahari ñomat sat hezaek evetepanen sepek.”

¹⁶Iesu pot mañahapuh pim mañairooh-aban porin maot epat mañah, “Met tairari arim gizarop hapekezat hatevetet baval hapanez pori nem gizarop amun ok baval hapan, oñ tairari ari kos rez anapanez pori ne amun kos rez nanapanezari ok, met ne kos rez nanapan, povoz nem Pap ne nemeehan erohop amun ok kos rez manapan.” Pot pi parun mañah.

Aban 72 pori maot emah

¹⁷Met tokat abanari 72 meehan sat gogov tovai soohaekanañ maot boreurat emat parum tovai soohavoz biñ ahov ravat Iesun ñetiv epat mañah, “Deim Amip ae, dei nim añeñit tat pituholon nim abatavonañ mañovai soogin hatevetet añarab betet berevat soohan tin ravoo.”

¹⁸Pot mañahan Iesu epat mañah, “Tin, met pot tovai soogin Seten pi uas reamahan eteamegivoz zut revah hehaekanañ er horat ñodahan ne eteohö.

¹⁹Met ari hatevetei, nem kezavohö pi popuz kezao ritou metat hez, povoz nem kez pov ari anohon bat hezaek hamalehol ma pei hori tairari rekot ari emenat bahori naavatotü, ma Seten amun rekot bahori naavatotü, ²⁰oñ ari hamegin pituhol hatevetet berevat samahavoz, ‘Deimauhö hamegin berevat samah,’ pot hat biñ ravotunei, oñ abarah tepatak arim abatañ God red hamenahan hez-povoz homet ari biñavonañ hezei,” pot mañah.

Iesu Godin ñeti biñao mañah

Matiu 11:25-27, 13:16-17

²¹Pot mañoohan Godiz Pul Tinap Iesuz loporih biñ ahov manahan pi epat hah, “Apai, ni nenap abarar hamarrah hezariz maup hez. Met paru nari pot hamah, ‘Dei hodad ahö tinavonañ het tovai sameg.’ Pot hamahari nim ñeti rotapuv hodad tapan hezavoz ba iz batameñ, oñ paru, ‘Dei hodadeo tekü hezari eveg, ni eñizooken tin hodad ravohok,’ pot nañamahariz ni hatevetet kapot tin hodad tapanez mañairameñ, povoz homet ne nimaz biñ ravat hez. Met Apai, rotap nimaup zaitivonañ añarab pot metameñ, povoz ne eteamohon tin ravamah,” pot mañah.

²²Tahapuh Iesu maot añarabon epat mañah, “Met nem Papapuhö gog tamoh-map epeñiz au nañahan hez, met pi nenapuhö ne pim ropuz tamohot tin hodad hez, ma ne pim ropuhö nem Papapuz tamahat tin hodad hez, met añarab tairari ne mañairohomaz porì amun nem Papapuz hodad tohopan, oñ añarab pot namañairotuzari pimaz hodad natotü.”

²³⁻²⁴Met pot hat Iesu boreurat pim mañairooh-aban nenarin etet epat mañah, “Met batam Godiz propet abanari met zeisikaroz ahoari arim petev nem añairamohon etet hateveteameg-epeñin etet hatevetepanez paru zait tat heh, oñ paru mamog et narè ma hat navet heh, povoz petev nem tamohovon ari eteamegiek, biñ ravat lop tinarizaronañ hezei,” pot mañah.

Sameria aban nap Zudap meñizah-ñetiv

²⁵Met aliz nasik aban ñetì kateñiz mañair nap Iesun mañapanen pi horì hapan batah, pot homet epat at mañah, “Añairameñip ae, ne tair toman pohao tin het hemaz pov nanapan?” ²⁶Pot hahan Iesu hañiv epat mañah, “Met ñetì kateñir ah ñeñ menahan hez-tep potak ñetì tairañ ni rekò hameñ?” ²⁷Pot at mañahan aban pop epat hah, “Met menahan hezat ev, God arim ahop hez, povoz nim hezhezao, ma hodadevor loporì pi nenap map manat kez tat pimazahar zait tat hez. Met modao amun epat menahan hez, Nimauz homet zakep tat hezavoz zut añarab modariz homet zakep tat tin metovai sohoz, pot menahan hez.” ²⁸Pot hahan Iesu epat mañah, “Tin hañ, povoz hañ-okat tookezaek pohao tinam het hekez tin pov ni nanapan.”

²⁹Met pot hahan at mañah-aban pop modariz taevavok pi aban tinap ravapanez hat Iesun maot at mañah, “Met mod tairapuz homeman nem modap ravapanen tin metohom?” ³⁰Pot mañahan Iesu aban naritì bavatat ñetiv epat mañah, “Met narah Zuda aban nap Zerusalem zeitak hehaekanañ Zeriko zeitak sapanez hat nonoroh er horoohan aban givogì nari nonoroh emat baelat hehan aban pop horahan kez tat tupuñir marañinañ uroohan ñomapanez tat oraehan pimetü batezahapuh bat paru barezat sah. ³¹Tahan aban pop horì ravat oraehan Zuda aban Godiz homet anumaihol bareñ elat mañarooh-nap emat etevai non helevavotì am sah. ³²Tahan aban popuz tokat Zuda aban mod nap pi aban Livai porihanañ nap Godiz tupumakeh gogov toohaekanañ emahapuh pim tototì haret piin etevai pihoen am bazei manat sah. ³³Met pot parup tat hasahanahoh aban Sameria zeì hotoh pat posikanañ nap emat etet horì ravat oraeh-popuz zakepiv ahoam tahapuh, ³⁴pim tototì sat herisik ur kelahan horì ravat hehaek ueriv ma bain ivov mevizat medemah. Tahapuh pim bol donkipuz revah pi bavizat basahapuh añarab hotohanañ emat orohopanez zeimak demahan hehaek meñet korav ravat hehapuh, ³⁵orat het zeirevai al tezahan monis 2 kina aban zeì pomakez koravop

manahapuh pot mañah, ‘Ni moni epes bat aban epopuz tin korav ravat heken tin ravap, met moni epes ni bat pimaz korav ravat het tovai sooken rekö narav tapan, povoz nim moni nas honeo bizeken ne maot emomazarah moni hañis ni nanom,’ pot mañat sah.”

³⁶Met Iesu ñeti epov mañahapuh aban piin mañahapun epat at mañah, “Met aban nañariv nap pot tahaek tairap aban hori ravat heh-popuz modap ravah?” ³⁷Pot mañahan aban pop epat hah, “Met aban zakep tat tin metah-pat pop pim modap ravat tin meñizah.” Pot hahan Iesu epat mañah, “Rotap ok hañig, ni taput tovai sohoz.”

Matar Mariaz zeimakeh Iesu sah

³⁸Met Iesu pim mañairooh-abanarinañ paru honeo sohot zeï natak berevah. Tahan poek añ nap pim abatao Mata hehaekanañ emat Iesu bavizat pi gipiz bareñat manapan hat kohat pim zeimakeh basat meñeh. ³⁹Tahan pi poek sat hehapuh ñetiv haohan añ popuz saup pim abatao Maria Iesuz totoi emat toutat ñetiv haohat tinam hatevetehot heh. ⁴⁰Tahan Mata pi gipiz bareñapanez gogot ahoam tohot kaev ravat emat Iesun epat mañah, “Erom ae, Maria emat nim totoi toutat betez hezan nem main gogot ahö tohot kaev ravoh, povoz mañeken pi emat ne neñizap.” ⁴¹⁻⁴²Pot mañahan Iesu ñeti hañiv epat mañah, “Mata ae, ni nonair nai mapotuz ahoam homeameñiek emat nen ok at nañeñ, met ni tin navoz hodad nat hez, oñ Maria tin povoz hodad ravat ev emat toutat hateveteamaheak pi mod naiz ni neñizapanez piin namañotü,” pot mañah.

Mañeo hahopanezat mañahat ev

Matu 6:9-15, 7:7-11

11 ¹Met narah Iesu pi naek sat het Godin mañ mañohot het garë hahan aban pim mañairooh-nap piin epat mañah, “Deim Amip ae, met Zoan pim mañairooh-abanarin mañeo hahopanezat badede mañoooh, povoz zut nihoen dein mañeo haokazat añeken dei hodad ravak.” ²Pot mañahan Iesu epat mañah, “Met ari mañeo hahopekez Godin epat mañ mañohozei,

Apai, met dei mapori nim abat tinao orah rezah bat hel batovai sohokaz zait teg.

Ma ni deim koravopuz masakavoz roketak hekaz pov zuam ou ravapanez zait teg.

³Ma ni orah rezah deim gipiz anooken nohok.

⁴Met deim modarihö horiv etamahan dei parum etamah-poñiz unun manat kos rez manamegivoz zut ni amun deim hori tamegiñ bavetet unun manohoz.

Met ganö dei hori nao tak hezavoz ni dei evetetun, oñ deimaz tin korav ravat hez.”

⁵⁻⁶ Jesu pot pim mañairooh-abanarin mañeo hahopanezat mañat maot epat mañah, “Met arihanañ ni nap zeimakeh orat heken kuturutak bati nap hotohanañ emapanen gipiz manekes mel teken bon tapan, povoz nim mod napuz zeimakeh ni sat epat mañekë, ‘Eñarim ae, batip nem zeimakeh emahan ne gipiz bon, povoz ni bal hat gipiz natü nanekez emoh.’ ⁷Pot mañeken nim mod pop epat nañapan, ‘Evo, dei ñaro haitokor hamerizat badao hat haoregiek, ne bal hat ni gipiz nanomaz kaeveg sa.’ ⁸Pot nañat nim mod pop, Ae, nem modap ok emat hahag, ne zuam bal hat meñizat gipiz natü manom, pot pi homet zuam bal nakaotü, oñ ni am rez kek tat mañovai sookë, povozahoh nim ahoam mañookez povon pi hatevetet bal hat nim gipiz mañekes potü nanapan. ⁹Met ñeti pot añoh-epovoz zut epat arin añom, Met ari Godin rez kek tat mañ mañohopek, povoz pimau eñizat ari anohopan. Ma rez kek tat pim nonoroz mel tovai sohopek, povoz God rekot eñizat añairohopenen bar batohopek, ma ari haitokoroh urohopeken, pi hatevetet tezhopan. ¹⁰Rotap epat añoman hatevetei. Añarab tairari rez kek tat Godin mañ mañohopanezari rekot manohopan, ma rez kek tat pim nonoroz mel tovai sohopenez poriz bar batohopan, ma haitokoroh urohopenez poriz pi hatevetet tezhopan.

¹¹Met ari papahol arim ñarohol pisihol manepekez añapanen ari hamal hori nari bat manepeke? ¹²Ma id ñekeñ manepekez añapanen ari hop havhavehol bat manepeke? Evo, pot bon. ¹³Eñarohol, ari añarab horiri arim ñarohol nonair nai tinatuhar manohopekez hodadeo tin hez, met arim Pap abarah tinaharam hezapun mañ mañohopeken pi hori nao ari naanotü, oñ tinam ari eñizat pim Pul Tinap am anohopenez hodad ahö mapov piih hez.” Jesu pot parun mañah.

Pi Bielsebuliz kezavonañ tah, pot hah

Matiu 12:22-37; Mak 3:20-27

¹⁴Met narah aban nap pitup menat hehan ñeo nak heh-pop Iesuhö pitup ruahan sahan aban pop ñeo hah. Pot tahan añarab ahovokaro etet hehaek agol atat heh. ¹⁵Tat narihö pimaz epat haoh, “Met pi pituholoz ahop Bielsebul^f pop kezao pi manamahan pituhol añaraboh menat hezaek ruamahan samah.” Pot paru haoh. ¹⁶Met mod narihö Iesu zu metapanen tair tapan hat epat mañah, “Met ni red ahö deim et narë hez-nao añaireken dei etet, ‘Rotap pi God meñizat kezao manamahan gog okov tovai emamah,’ pot nimaz hak,” pot paru piin mañah. ¹⁷Tahan Bielsebul popuz kezavonañ tamah-pot homet hahavoz Iesu zuam hodad ravat parun epat mañah, “Met paru añarab zeï nasik nari honeek hepanepuh kaev ravat berat toguñ main main ravat nae nap menohopan, povoz parum tin hepanezao hori ravapan. Ma zeï namakeh añarab kap hon

^f 11:15 Pavar 15 -Bielsebul abat pov Seteniz abat modao ok.

nat hepanezaek nae nap zeĩ ñai tovai sohopen, povoz parum hepanezaeo amun horĩ ravapan. ¹⁸Met povoz zut pituholož ahop Seten pop pi hodad houlovokaronañ ravat het pim irih hez-pitü porĩ ruohopenen tair tat am honeo hepan? Evo parum honeo het gogot tohopanez pov horĩ ravapan. Oñ ari nemaz epat hag, ‘Pi Bielsebul popuz kezavonañ pituhol ruamahan samah,’ pot hag, ¹⁹povoz epat arin at aňom, Met arimeri tairapuz kezavonañ pituhol ruamahan samah? Ma hameg-popuz kezavonañ pitü porĩ ruamahan samaha? Met pot parun at mañepeken paru epat arin aňapan, ‘Evo, dei rekot Bielsebul popuz kezavonañ pim pitü porĩ naruotü.’ Pot arin aňapanezaek ari nemaz okat hameg-pov moregao ravapan. ²⁰Met ne pi popuz kezavonañ pituhol naru tamoh, oñ Godiz Pul Tinap kezao nanamahan ruamohon paru hatevetet samah. Povoz ari epat homepek, Rotap dari Godiz masakavoz roketak hekazao ev ou haravah, pot homet hezei.”

²¹Pot mañahapuh Iesu pim kezavohö Seteniz kezao ritou metat hez homet ñeti epov parun mañah, “Met aban kez nap pim zeimakehaz raier ñamet bat ñai bizat tin korav ravat hepan, povoz pim nonair naitü tin oraepan. ²²Oñ aban mod kez napuhö emat aban pop ritou metat menat bahorĩ batapanepuh pim eler ñam potü map batep tat bapanepuh potur nonair nai modatü bat aban modari gamö rezat manapan.

²³Met aňarab tairari nemaz homet naketuz porĩ nenañ dei zeĩ ñai tohokazari ravat hepan, ma paru tairari nem aňarab batogü naman tohopanezari paruhö nemerĩ baverat bamain main batohopanezari ravat hepan,” pot mañah.

Pituhol menat heh-naputü zu tat mañah

Matiu 12:43-45

²⁴Pot mañat Iesu maot epat mañah, “Met ne arim tamegivož homet aban pitup menat hepanež naputü zu tat epat aňom. Met pitup aban nap menat hepanezaek ruapanen pi berevat sat zeĩ betezasik hepanezaekaz melahar etevai sohopen. Tapanen pim hepanezaek bon tapanen pi maot epat homepan, ‘Met ne maot somapuh nem mamog hehö-zeĩ pomakeh lokat hem.’ ²⁵Pot homepanepuh pi maot emat etepanen pim zeĩ pomak ivoh betet batin batapanen hepanen ²⁶etet pi maot boreurat sat pim modari map horĩ tohot hepanežari 7 bavizat paru emapanepuh aban popuh paru mapori lokapan. Tapanen pim garos pitü honepunañ het aviam horĩ ravat hehat maot naketü, oñ pitü pop ruapanen satahoh tokat pim modarin mañat bavizat emat lokat pi map bahorĩ batapanen horĩ ravat hepan,” pot mañah.

Iesu biñ ravat hekaz kapot ba ou batah

²⁷Iesu pot mañahan aň nap aňaraboz ñaravatak hehaekanañ piin epat mañah, “Met ni navatat apetei nanah-pop nimaz homet pi biñ ravat

hezap ok.” ²⁸Pot mañahan Iesu hañiv epat mañah, “Met rotap ok hañ, oñ añarab tairari Godiz Baiñetinao hateveteamahapuh baval hat tin tovai samah-pori paru biñ pimau ravat hezari ok,” pot mañah.

Red ahovon etepanez piin mañah

Matiu 12:38-42; Mak 8:11-12

²⁹Met añarab ahovokaro Iesuz nakoe emat togü manovai soohan pi parun maot epat mañooh, “Met ari añarab eperi hori tohot hez. Tat ne Godiz kezavonañ red nao arin añairoman etepekez nenavoz hameg, oñ neohö red nao betezam arin naañairotü, oñ batam aban Zonaz tahavoz zut red nen pov ne toman ari eteppek. ³⁰Met batam God pi meñizat hehan Nineva zeitak sat añarab poekarín parum hori toohavoz ñetiv bar mañooh-povoz zut ne Añaraboz Nanë epop petev arim hori tameg-ñetiv bar añovai samoh. ³¹Met batam añ kuin ahö nap zeí hotoh nasik het ahop ravat heh-pop pim zeis betet emat darim iz mimiholoz aban kiñ ahop Solomon pop hodad tinavonañ het ñetiv hahot hehaek hatevetepanez hat pi emah. Tat pim ñetivon hatevetet tin hodad ravah. Met rotap Solomon hodad tinavonañ ok haoh, oñ nem hodadevohö pimov ritou metat hezan ne ev het ñetiv añamohon ari hatevetet hodad tinao nav hez, povoz tokat ari añarab ñevok evizapanezarah añ popuhö het arim pot tamegivoz homet, ‘Ari hañ horiv bepekezari ok,’ pot arimaz hapan. ³²Met pis ahop aban Zona ñiz betehan bal hat Nineva zeitak sah. Tahan paru añarab pori Godiz hodad nat hehaek parum horiv betet loporizaro boreurapanez Zona parun mañahan paru hatevetet loporizaro boreurah. Met Zona gog tinao ok tah, oñ nem tamoh-epovohö pimov ritou metat hezan ne ev het arin ñetü tinao añamohon ari hatevetet loporizaro borë naur hez. Povoz tokat ari añarab ñevok evizapanez porah Nineva zeí potakaríhö het arim loporizaro borë naur tamegivoz homet, ‘Ari hañ horiv bepekezari ok,’ pot arimaz hapan,” pot mañah.

Arim loporizaroz alizao

Matiu 5:15-16, 6:22-23

³³Met Iesu añarabon ñetü mod nao epat mañah, “Met aban nap pim ramuñad rañizapanepuh kohat hapisiz giruvok ma mod naek ba iz navatotü, oñ ram poñad ourah badapanen, ñadohot al tezat hepanen añarab mod kohat emapanezari alizavok tin het etehopan. ³⁴Met arim etañ loporizaroz ramuñadez zut hez. Met arim et poñinañ tin etehot homehopekez poriz loporizaroh ramuñad rañizamegin al teamahavoz zut al tezat hepanen tinam etevai sohopek. Oñ tairari etañinañ etehot home horivonañ hepanez poriz loporizaroh ramuñad upiamahan kutur manamahavoz zut paruh alizao bon hepan. ³⁵Met ganö arim etañ horitun etehopeken arim loporizaroh aliz povoz zut hodad tinao bon hepanen

ari kuturutak hepek hezavoz tin homet hezei. ³⁶Met ari ramuñad rañizat alizavok tin etet sameg, povoz zut arim loporizaroh kuturut bon hepanen ari aliz nenavonañ hepek, povoz tinam etet sohopek,” pot mañah.

Parisiholor aban mañairaholon mañah

Matiu 23:1-36; Mak 12:38-40; Ruka 20:45-47

³⁷Met Iesu ñeti pov mañat bon tahan Parisi aban nap pim zeimakeh Iesu sat parunañ gipiz napanez mañah. Tahan parup honeo sat aban popuz zeimakeh lokat modarinañ gipiz napanez toutah. ³⁸Tat Iesu paru Zudaholoz toohat pim marañ gipiz napanez garos ivov navet, povoz Parisi aban pop piin etet home midin tat heh. ³⁹Tahan darim Amip pim homehavoze zuam hodad tat epat mañah, “Met ari Parisi abanari, arim heri koruñik tin ivov ñodameg, oñ ari givogivor hori ahoñ tamegiek arim loporizaroh horiñ map an pap manat hez. ⁴⁰Met ari aban kutari, God arim heriñir loporizaro pi matut etahavoz ari hodad, ma hodad nat hez? ⁴¹Met arihō aban nonair nai bonori loporī manat meñizepek, povoz arim loporizaro tin ravapan.

⁴²Mai zakep, met ari Parisi abanari zakepizari ari hori ravepek. Met arim nonair nai ma gipiz bat bamain batat orañ bizamegin 10 ravamahan ari poekanañ or hon nao bat, ‘Godizao ev,’ pot hat basat pim tup ahomakeh biameg. Pov tin ok tameg, oñ añarab modariz zakep tat masak metao, ma Godiz zait tat homeme hepekezao, tin poñ ari unun manameg.

⁴³Mai zakep, met ari Parisi abanari arim topour zeñik lokat topourameg-porah sat garosik tek tinañik toutat hepekez zait tat toutameg, ma ari añarab topouramahaek sohopeken paru pori arin etet, ‘Deim ahoñ ae,’ pot arin ahoñopanez ari zait tat het pot tovai sameg. ⁴⁴Met ari Parisi abanari añarab baveiramahan zañ tat hezaek añarab kut tat ham tinar ev pot hat revah samah, met povoz zut modari arim heriñin etet, ‘Tin tamahari ok,’ pot arimaz hamah, oñ arim loporizaroh map zañ tat hori ravat hez. Povoz zavaruzari ari hori ravepek.”

⁴⁵Met Iesu pot mañahan aban ñeti kateñiz mañairaholoz napuhō epat mañah, “Añairameñip ae, ni ñeti hori okov parun kez ravat mañenin deiti honeo ravahan dei hatevetet tu raveg.” ⁴⁶Pot mañahan Iesu hañiv epat mañah, “Met ari aban ñeti kateñiz mañairahol, met arim pot mañamegivoz tairavoti zut tat haom? Met ari honoman ahotu ñelet samegivoz zut ari paru honoñai povor kao bat het tohopanez ñeti kateñir ah ñeñ mañamegin paru baval hahopanez hat gog ahov tat kakamao hatevetet tovai emamah, oñ ari paru nameñiz hez, povoz mai zakepizari ari amun hori ravepekezari ok.

⁴⁷Ma arim iz mimiholohō Godiz propet abanari menat baveirahan hezaek ari, ‘Hatahav ev beiraez,’ pot homet ze tinañ demat zi buñ ñedet red tinao metameg. ⁴⁸Pot ari tamegiek epat ravamah, Tin tat deim iz

mimihol propet aban pori men ñomah, pot homet hakamegivoz zut ravamahag, mai zavaruzari ari hori ravat hepekezari ok.

⁴⁹Met God hodad ahö mapovonañ hez-pop batam epat hahan hez, ‘Met tokat nem propet aban nari, ma aban hodad tinavonañ modari ba ou batoman paru Israel añaraboz ñaravatak gogot tohot hepanen Israel porihö nari bat men ñomohopan, ma mod nari bat urohopenen kakamao hatevetehopan.’ ⁵⁰⁻⁵¹Pot pi hahan hezan arim iz mimihol garos tooh-taput ari amun tovai sameg. Met batam God hamarar nonair naitü matut tahan heh-poekanañ, Abel horiv bon tinam hehap menahan aban narihö paru mod hori bonori am menovai emohot aban Sekaraia amun Godiz tup ahomaker anumaihol bareñ elat mañaroooh-arü poziz ñaravatak hehan pop amun menah, met ari arim iz mim porinañ honeo ravat tokat hañiv bepek. Rotap epat añoman hatevetei. Met batam arim iz mimiholohö aban horiv bonori menah-povoz hañ horiv parunañ honeo ari amun bepek.

⁵²Met aban ñeti kateñiz mañairahol, ari Godiz masakavoz roketak hepekez zait nat het añarab masak povok hepanez zait tat hezariz haitokor ari merizat kirop ba iz batamegin añarab modari poek sat hepanez bapap tat hez. Povoz mai zakep ari hori ravepekezari ok.” Pot Iesu aban porin mañah.

⁵³⁻⁵⁴Met Iesu pot mañahapuh paru zeï pomakeh hehaekanañ iñidoh berevahan paru aban ñeti kateñiz mañairahol, ma Parisi abanari pimaz map kaev ravat piin ñai mañat ñeti hori nao pim gizasikanañ hapanen hatevetet pi ñevok bizapan hat paru Iesun at ñeñ ahoam mañohot heh.

Parisihol moreg metapan hez mañah

Matiu 10:26-27

12 ¹Met narah añarab map ahö navokaro topourat Iesuz okat epat rouvahapuh paru eñañ irih revah mezat atalip tat hehan Iesu garos pi mañairooh-abanarin epat mañah, “Ari hatevetei, Met Parisi abanari lop houlorizaronañ hezaek parum gipiz namahatü nohot ari hori ravepek hezag, tovai ari potü notunei. ²Met petev parum kil izek hat tovai samah-map poñ tokat ba ou batapanen ari etepek. ³Met rotap arim kuturutak kilam het hamegiñ tokat alizavok ourah hahopenen mapori hatevetehopan, ma ari zeï girü navok het modapuz nakoe haret kilam giz ñun ñun nae nap mañameg-poñ zeï daparih añaraboz ñaravatak het ñeo ñarah hahopenen añarab mapori hatevetehopan.” Pot Iesu parun mañah.

Añarab modariz ñaihet natotü

Matiu 10:28-31

⁴Met Iesu pot mañat maot epat mañah, “Nem modari arin epat añom, Ari tovai ham añaraboz ñaihet totunei. Met paru rekot arim ham heriñ ur

oñomapan, oñ arim pulihol paru rekot ur nañomotü, povoz ari parumaz ñaihet totunei. ⁵Oñ God nenap rekot arim heriñir pulihol honeo itiñadek sepekez añapanen ganö poek sat hori ravepek hezavoz petev ari pi nenapuz homet ñaihetivonañ het tovai sohozei.

⁶Met ari id goehol 5 pori bat nepekez zumao 2 toea nen manat bameg. Met id goe poriz zumao aviam, oñ God poriz unun naman am homeme hez. ⁷Tat parumaz tin korav hez-tapupuhö arimaz tin korav het arim gag tae honeo honeo rekö hakat hodad ravat hakez. Met arihö idehol ritou metat hez, povoz pi arimaz korav ravat hezag, ari modariz ñaihet totunei.” Pot Iesu parun mañah.

Dari Iesuz nem Ahop pot haok

Matiu 10:19-20,32-33, 12:32

⁸Iesu pot mañat maot epat mañah, “Met tairap nemaz, ‘Iesu nem ahop ok,’ pot añarabon ourah mañohopanez pop tokat abarah Godiz enzolihol etet hepanen ne Añaraboz Nanep pimaz, ‘Epop nemop ev,’ pot mañom. ⁹Oñ tairap, ‘Ne pimaz unun,’ pot nemaz añarab modari hatevetet hepanen hapanezap tokat abarah Godiz enzolihol etet hepanen ne pin, ‘Ne nimaz unun,’ pot mañom. ¹⁰Met ari añarab eperi ne Añaraboz Nanepuz homet ñeti hori tairao hapek, povoz rekot God hori pov baol betepan, oñ pim Pul Tinapuhö kezao nanahan ne gogot toohon nari, ‘Pi Seteniz kezavonañ gog akat tamah,’ pot hahavoz zut añarab tairari Godiz Pul Tinapuhö nap meñizapanen tin nao tapanen ñeti horiv hat Pul popuz abatao batiu tiu batat epat hapan, ‘Seteniz gogot ok tamah,’ pot hapanen God rekot parum hapanez hori pov ba ol navetetü, oñ am pohao hepan.

¹¹Met ari nari nem ñetiv baval hat emohopekezavoz mod narihö kaev ravat beri akahopanepuh ari Zudaholoz topour zeñik, ma gavman aban korav ahori haz avat sat arimaz ñeti horiv mañohopanen hatevetet, ‘Ui, dari hañ tairao mañak batah,’ pot ari hat ñaihet totunei, ¹²oñ mañohopekez at añohopanez porah Godiz Pul Tinapuhö hodadeo ari anohopanen ñeti hañiñ mañohopek.” Pot pi parun mañah.

Aban monisinañap kut tah-ñetiv

¹³Met Iesu pim mañairooh-abanarin pot mañat bon tahan aban nap añarab ahovokaroz ñaravatak hehaekanañ Iesun epat mañah, “Añairameñip ae, ne haoman ni hatevet. Dei nanepuz papap ñomahan nem nanep deipim papapuz nonair nai map pihar au ravat hez, povoz ni piin mañeken baverat nem natü nanap.” ¹⁴Pot mañahan Iesu ñeti hañiv epat mañah, “Erom, met ne arim koravop ravat nim nañeñ-okat ba oñ batomaz tairapuhö niin nañahan nehaz emeñ? Evo, ne arim ñe okoñ ba oñ navatotuzap ev.” ¹⁵Pot mañahapuh Iesu añarabon epat mañah, “Met ari hatevetei. Tin hepekez nonor tair hez? Met aban nap hamarrah nonair

nai mapotü bapanez homevai sohopenezap rekot pim tin hepanez nonor bar batapane? Evo, rekot bar navatotü, oñ tin hepekez nonor pat hez. Povozi ari hamaraha nonair naitü ahoam bepekez homevai sohotunei.”

¹⁶Pot Iesu mañahapuh paru tin hodad tapanez aban naputü bavatat ñeti epov mañah, “Met aban moni ahosinañ nap pim uitikap ahö ñedehan hehaek uloñ ahoam badat heh. ¹⁷Tahan pi epat homeh, Kar, nem uit uloñ ahö utap tat hezag, ne tair tomapuh nem gipiz okotü tin bizoman oraepan batah? ¹⁸Pot homehapuh pi maot epat homeh, Met nem uit uloñiz ze goeñ demohon hezaek map ur edomapuh ze ahoñihar demat poek nem uit ul poñir nonair nai modatü bat emat honeo bizoman tin oraepan. ¹⁹Met ze ahö poñ demat garë haomapuh nem potü batogü manat bizoman oraepanen gogot nat hemapuh nem gipizor bain ivov nohot biñ ravat tinaharam hem. ²⁰Met aban pop pot tapanez homehan Godihö piin epat mañah, ‘Ni aban kutap, met ne kutur epatak ni ñomekez haoman ñomeken, aban mod napuhö nimotuz korav ravat hepan.’ ” ²¹Met Iesu pot parun mañat maot epat mañah, “Met añoh-epovoz zut ari tairari hamaraha nonair nai mapotuz zaitiv ahö tat sohopekepuh Godiz zait nat hepekezari ari nonair nai bonoriz zut ravat hepek.” Iesu pot parun mañah.

Ham heriñizatuz home midin natotü

Matiu 6:25-34

²²Met Iesu pim mañairooh-abanarin maot epat mañah, “Erohol epat añoman ari hatevetei, Met dei gipiz tairatü nohok? Ma deim heriñik dimir giv tairatü took, pot hat arim hepekezavoz home midin totunei. ²³Met God ari matut etahapuh pi pul emenahan ari biriri hez-pov tin ahö ravat hezao ok, oñ gipizor dimir giv potü betezatü ok. ²⁴Met ideholoz tamahat ari homei. Paru avañ nañed, ma parum gipiz bavelohopanez nai bon, ma parum zezeñik gipiz basat naviz, oñ arim Pap abarah hezapuhö id pori gipiz manamahan namah. Met God ideholon eteamahan goe betezari, oñ ari añarabon pi eteamahan arihö id pori ritou metat hez. ²⁵Met ni nap epat homeokë, Ne nañomotü, oñ am biriri hem. Pot ahoam homekez pop am biriri heke? Evo, ni nap pot hat rekot biriri naketü. ²⁶Met ari ev añoh-epat hat am biriri hepekez pap tat hezaek arim heriñizatuz ahoam homeameg-povoz kapot bon, pot ne arin ok añamoh.

²⁷⁻²⁸Met ari zi buñiz tat meveramahat homei. Parumauhö nao tamahan parum redeo naverev, oñ zi bu hamoh-poñ meverat hezan eteamegin aliz zeirevaizasik lul ñodat ñu ravat bon tamah. Met rotap aban Solomon darim iz mim batam kiñ ahop ravat hehap, pi dimir giv redevonañ tinatü tooh, oñ zi buñiz redevohö pim red tooh-pov ritou metat hez. Met ari Godiz tin homeo badae navat hezari hamoh-epovoz hodadeo bei. God zi bu betez poñiz korav het red povor kao tinam metamahap arimaz amun

tin korav het arim heriñik dimir giv metohopekezatü tinam anohopan. ²⁹⁻³⁰Met parü Godiz hodad natari pot hamah, ‘Dari taekanañ gipizor ivov bat nook, ma dimir giv bat meok,’ pot hat home midin tamah. Oñ arim Pap abarah hezap ari gipizor dimir givov tekü tepeken pi zuam etet hodad tat arimaz homehopan, povoz pimaz hodad natariz home midin tamahat tovai ari totunei. ³¹Oñ ari epat tohozei. God arim koravopuz masakavoz roketak hepekez zaitiv ahö tat homevai sohopekez pov bagaros batepek. Tepeken pi arimaz kaev naravotü, oñ tin korav het gipizor dimir giv rekot ari anovai sohopan.” pot Iesu parun mañah.

Dari abarah hañ tinao bakaz ñetiv

Matiu 6:19-21

³²Met Iesu pot mañat maot epat mañah, “Ari nem bol sipsipiholoz zut ravat hezari aviam hez, met darim Papapuz masakavoz roketak hepekez hat puihö ari ba ou avatahan hez, povoz tovai ñaihet totunei. ³³Met arim nonair nai bat modari manat zum tat monis bat añarab nonair nai bonori manepken, revah abarah arim pot tovai sohopekezavoz hañ tinao helohopanen, poek tibihol men borö nakaotü, ma girgir narezotü, ma givogiri lokat givogü navotü, oñ tinam oraepan. ³⁴Met ari tairari hamarrah nonair nai ahotuz zait tat batogü manepek, povoz potuzaharam homevai sohopek, oñ ari abarah hañ tinao helapanez zait tat tovai sohopekezari poekazaharam homevai sohopek,” pot mañah.

Iesu pi maot erapanez hah

Matiu 24:42-44

³⁵Met Iesu pim mañairooh-abanarin maot epat mañah, “Met ne arim Amip maot emomag, ari tinam arim dim givoñ batekü batat barat zapatiñ revah urat arim ramuñ rañizat bat hezei. ³⁶Met aban ahö nap añarab mod nari gipiz bareñat pimaz as hapanen pi sat parunañ honeo biñ ravat gipiz nohot hepanen pim gog abanari zeitak betezam naketü, oñ poekam het gogot tin tohot hepanen parum aban ahö pop maot emat haitok zisik kad kad urapanen hatevetet zuam haitokor teepanezavoz zut ne arim ahop maot emomaz hat etehot hepek. ³⁷Met gog aban pori parum ahop naem tapanez porah maot emapanez homet parü au gom natotü, oñ gaa tat tin etaet hepan, povoz emapanen parü biñ ravapan. Met parum ahö pop emat parü pimaz tin homet hepanez povon etet parun epat mañapan, ‘Ari nem gog aban tinari ev, oñ petev ari toutat hepeken, neohö arim gipiz tezat anoman ari bat nepek.’ Pot mañat pi parumaz asit metapan. ³⁸Met parum ahö pop lop gitum ma hohor mamogap ñeo hapanez porah emapanen gog aban pori pim emapanezavoz homet etaetam hepan, povoz parum ahop emapanen etet ahoam parü biñ ravapan. ³⁹Met añomaz toh-mod epovoz ari tin homevai sohozei. Aban zeï namakez maupuhö

aban givogip naratiam emat pimotoü bapanezao hodad hatat hehatin pi homeme het aban givogï pop emapan hezavoz ñai bizat etet heh narab. 40Met povoz zut ne Añaraboz Nanë epop maot emomaz porahaz ari amun unun hepeken taput naratiam ne emomag, ari nemaz tinam ñai bizat etehot hezei.” Pot Iesu parun mañah.

Gog aban tinapur horipuz ñetiv

Matiu 24:45-51

41Pot mañahan Pita hatevetehapuh Iesun epat at mañah, “Nem Amip ae, ñeti hañ-okov ni dei nenariz homet hañ, ma añarab maporiz homet okat hañ?” 42Pot at mañahan Iesu hañiv parun maot epat mañah, “Met gog aban nap tair tapanen pim hodad tinao ou ravapan? Met aban ahö nap sapanez tat pim gog añaraboz korav ravat pi het gipiz gamö rezat manohopanez nap ba ou batat meñepanen, orah rezah pi poek het pim ahopuz mañat sapanez pot pi tin tohopan. 43Met aban ahö pop sat hepanezaekanañ maot emat etepanen garos mañat sahatam gog aban pop tohopan, povoz ahopuhö piin epat mañapan, ‘Ni hodad tinavonañ hez,’ pot mañapanen pi biñ ravat hepan. 44Tapanen aban ahö pop pim gog modañiz map piin au mañapanen korav ravat hepan. 45Oñ gog aban mod napuz hodad tinao bon hepan, povoz pim aban ahop sapanen pot homepan, Nem aban ahop pi sahaek zuam maot naemotü, pot homet pi gog añarab pim irih het gogot tohopanezari urovai gipizor iv kezao novai rumurat tohopan. 46Met pi pot tohot pim ahop emapanez homet naketuz porah ahop naratiam maot emapanepuh etet gog aban horï tohopanez pop ahoam urat bahorï metapanepuh aban Godiz homeo badae navatotuz modarinañ honeo betepan.”

47Met Iesu pot mañat ñeti modao epat mañah, “Met gog aban nap pim aban ahopuz gizarop tapanezat mañapanen pi tin hatevetet hodad ravapanepuh pim hapanezat gogot nat betez hepanen aban ahop maot emat etepan, povoz pim tapanezavoz tin hodad haket nat hepanezaevoz homet birepenañ ahoam urapan. 48Met gog aban modap pim aban ahopuz gogot tohopanezat tin hodad nat am hepanen aban ahop emat etet pot homepan, Met pi gogot tapanezat tin hodad nat am hez, pot homet birepenañ aviam urapan.” Pot mañat Iesu ñeti modao epat mañah, “Met tairari Godihö hodad tinao aviam manamah-pori pim gogot tin tovai sohopanez homeamah, met tairari hodad tin ahov manamah-pori pim gogot ahoam tin tovai sohopanez homeamah.” Pot Iesu parun mañah.

Añarab Iesuz hat main main ravapan

Matiu 10:34-36

49Pot mañat epat mañah, “Ne hamarrah itañad rañizoman ñadohopanez hat ev eroh. Met it poñad zuam ñadat nonair nai horitü bavon

batohopanez ne zait toh. ⁵⁰Oñ garos ne kakam ahov hatevetem, met nem kakam hatevetemaz pov, Mai zuam bon tapan nak, pot homet nem lopori honoñai ahoam tat hez. ⁵¹Met ari añarab ev hamarrah het eñizat bahon avatoman tin honeo hepekez ne ev eroh, pot homeamegi? Evo, oñ ari añarab nem ñetivon hatevetet berat main main ravepekez hat ev eroh. ⁵²Povoz petev ma tokat haomaz toh-epat tohopanezat ev. Met añarab nari mar nas paru kap honet ze honemakeh hepanepuh nem ñetiv hapanen hatevetepanezaek berat 2 main ravapanen 3 main ravat hepan. ⁵³Met añoh-epovoz kapot pot hez. Aban ro nap hepanen pim papap nemaz homevai sohopenen aban ro pop pim pap popuz kaev ravapan. Ma ñari añ nap hepanen pim nonop nemaz homevai sohopenen ñari añ pop pim non popuz amun taput kaev ravapan. Ma añ nap hepanen pim añ lelamap nemaz homevai sohopenen añ pop pim añ lelamapuz amun kaev ravat hepan,” pot mañah.

Paru pimaz hodad natavoz bar mañah

Matiu 16:2-3

⁵⁴Iesu pot mañat añarab houlorin epat mañah, “Met ari mapori eteamegin univ emat abarah akak tat hezan kutur manamahan etet epat hameg, ‘Utar pelapanez tah,’ pot hamegin rotap utar pelamah. ⁵⁵Ma ari eteamegin rouvav ahos berevamahan etet epat hameg, ‘Git mid kezao ravapanez ev tah,’ pot hamegin gitao ravamah. ⁵⁶Met ari aban lop houlorizaronañ hezari, ari abarah ma hamaraz tamahavoz tin et hareet hodad haravameg, oñ tairaiz ari petev nem gog tamohovon tin haetet kapotaz hodad narav am kut tameg?” Pot mañah.

Ñevok bizapanezapunañ honeo ravapan

Matiu 5:25-26

⁵⁷Iesu pot mañat parun maot epat mañah, “Met tairaiz ari non horioror non tinaoroz tin etet hodad narav tameg? ⁵⁸Met aban napunañ arip naiz ser nae nap hat ni ñevok nevizapanez hapanen, arip nonoroh sovai zuam aban pop bavizat arip ñetiv nae nap mañat bavon batat maot lop honerì ravei. Oñ ganö pot nat arip am sohot aban pop ni ñevok nevizapanen, ñe ahoñiz hateveteamah-ahopuhö pei du napun mañapanen ni navat sat kakam zeimakeh nemerizapan. ⁵⁹Tapanen ni zuam poekanañ naverevotü, oñ poekam het nim horì teñivoz hañiv map bekepuhoh maot berevekë,” pot mañah. (*Met ganö God hañ horiv pot etapan hezavoz dari zuam pinañ maot honeo ravakaz homet Iesu ñeti epov hah.*)

Paru lopori borë naurari horì ravapan

13 ¹Met Iesu pot mañah-porah añarab poek heh-nari epat piin mañah, “Met Galili aban nari bol sipsipihol Godiz hañiv

metapanez bareñ elat hehan aban ahop Pailat pim ñai abanari meehan sat paru hori tat men ñomah-ñeti pov ni hateveteñi?” ²Pot at mañahan Iesuhoen hañiv epat at mañah, “Met Galili aban men ñomah-poriz horiv ahoam hehan men ñomah, oñ paru Galili añarab nañom hez-modariz horiv aviam hez, pot homeamegi? ³Evo, pot bon, met arim loporizaro boreurat arim horiñ navet tepek, povoz parum tat ñomah-taput ari tat ñomat hori ravepek. ⁴Met Zerusalem zeitak abanari 18 ñomah-ñetiv ari hatevetegi? Met paru Siloam iv havevoz nakoe heleñinañ zei tovmak demahan hehaek edat aban hamoh-pori totoi hehan urahan ñomah. Met poriz hori tah-povohö Zerusalem añarab modariz hori tah-pov ritou metat hehaek ñomah, homeamegi? ⁵Evo, pot bon, met arim loporizaro borourat hori tameg-poñ navet tepek, povoz ari amun parum zut ñomat hori ravepekezari ok,” pot mañah.

Zi uloñ navadamedeti zut tat mañah

⁶Pot hat Iesu zi namedeti bavatat ñeti nao epat mañah, “Met aban nap hehapuh pim avasik zi named ñedet sat hehan zi pomed ahö ravat hehan aban pop orah rezah uloñ badapanen tavat napan hat emat eteohan, zi pomed uloñ navad betezam heh. ⁷Tahan aban pop pim avasiz korav ravat heh-gog aban napun epat mañah, ‘Erom ae, met krismasañ 3 ne zi epemedek uloñ badapanen tavat nom hat etevai emoohon uloñ navad hez, povoz zi epemed betezam het hamaraz haleñaiv bamahavoz ne homet kaev netamahag, ni men bet.’ ⁸Pot mañahan avasiz korav hehap pim ahopun epat mañah, ‘Nem ahop ae, tin hañ, oñ krismas mod epovok am hepanen ne korav het zi kapotak bol zañ bat em betet ked beiroman hamar haleñai tapan. ⁹Pot tat eteman tin ravat zi uloñ badapan ma tair, deip am het etepain. Oñ am navad hepan, povozahoh nim hameñ-okat tat men betem,’ pot gog aban pop hah.” Iesu pot parun mañah.

Iesu añ nap batin batah

¹⁰Met paru Zudaholoz gogot nat heh-aliz poñiz nasik Iesu parum topour zei namakeh lokat añarabon ñetiv mañooh. ¹¹Met poek añ nap pitup menat pim kokatari bapekü tat hehan tin haeñ tapanez pap tat pekuam sooh-nap hehan krismasañ 18 bon tah. ¹²Met añ pop hehan Iesu piin etet epat mañah, “Eñarim ae, ni nem nakoe em.” Pot mañahan emahan epat mañah, “Nim tat hezao petev ok bavon batomaz toh.” ¹³Pot haovai Iesu pim marañ añ popuh bizahan pim kokatari pekü tat hehaek tin ravat opep ravahan pi Godiz biñ hahot heh.

¹⁴Tahan topour zei pomakez aban korav ravat hehap parum gogot nat heh-aliz posik Iesu gog pov tat añ pop batin batahavoz loporih kaev ravat añarabon epat mañah, “Met alizañ 6 darim gogot tovai sameg-poñik pi ari rekot batin avatohopan, oñ darim gogot nat hez-aliz nasik pi tovai

ari batin avatapanez hat pihaz emotunei.” ¹⁵Pot mañahan Iesu hatevetet hañiv epat mañah, “Met ari aban moregari, orah rezah arim kauholor donkihol hez-zei poñik lokat bat iverihaz alizañik baeñat samegin ivov namah, met gogot nat hez-aliz poñik amun ari gog pov tamegin arim kauholor donkihol ivov namah. ¹⁶Met povoz zut aliz epesik ne añ epop meñizat batin batohoeok ne ganö toh, pot homeamegi? Evo, pot bon. Met pi Abraamiz iz mimip Setenihö pim heris bahori batat hehan pi krismasañ 18 hori hehaek ne pimaz zakep tat Seteniz kezao ritou metat batin batohovoz ari nemaz ñeti horiv ok hameg.” ¹⁷Pot mañahan pimaz kaev ravat hehari paru hatevetet tu ravat ñeo nak hehan modari Iesuz tin tovai emoohavoz paru biñ ravat pim abatao bat hel batah.

Miz ul navoti bavatat mañah

Matiu 13:31-32; Mak 4:30-32

¹⁸Met Iesu pot mañat maot epat mañah, “Met God arim korav maupuz masakavoz roketak hepekezao tair hez? Ma kapot ou ravapanez tairavoti zu tat arin añom? ¹⁹Met zi namedez abatao mizimed hameg-pomedez bi ul nao nap bat ñedeamahan berevat ahö ravamahapuh zi modañ ritou metat mar arur ahö ravamahan idehol emat parum zezeñ bizat oramah.” Pot Iesu parun mañah.

Iesu ist povoti bavatat mañah

Matiu 13:33

²⁰Pot mañat ñeti mod epov epat mañah, “Met Godiz masakavoz roketak hepekezavoz tairavoti zut tat añom? ²¹Met ist parava botevonañ honeo biamah-pei povoti zu tat hez. Met añ nap pei pov aviam bat parava bot ahovonañ honeo bizat basat em tamahan map tu hat ahö ravamah,” pot mañah.

Haitok goeorož ñetiv ev

Matiu 7:13-14, 21-23

²²Met pot mañat bon tahapuh Iesu Zerusalem zeitak sapan hat ze pot betet zeisizañ sovai ze ahotakaror goetakaroh ñetiv mañovai sooh. ²³Met mañovai soohan aban nap piin epat at mañah, “Deim ahop ae, met añarab honep honep God pimeri bavatapan, ma dei mapori pimeri ba avatapanen tin hek?” Pot piin at mañahan ²⁴Iesu haniv epat mañah, “Met añarab tin pohao het hepanez zei posiz haitok poorö ahö bon, oñ goeor rezahan hezaek añarab ahovokaro poek lokat hepanez zu tovai sohapanez bapap tat hez, oñ ari tapuek lokat hepekez hat boi tat rez kek tohot hepek, povozahoh rekot lokat poek hepek. ²⁵Met tokat ze posiz maup haitokor merizapanen hepanen ari añarab nari iñidoh emat kerë hapekepuh kad kad urovai, ‘Deim ahop ae, haitokor tezekem emak,’ pot hapeken pi epat arin añapan, ‘Met ne

arimaz unun, oñ taekanañ emat ok hameg,' pot arin añapanen ²⁶ari epat mañepek, 'Erom, met ni deimatak emat baiñetinao añoñin hateveteogporah dari honeo gipizor ivov nohot hegivoz ni unun manat heza?' ²⁷Pot hapeken epat añapan, 'Ne arimaz ununug, ari taek epatari ok. Met ari hori tovai emoogiri okeg, nehanañ zei nanat pataek sei.' ²⁸Pot kos rez anat añapanez porah aban Abraamir Aisakir Zekopor Godiz propet aban modari map pim zei tinasik lokat hepanen, ari iñidoh het etet hepekezaekanañ iñ hahot het kakamao hatevetehot gitahav men tep hat hepek. ²⁹Pot ari tat hepeken añarab gitap berevamahaek zei posikarohanañari, ma gitap bañodamahaek zei posikarohanañari, añarab map ahovokaro emat Godiz zei tin posik kohat het biñ ravat gipiz nohopan. ³⁰Met rotap epat arin añom, Met petev añarab abatañ bon hezarihanañ nari tokat porah abatañinañ ahori ravat hepan, oñ petev añarab ahö abatañinañ hezarihanañ nari tokat abatañ bonori ravat hepan." Pot Iesu parun mañah.

Iesu zakepivonañ het hahat ev

Matiu 23:37-39

³¹Pot mañoohan tapuraham Parisi aban nari emat piin epat mañah, "Erom ae, met aban ahop Erod pi ni nemenapanen ñomekez hahan dei hatevetegig, ni zei epat betet pat naek sekez nañak hat ev emeg." ³²Pot mañahan Iesu hañiv epat mañah, "Met Erod had bed ñaipuz zut tamah-okopun ari sat epat mañepeken hatevetep, 'Petev ma zeirevai pi pituhol añaraboh menat hezaek ruovai añarab lamao tat hezari batin bathopan, met au aliz posikaro bon tapanez porah pim gogot bon hatapan, povoz pi nimaz ñaihet nat.' Pot ari sat piin mañepeken hatevetep." ³³Pot parun mañat Iesu maot epat hah, "Met rotap aliz epesik ma zeirevai ma zeirevaizasik Zerusalem zeitak non somaz emamoh-epoorozañ sohom. Met batam propet aban pori Zerusalem zei potak ur ñomovai emooh, povoz ne amun Godiz ñetiv arin añovai samohoek Zerusalem tapuek soman paru ne navat ur noñomapan." Pot pi hah.

³⁴Pot mañat maot epat mañah, "Mai zakep ari Zerusalem añarab, Godiz propet abanari menoog, ma pim gog aban modari arihaz meehan emoohan heleñinañ ur ñomoog, povoz epat arin añom, Met hohorep pim rohol batopourat ñep mezat korav tin hezavoz zut orah rezah ne arimaz zakep tat tin korav aravat hemaz zait tat hez, oñ ari povoz kaev ravameg. ³⁵Ae, God evetepanen arim zei ahö epat betezat ravapan. Met zeirevai ari neen maot et nanereotü, oñ tokat ari, 'Godihö okop pim abatavonañ meehan emah, povoz piin biñ mañook,' pot ari nemaz hapekez porahoh maot neen et nerepepek." Pot Iesu parun mañah.

Eñar mar bavelat hehapuz ñetiv

14 ¹⁻²Met parum gogot nat heh-aliz poñiz nasik Parisi abanariz ahö nap Iesu pim zeimakeh sat parunañ honeo gipiz napanez

mañahan pi zeï pomakeh sat lokat hehan aban eñar mar bavelat hehap pim nakoe toutat hehan paru aban poek hehari piin etet, Met aliz epesik okop tair metapan batak, pot homet piin et bameet heh. ³Tahan Iesu aban lam pov tat hehapun etet Parisi abanarir aban ñeti kateñiz mañairaholon epat at mañah, “Met dari ñeti kateñir ah ñeñ baval hat tovai dari rekot gogot nat hez-aliz epesiz zut nasik aban lam nao tat hepanez nap meñizat batin batak, ma tair menahan hez?” ⁴Pot Iesu parun at mañahan paru hañiv Iesun namañ, oñ am toutat et nenañ tat hehan, Iesu aban hori ravat hehap bat batin batat meehan sah. ⁵Tahan paru porin maot epat mañah, “Met arim ñaro nap ma bol kau nap darim aliz gogot nat hekaz-nasik iv havë navok ñodat sapanen ari sat meñizat bepeke? Ma evo darim gogot nat am hez-alizas eveg, dari sat pi meñizat navotü, pot homet hepeke? Evo, oñ ari zuam sat meñizat bepekezavoz zut ne amun meñizamohop ev.” ⁶Pot Iesu parun mañahan aban pori hañiv piin mañapanez bapap tat heh.

Parum abatañ bat hel navatotü

⁷Met Iesu poekam het eteohan aban gipiz napanez emah-nari aban ahoriz tek tinañik toutat heh, povoz ñeti epov añarab poek heharin epat mañah, ⁸“Met arim kapotak nari gipiz bareñapanez porah ari sat honeo hepekez añapanen ari sat ni nap aban ahoriz toutamah-tek tinatak ganö tat toutotun. Met aban mod as hapanen emapanez pop pi aban ahop, povoz ganö ni poek toutat heken aban ahö pot nap emat toutapanez kerë hapanen, ⁹aban gipizoz maupuhö pi rouvaepanen emat etet niin epat nañapan, ‘Met aban ahö nap ev emat hezag, nim toutat hez-okoeke pi zeï maneken toutap,’ ganö pot nañapanen ni añarab modariz etañik tu ahov ravat bal hat sat okoh tokaratï toutekë hezavoz homet ev bar añamoh. ¹⁰Oñ paru nim modari gipiz bareñat nimaz as hapanez porah ni honeo gipiz nekez hat sat okoh tokaratï toutat hekë, povozahoh aban gipizoz maup emat niin etepanepuh epat nañapan, ‘Nem modap, ev nem totoi aban ahoriz tekeñiz natak emat tout.’ Pot nañapanen ni añarab modariz etañik hapanen sat pim nañapanez poek toutat biñ ahov ravat hekë. ¹¹Met navotihanañ ñeti epov arin añoh hometunei, oñ tairap pimaüz abatao bat hel batat hahopanez pop God bat hor batapanen pi abatao bonop ravapan, oñ tairap pimaüz abatao bat hor batat hepanez pop Godihö pi abatavonañap bavatapan,” pot mañah.

¹²Pot mañat Iesu maot gipizoz maupun epat mañah, “Met ni gipizoz gog ahov tat nim naner bos ma nim kapotak modari, ma monir zeirurumanañarin as haotun. Met porin mañooken emat honeo het nim gipiz nohopanezavoz hañiv tokat gipiz hañikap bareñat nimaz as hahopanezaek nim hañiv havookezat ok ravohopan hez. ¹³Povoz tovai ni pot totun, oñ ni gipiz bareñookez porah paru monir zeirurum bonori, ma eñañ hori ravat

hepenezari, ma etañ kutari, porizahar as haoken emat nim gipiz potü nohopan, ¹⁴povoz tokat paru rekot nim gipiz hañikap bareñ nananotü, oñ nim gipizoz hañiv paru poriti am hepan. Tapanen tokat añarab tinari ñomapanezaekanañ maot baval hapanez porah God pimauhö añarab bon pori tin metookezavoz hañiv ni nanapanen bekë.” Pot Iesu parun mañah.

Gipiz ahot napanez mañah-ñetiv

Matiu 22:1-10

¹⁵Met Iesu pot mañahan aban pinañ honeo paru toutat gipiz nooharihanañ nap piin pot mañah, “Tokat añarab sat Godiz zei tinasik pinañ honeo het gipiz nohot hepenez pori biñ pimau ravat hepan.” ¹⁶Pot mañahan Iesu navoti bavatat ñeti nao epat mañah, “Met aban nap het pot homeh, Met ne bolor gipiz ahö tomapuh añarab ahovokaroz asiv meeman sat mañapanen emat napan. Pot homehapuh pimeri map emapanen paru gipiz napanez asiv meehan soohan pir pim gog abanari gipiz ahoam beirat bat emat bizahan orae. ¹⁷Tahan pim gog aban nap meeapanez tat epat mañah, ‘Ni sat añarab gipiz epotü emat napanez porin pat, ‘Ari dari sat pim gipiz tezat nepekez hahan ne emoh,’ pot mañat bavizat em.’ Pot mañat meehan aban pop sat pim hahat porin mañah. ¹⁸Tahan paru kaev ravat napuhö piin epat mañah, ‘Erom, ne ham nar petev zum tohoek sat etemag, nim hameñ-okotü ne sat rekot bat nainotü.’ ¹⁹Pot hahan met mod napuhö piin epat mañah, ‘Met ne bol kauhol 10 bohoek paru gogot tin tohopan ma tair? Petev ne sat etemag, pim bolor gipiz tat hamah-okoek ne nasotü.’ ²⁰Pot hahan met mod napuhö piin epat mañah, ‘Erom, ne añap magei boh, povoz pi ne soman kaev ravapan hezavoz ne pi betet nasotü.’

Met añarab emapanez mañat meehan sah-pori potam hat nasotuz hahan ²¹gog aban pop maot sat maupun parum hahat zu mañahan pi hatevetet mogao ahoam tat pim gog aban popun epat mañah, ‘Gipiz añaraboz hat bizohotü ahoam oraez, povoz ni iñidoh berevat sat zei ahö epataz okat epat añarab togü manat hezaek moniñ bonori, ma eñañ pekü tat hezari, ma haeñat nasari, ma etañ kut tat hezari, map emat gipiz epotü napanez mañeken emat nap.’ Pot mañahan sat iñidoh heharin hahat mañahan kohat lokat hehan ²²maot emat maupun epat mañah, ‘Nim hañit mañohon añarab emat lokahan atalip nat, oñ zei teri nar upai am oraez.’ ²³Pot mañahan maup gog abanapun maot epat mañah, ‘Povoz maot nonoroh ma avañik añarab sat em tamahaek, sat modari emapanez mañeken emapanepuh nem zei epamak map atalip tapanen tin ravapan. ²⁴Met garos emat napanez asiv meehon naem tah-poriz nap emat nem gipiz epat nainotü.’ ” Pot Iesu ñetiv parun mañah.

Nap tin hometahoh pim eñatak sapan

Matiu 10:37-38

²⁵Met narah Iesur añarab ahovokaro sohot Iesu havoe tat parun etet epat mañah, ²⁶⁻²⁷“Aban tairap nenañ honeo emohopanez pop pi ne lopori

ahoam nanapan. Tat pim nonor papar pim añar ñaror pim naner bos lopori aviam manapan, ma parumaz aviam zait tapan. Tat pi pimauz zaitiv betet nem zaitivok tovai emohot epat homehopan, Met mod nari kakam nao netohopanezaek ne kaev naravotü, oñ am pimaz homevai sohom. Pot homet nem zaitivok emohopan. Met pot nat tohopanezap rekot nenañ honeo naemotuzap ok. ²⁸Met arihanañ aban nap pim zeimak demapanez pi garos toutat het, Nem zeimak demomaz zir bi bizohon oraezaek demoman rekö ravapan, ma rekö naravotü? pot pi homepan. ²⁹⁻³⁰Met ganö pi zol bah nenahav bareñat revahatü tat bavon navat hepanen hop hop tapanen añarab modari etet pi batiu tiu batat, ‘Met aban okop zeimak demapanezaorap kapot tat tohot am betehan oraet hop hop tah,’ pot hapan hezavoz aban pot tapanezap garos tinam hometahoh demapan. (*Met povoz zut dari tinam hometahoh Iesunañ honeo sohok.*)

³¹Met ñeti modao ev, ñai aban ahö nap pim irih ñai abanari 10 tausen hepanen aban ahö pop hatevetepanen ñai aban ahö mod napuz irih pim ñai abanari 20 tausen hepenez popur pimeri, ‘Ari nae nap menepekez hat paru emamah,’ pot hapanen garos pi epat homepan, Met nem ñai abanari aviam, oñ pimeri ahoam hezaek, ganö dei emenat bavon avatapan hezag, tair tak? ³²Pot pi homet ñai aban ahö modapur pimeri am hotoh heriam hepanen pi aban nari meeapanen sat aban ahö popun ñetiv epat mañapan, ‘“Met ñai aban ahoñariv arip main toutat ñetiv tinam hat bahon batepek.” Pot pi hahan dei nihaz emeg,’ pot piin mañapan.” ³³Pot mañat Iesu parun epat mañah, “Aban popuz tinam homeh-taput ari tinam homet nenañ honeo emohopekezari taput tepek. Met garos ari tinam hometahoh rekot arim nonair naitü kos rez manat maot potuz home midin natotuzat ravat hepek, povozahoh rekot nenañ honeo emohopek,” pot mañah.

Guaiv muz natotuzataz ñetiv

Matiu 5:13; Mak 9:50

³⁴Iesu pot mañat maot epat mañah, “Guaivet tin nat ok, dari gipizoh beteamegin tin muz tamah. Oñ guaivetaz muzeo bon tapan, povoz tair tat dari maot bamuz bata? Evo, pot nao takaz nonor bon. ³⁵Met hamar haleñai tapan hat avasik guaiv pot navetetü, oñ naek betekan betezam oraepan. Met ari hat koveñinañari okeg, nem hahö-epovon hatevetet tin hodad ravei.” Pot Iesu parun mañah. (*Ganö dari guaiv potaz zut hori ravakan evetepan hezavoz homet Iesu ñeti epov hah.*)

Sipsip naputi bavatat mañah

Matiu 18:12-14

15 ¹Met narah Iesuz ñetiv hepanen hatevetehopanez hat takes monis booh-narir hori modañ tovai emooh-nari pim nakoe emat het pim ñeti haohavon hatevetehot heh. ²Tahan Parisi abanarir aban ñeti kateñiz

mañairahol honeo hehaek parun etet kaev ravat parumam epat nae nap mañooh, “Met aban epov añarab hoririz zait tat bat em batamah, ma parum zeifnik sat parunañ honeo het gipiz namah.”

³Pot paru haohan Iesu hatevetet bol sipsip naputi bavatat ñeti nao epat parun mañah, ⁴“Met aban arihanañ napuhö pim bol sipsipihol 100 poriz korav ravat hepanen nap naek sapanen etet mod tin hepanez 99 pori pi betet naek sapanez popuz melahar sapan. Met aban pop bol naek sapanezapuz melahar sohot bar batapanepuh, ⁵biñavonañ bañelet bat emat pimatak maot meñepan. ⁶Tapanepuh pimeriz as hapanen emapanen epat parun mañapan, ‘Met nem bol sipsip epov naek sat hehaek petev ne melahar sohot maot bat emohovoz homet dari biñ ravat hekaz arimaz as hahon ok emeg.’” ⁷Met ñeti pov parun mañat Iesu maot epat mañah, “Met bol sipsip nap naek sapanen maot bapan, pot añohovoz zut aban nap ma añ nap pi hori tovai emohopanezaekanañ loporì borourat hodad tinao maot bapanez popuz abarah Godinañ hezari piin etet biñ pimau ravat hepan, oñ añarab heri kos nenañik tin tat, ‘Dei tinari ev,’ pot hat parum loporizaro borè naur hepanez poriz paru biñ naravotü.” Pot Iesu parun mañah.

Monisiti bavatat hah

⁸Met Iesu pot mañat moni nasiti bavatat ñeti modao epat mañah, “Met añ nap pim moni heleñ 10 bat hepanen nas naek ñodapan. Tapanen pi havoñad rañizat tinam etepanepuh marañinañ nonair nai map bahou batat ahoam mel tohot maot bar batapan. ⁹Tat pinañ paru ze honetak hepanezarin epat mañapan, ‘Met nem moni naek sahan mel toh-pos bar havatoh, povoz dari honeo biñ ravat hek.’ ¹⁰Met rotap añoh-epovoz zut aban nap ma añ nap hori tooh-poñ betet maot pim loporì borourapanen Godiz enzolihol piin etet biñ pimau ravat hepan,” pot mañah.

Aban ro naputi bavatat mañah

¹¹Met Iesu pot mañat ñeti mod epov añarabon mañah, “Met aban nap pim ro honeñariv bataan heh. ¹²Tahapuh parup ahö ravat het bosip pim papapun epat mañah, ‘Apai, nimotukanañ nem monisir mod natü ne petev nanekez zait toh.’ Pot mañahan papap hahat tat pimotü baverat bamain batat ro ahop natü manat ro goep natü manah.

¹³Met pot metahan ro goep aviam het hotoh pataekam sapanez pim monisir nonair naitü bahou batat bahapuh ze hotoh nasik sah. ¹⁴Tahapuh poek het añahol bovai monis manovai nonair nai mapotü zum toohan pim monis bon tah. Tahan ze posik utar napel gitap kez mañat hehan gipiz map bon tahan pi gin ahoam ñomat heh, ¹⁵povoz pi ze posik aban napun gogot tapanez sat mañahan aban pop pim boloholoz korav ravat het piuhö gipiz manohopanez mañah. ¹⁶Tahan pi bol zeitak sat korav ravat gipiz manohot

hehan aban maup pi gipiz naman tahan het gin ñomahapuh bolohol gipiz noohaek teritü bat pim nohopanez homet zait tat heh.

¹⁷Pot toohapuh pi hodadeo bat epat homeh, Met nem papapuz gogot metamah-abanari gipiz ahoam manamahan namah, oñ ne ev gin ñomohot betezam hez, ¹⁸povoz ne sat nem papapun, ‘Apai, ne ni hori ahov hanetoh, ma God amun horiv ahoam hametoh, ¹⁹povoz ne nim rop ravat rekot naketü, oñ nim as rop ravat hem,’ pot mañom. ²⁰Met pi pot homet pim papapuhaz sapanez hat bal hat sohot papapuz zeitaz nakoe honoohan pim papap hotohanañ piin etet pim loporih zakep ahov tat porü hat sat rop ba opitit tot nat iñ hah. ²¹Tahan rop epat mañah, ‘Apai, ne ari God horiv ahoam haetoo, povoz ne nim rop rekot maot ravat naketü.’ ²²Pot mañahan papap mañah-pov barotap navat, oñ pim as roholon as hahan emahan epat mañah, ‘Ari zuam sat nem ro epopuz dimir giv tinatü, ma mar riñirar eñ suñ honeo bat emat ro epopuk memeepekepuh, ²³sat bol kau goe obun tinap demat bat emat urat arö tepeken nem modarinañ dei biñ ravat nohot hek. ²⁴Met etei, nem ro epop naek sat hehan hañomah homet hehon biririam het ev emah, ma pimaz bon hatah homet hehon ev maot haemahag, aliz epesik dari pimaz biñ ravat bolor gipiz tepeken nak.’ Pi pot hahan as rohol hatevetet pim hahat tat bol kau hah-pop sa bat emat urat arö tahan paru topourat ro popuz bolor gipiz tah-potü biñ ravat nohot heh.

²⁵Pot toohan ro ahop avasik gogot tohot hehaekanañ emat zeitaz totoi haret hatevetehan paru daas hat daat mezooh. ²⁶Tahan pi pim papapuz as ro napun epat at mañah, ‘Met tairaz paru daas hat daat mezamah?’ ²⁷Pot mañahan as rop hañiv epat mañah, ‘Evo, met nim bosip sat hehaekanañ maot emat hezan aripim papap pimaz biñ ravat bol kau tinap urat bat emat manegin nohot het daat ak mezamah.’ ²⁸Pot hahan nanep nag tat kohat zei giruvok daat mezooh-poek bosipuz nakoe sat nalok, oñ am iñidoh hehan papap pi nalok tat iñidoh hehavoze loporih zakep tat berevat emat mañah. ²⁹Tahan ro ahop pot mañah, ‘Met nehoh krismasañ ahoam nim gogot tinam tohot nim ñeo ne nael, oñ nim hameñitam baval hat asit netooh, met nem hatarinañ dei biñ ravat nakaz ni bol kau tin okat nap naur. ³⁰Met nim ro akap pim monisir nonair naitü ahoam maneñin basat bogi tohot manohot hehan bon tahan maot ev emahan ni bol kau ro tinap tairaz pimaz urapanez mañeñin paru bat emat urat arö tahan nameg.’ ³¹Pot hahan pim papap epat hah, ‘Nem rop, ni nenañ orah rezah ahoam hez, povoz nemotü map nimotuhar ravat hez, ³²oñ nim bosip hañomah homet hehon sa hehaekanañ maot emahan eteohö, povoz aliz epesik biñ ravat bolor gipiz tat nameg-pov tin ok tameg.’” Pot ñeti epov Iesu añarab poek heharin mañahan paru hateveteh.

Aban hori toohapuz ñetiv

16 ¹Pot añarabon mañat Iesu maot pim mañairooh-abanarin ñetiv epat mañah, “Met aban moniñ ahö oraeh-nap pim nonair naituz

korav hepanez hat aban nap meñehan korav hehan tokat aban mod nari emat ahopun pot mañah, ‘Met nimotuz korav hepanez aban meñeñin hez-pop nimotuz tin korav nakez, oñ natü betezam pim bamahaek bon tovai samah.’² Pot mañat sahan ahö pop aban korav meñehan hehapun as hahan emahan epat at mañah, ‘Ni ganö teñin mod nari emat nim ñetiv nañahan ne hateveteohö, povoz ni okopuhö maot nemotuz korav ravat naketü, oñ gogot tovai emooñvoz ñetiv meneñin hez-tep poñ bat emeken ne etet nim gog tooñvoz kapotaz tin hodad tom.’

³Pot mañat meehan aban pop berevat epat homeh, Kar, nem ahopuhö ne gogotak hehoek petev noruah, povoz ne tair tom batah? Met ne avas menat ñedemaz kez tat natotuzat hez, ma orah rezah gipizor nonair naituz nem modarin mañ mañohomaz ne tair mañom homet batu batamoh. ⁴Pot homet maot epat homeh, Kar, met nem gog epov bon tapanen modari bat em navatat gipiz nanohopanez hat petev ne paru barekev metom. ⁵Pot homehapuh aban nari parum aban ahopuhö pei nai manat, ‘Tokat maot monis nanekë,’ pot mañahan hehariz honep honep as hahan pihaz emah. Tahan garos emah-popun epat at mañah, ‘Met deipim aban ahop tairai ni nanahapuh tokat pi monis manekez nañah?’ ⁶Pot mañahan pi epat mañah, ‘Met gipiz arö tameg-oel dramuñ 100 nanahaek maot pi monis manomazat hez,’ pot hahan aban pop epat piin mañah, ‘Povoz nim nanahan beñivoz tep poe bat 100 baolat 50 nen red men.’ ⁷Pot mañahan mañahat tat sahan aban modap emahan korav heh-pop taputam piin at mañah, ‘Met deipim aban ahop ni tairai nanat hañ monis manekez nañah?’ Pot mañahan popuhoen pat, ‘Met uit ul bekitü batam 100 nanat monis hañ manomaz nañah,’ pot hahan epat mañah, ‘Povoz nim batam potü beñivoz tepae bat 100 olat 80 nen red men.’

⁸Potam aban korav heh-pop tovai soohan tokat aban ahop hatevetet popuz hodadevonañ het pot tahavoz homet, ‘Auma, pi aban hori tahap ok, oñ modari tin metapanen tin hepan hat home tinavonañ het okat tah,’ pot modarin mañah.” Met Iesu pot ñetiv mañat maot epat mañah, “Ui, rotap ham eparahatuz homet hezari parumauz heriñiz homehot hez. Tat modari hañ tinao metohopan hat hodad ahovonañ het nae nap moreg metovai samah. Oñ Godiz alizavok hez-añarab pori parum hodad ahovonañ het tamah-okat nat.

⁹Oñ epat añoman ari hatevetei. Met ari ham eparah hezarah arim monisir nonair nai modatunañ añarab mod bonori meñizohot parunañ ñod rezat hepekezaek tokat arim monis betet abarah sepekez porah God arimaz biñ ravat bat em avatapanen pohao het hepek.

¹⁰Met aban tairap pi gog goevoz homet gog pov tin tapan, povoz pi gog ahovoz rekot tin korav ravat tovai sohopan, oñ aban tairap pi gog goevoz homet moreg tapanez pop gog ahovoz taputam pi tin korav naketü, oñ moreg tohopan. ¹¹Met nap ev hamarrah pim monisir pimotoü

bat hepanezaek tin nat hepan, povoz abarah God pi naiz koravop ravat hepaneze namañotü. ¹²Met napuhö pimotoü ni bat het korav ravat hekez nañapanen potuz ni tin korav narav hekë, povoz God nim pohao bat hekez potü nanapane? Evo, rekot nananotü.

¹³Met gog aban nap rekot aban ahö houloñariviz gogot nametotü. Oñ pot tapan, povoz pi aban ahö napuz pim lopori manapanepuh popuz gogot tinam tohopan, met aban ahö modapuz kaev ravat hepanepuh pim gogot tin natotü. Met povoz zut ari rekot Godiz gogot tovai moni ahos bepekez homet zait natotü, met ni nap moni ahos nim bookez homet zait tookez pop zuamam monisiz homevai Godiz gogotaz kaev ravat hekë,” pot mañah.

Parisi nari kaev ravahan mañahat ev

¹⁴Iesu pot hahan met paru Parisi aban honeo het hatevetehot hehari paru monisiz zaitiv ahoam tat heh, povoz pi pot hahan paru hatevetet giz meu metah. ¹⁵Tahan Iesu parun epat mañah, “Met ari Parisi abanari arim añarab modariz etañik tinam tovai samegin arin etet, “Tin tamahari ok,’ pot arimaz hamah, oñ God arim loporizaroh hezat eteamahan tin narav. Ma rotap arim zait tat tamegiv God eteamahan betezao ravamah.

¹⁶Met batam Mosesir propet aban modari amun Godiz ñetiv haohan ñeti poñ añarab haovai emoohan Zoan tokat berevah. Met pi berevahaekanañ ari Godiz masakavoz roketak hepekez ñeti tin pov dei haovai samegin añarab hatevetet rok potak hepaneze hat boi tat tovai samah. ¹⁷Met tokat abarar ham eparar nonair nai map ev hez-epotü bon tapan, oñ Mosesir propet aban modariz ñeti menahan hez-poñiz nao aban napuhö rekot bavon navatotü.

Añarab tat het maot navetetuz hah

Matiu 5:31-32, 19:9; Mak 10:11-12

¹⁸Met aban nap pim añap betet añ modap bapan, povoz pi añ pop givogipuz zut bat hepanen piiti horiv am hepan. Met aban tairap pi aban modapuhö añ kaev metapanen hepaneze pop bapanezaek aban pop amun givogipuz zut bat hepanen piiti horiv am hepan,” pot mañah.

Aban monisinañapur Lasarusiz ñetiv

¹⁹Pot mañat pi maot epat mañah, “Met aban monir zeirurumanañap hehapuh orah rezah pi ze tinamakeh orohot gipiz tinatü nohot het dimir giv redevanañ tinatuhar tooh. ²⁰Met aban mod nonair nai bon nap pim abatao Lasarus pop pim herisik obul uveo berevoohañ ahoam tat hehan modari pi bat emat monisinañ popuz ze tinamakez temeraz haitokoroh meñehan heh. ²¹Tahan pi poek het aban monisinañap gipiz nohopanen lopoñ ñodapanen bat emat manohopanen nohopan hat heh. Tahan hadehol emat tañañinañ pim obuloñ an nohot heh.

²²Pot tohot heh-aban pop ñomovaiam enzolihol emat pim pulip abarah basat Abraaminañ meñehan heh. Met aban monisinañap amun tokat ñomahan baveirah. ²³Tahan horiek pi sat het kakam ahov hatevetehot hehapuh agarë revah pataek etehan Abraamir Lasarus tin heh. ²⁴Tahan pi Abraamin ñeo ñarah epat mañah, ‘Abraam nem izap ae, met ne ev it epañadek kakam ahov hatevetehot hez, povoz ni nemaz zakep tat Lasarusin mañeken pim marap havevok barizat emat nem tañarah bizapanen tamar tap.’ ²⁵Pot mañahan Abraam aban mod popun epat mañah, ‘Nem izap, ni irih hamarrah nonair nai ahotunañ het nen potuz biñavonañ heñ-pov ni hodad, met petev nim potü bon tahan ni kakamavonañ ok hez. Oñ aban epop hamarrah horivonañ heh-pov bon tahan petev pi nenañ honeo tinaek ev hez. ²⁶Met ev deim hezaek ma ok arim hezaek pavarah gup ahori hez-poek rekot ev hezari arihaz naemotü, ma ari okori amun rekot ev deihas naemotü.’ ²⁷⁻²⁸Pot mañahan pi iñivonañ maot Abraamin epat mañah, ‘Abizai, rotap ak hañ, povoz nem naner bos 5 hamarrah am hezaek, ganö paru amun nem tohot kakamavoz zei epesik emapan hezavoz, ni Lasarusin mañat meeken sat parun badede mañapanen paru hatevetet hodad ravap.’

²⁹Pot mañahan ñeti hañ epov Abraam piin mañah, ‘Met aban Moses ma Godiz propet abanariz ñeti hahan hez-poñ ok hakez, povoz nim naner bos rekot ñeti poñ hapanen hatevetet baval hahot hepan.’ ³⁰Pot mañahan aban pop maot epat mañah, ‘Evo abizai, ñeti poñin paru hat navet hez, oñ aban ñomah-napuhö sat parun mañapan, povozahoh paru hatevetet parum loporizaro borourat tin tovai emohopan.’ ³¹Pot mañahan Abraam ñeti hañiv epat mañah, ‘Met Mosesir propet modariz hahan hez-poñ paru hat navet hezaek ne ñomah-nap maot meeman sat ñetiv mañapanen paru am hat navetetü,’ pot pi hah.” Iesu parun pot mañah.

Modari moreg nametotuz ñetiv

Matiu 18:6-7,21-22; Mak 9:42

17 ¹Met narah Iesu pim mañairooh-abanarin epat mañah, “Met ev hamarrah orah rezah añarab narihö modari moreg metat horiv tohopanez mañohopanen hori ravohopan, oñ modari hori tohopanez mañohopanez pori hañ hori ahov tokat bapan. ²Met aban nap tin het nemaz aviam homet hepanen mod napuhö moreg metapanen pop non horioroh maot sapan, povoz moreg metapanez pop hañ horiv tokat bapan. Met pi moreg namet hepanez poratiam mez kerë hat iv havevok sa ñodat emiv elat ñomapan, povoz tin ok ravapan. (*Met pi garos ñomapan, povoz pi Iesuz homeo badae batat hepanezap moreg metat bahori batapanezavoz tokat hañ horiv navotü.*) ³Met ganö arim modari moreg metepeken hori ravapan hezavoz tinam homet arimauz tin korav ravat hezei.

Met nim mod nap hori nao tapanen tin badede mañeken pim hori tapanen mañekhezavoz zakep tat loporü borourapan, povoz ni pim pov

unun manek. ⁴Met pi aliz nasik ni hori netapanepuh aliz tapusikam pim hori netapanezavoz zakep tat emat niin epat nañapan, ‘Nem hori netoh-pov unun manek zakep tat ev emat nañamoh.’ Met pi pot niin nañat maot aliz hon tapusikam hori netovai nañovai sohopenan 7 ravapan, povoz pim hori poñ ni am unun man.” Pot Iesu parun mañah.

Paru Godiz homeme hepanez mañah

⁵Met pot Iesu mañahan aposor abanari piin epat mañah, “Deim ahop ae, met deim Godiz homeme hakez-epov ba ahö bateken nim añeñ-okat tovai sookè.” ⁶Pot piin mañahan pi parun epat mañah, “Met zi miz pomedez uloñ goe hez-poñiz zut ari Godiz aviam homeo badae batovai sohopek, povoz ari rekot zi ev totoi hez-epemedan epat mañepok, ‘Nim oroñinañ honeo tizat sat iv havè okovok rouvat hez.’ Pot mañepoken zi epemed taput tat tizat sat iv havevok rouvat hepan.” Pot pi parun mañah.

Gog abanariz tohopanezat mañah

⁷Met Iesu pot mañat maot parun epat mañah, “Arihanañ nap pim añap meeapanen pi adasik sat gogot tohohan, ma bolohol gipiz manohopanezaekanañ maot hapanezai emapanen pim abup, ‘Eñarim, ni gogot ahö teñ, povoz zuam emat toutat nim gipiz nohoz,’ pot mañapane? Evo pot namañotü, ⁸oñ añ pop emapanen pim abup epat mañapan, ‘Zuam emat nem gipiz bareñat tezat naneken ne nomanahoh ni tokat nekè.’ ⁹Pot mañapanen pim añap mañapanezat tapanen aban pop pim abatao bat hel batat, ‘Tin ok neteñ,’ pot mañapane? Evo, oñ añ pop pim gog nena metohopanezap ok, povoz pi pot namañotü. ¹⁰Met povoz zut ari Godiz gogot tohopekepuh epat homehopek, Met dei gog aban betezari ev, Godiz hahan hezatam am tovai sameg, povoz gog tameg-epovoz homet darimauz abatañ bat hel navatotü, pot homehopek.” Iesu pot parun mañah.

Iesu abanari 10 batin batah-ñetiv

¹¹Met Iesu Zerusalem zeitak sapan hat sohapuh Galili zeisir Sameria zeisiz bodorih ¹²zei nataz totoi honoohan abanari 10 obuloñ pohao tat heh-nari emat parum pot tat hehavoz homet pim totoi naem, oñ hotoh pataek rouvat het, ¹³Iesun etet ñeo ñarah epat mañah, “Iesu deim ahop ae, ni deimaz zakep tat eñiz.” ¹⁴Pot mañahan Iesu parun etehapuh epat mañah, “Ari borourat sat aban anumaihol bareñ elat mañaramah-poriz narin mañepoken arim heriñin etepan.” Pot mañahan aban pori borourat pim mañahat tapan hat nonoroh sohan parum heriñ tin ravah. ¹⁵Tahan aban nari am sahan aban honep pim heris tin ravahavoz etet maot borourat ñeo ñarah hat Godiz biñar sos haovai emat, ¹⁶Iesuz nakoe rariñ rez bareñat epat mañah, “Erom, ni tin tat ne batin navateñ,” pot mañah.

Met aban maot emat piin mañah-pop Zuda aban bonop, oñ pi Sameria zeisikanañap, ¹⁷povoz aban popuz tahavon Iesu etet pot hah, “Met abanari 10 ne batin batohog modari taek ok sah? ¹⁸Tahan aban Sameria zei pat posikanañ nen epop Godiz biñar sos haovai maot borourat emah.” ¹⁹Pot hahapuh Iesu maot aban popun epat mañah, “Petev ne ni batin navatomaz tin homet nehaz emeñ, povoz nim herisik obuloñ pohao tat heñiek batin hanavatohog, ni bal hat sa.” Pot mañahan sah.

Godiz roketak hepanezavoz at mañah

Matiu 24:23-28,36-41

²⁰Met narah Parisi aban nari Iesun epat at mañah, “Met dari Godiz masakavoz roketak tin hekaz pov tairarah ou ravapan?” Pot at mañahan Iesu parun epat mañah, “Met arim hag-okov ari rekot arim etañinañ et nareetuzao ok, ²¹oñ pov petev ev arim ñaravatak ou haravat hakez, povoz añarab nari, ‘Koin ok ou ravahan eteg,’ pot nari rekot nakaotü.”

²²Pot parun mañat Iesu pim mañairooh-abanarin epat mañah, “Met tokat ne Añaraboz Nanep maot eromaz aliz posin ari etepekez zait tat homehopek, oñ zuam et narezotü. ²³Met tokat napuhö epat hapan, ‘Pi haemat hezag, emat etei,’ ma mod napuhö, ‘Pi ok emat hez,’ pot moreg hapanen ari barotap batat pot hapanezarinañ sotunei. ²⁴Oñ uas abarah reamahan dari mapori eteamegivoz zut ne Añaraboz Nanep maot eroman ari neen etepeke, povoz napuhö, ‘Pi koin ev haemat hezag, emat etei,’ pot hapanen ari parum hapanezavoz barotap batotunei. ²⁵Oñ añarab petev hez-eperihö garos ne kos rez nanat kakam ahov netapanen hatevetem.

²⁶Met batam Noa het sipimak demah-porah añarab horiam tooh-povoz zut ne Añaraboz Nanep ev hamarrah maot eromazarah añarab taputam tohot hepanen erom. ²⁷Met iv havë ahov emat zeisikaro bamezapanez totoi ravahan paru onun het gipizor ivov novai añarab nae nari bovai soohan Noa sipimakeh lokahan iv haveo bamezahan añarab mapori emiv elat ñomat bon tah. ²⁸Ma tokat aban Lot pop heharah, añarab pinañ heh-pori amun taput gipizor ivov nohot haeñ tat parum modari natü manoochan paruhoen hañitü manooch. Tat avañ menat ñedehot parum zeñ demohot heh. ²⁹Oñ aban Lot tin pop Sodom parum zei pot betet pataek sahan añarab onun hehan it ahoñader heleñ utaraz zut abarahanañ ñodat ur ñomahan ñadat bon tah. ³⁰Met povoz zut añarab ununuam hepanen ne maot erom.

³¹Met maot eromaz porah añarab zei aropoñik^g toutat hepanez pori maot kohat parum zeñik sa lokat parumotü navotü, ma añarab avañik sat gogot tohopanezari maot parum nai bapan hat zeñikaz naemotü.

³²Met aban Lotiz añapuz metahavoz homet hodad ravei.^h ³³Met aban

^g 17:31 Pavar 31 -Mak 13:14 sat 23 akopun eterë. ^h 17:32 Pavar 32 -Met Lotiz añap pimotü betet nonoroh haemat maot pim potuz homet borourat etevaiam ñomah.

tairap pimauz heris tin hepanez homet tovai sohopenez pop ñomat hori ravapan, oñ aban tairap Godiz homeme hepanezaek pim heris tin hepanez hom namee hepanez pop pohao tin het hepan. ³⁴Met ne emomaz porah zeï namakeh aban nañariv orat hepanen God nap bapanen nap am hepan. ³⁵Ma añ nañariv amun honeo het gipizoz gogot tohopenen God nap bapanen modap am hepan. [³⁶Ma aban nañariv avasik hepanen God nap bapanen nap am hepan.]” ³⁷Pot Iesu parun mañahan pim mañairooh-abanari epat piin at mañah, “Deim ahop ae, met nim hameñ-okov taek tapanezao ok hameñ?” Pot hahan Iesu naiti bavatat epat hah, “Met anumai nap ñomat hamarrah oraezan havi ahö duhol emat ñodat map togü manamahan dari eteameg.” Pot Iesu parun mañah.

Añ nap aban nap meñizapanez mañah

18 ¹Met Iesu pim mañairooh-abanari orah rezah Godin mañ mañohot het kaev naravotuz homet ñeti epov parun mañah, ²“Met zeï natak aban añaraboz ñetiñ hatevetet an tooh-nap heh, met pop pi Godiz ñaihet nat, ma pi añaraboz amun zakep nat. ³Met zeï potak añ hapuri nap amun hehan pim añ mod napuhö hori nao am metovai emoohan añ pop orah rezah aban ñetiñ an tooh-pop meñizapan hat emat piin epat mañoooh, ‘Erom, met añ okop ne bahori netamahaek ni neñizat pi ñevok bizat ñetiv hat ba oñ batekez zait toh.’ ⁴Met pot mañooohan aban pop houloam hat navet, ma añ popuz mañahat nat hehan am mañooohan pimam epat hah, ‘Met ne Godiz ñaihet nat, ma añarab modariz zakep nat, ⁵oñ añ okop ahoam nañamahavoz ne kaev ravat hezaek meñizom, ganö pi emat mañohot hepanen nem heris map kaev ravom hezag, pim nañamahat am tom.’” ⁶Pot Iesu mañat maot epat mañah, “Pot aban hori okopuz hamahat ari hatevetei, ⁷oñ God tin popuz añarab orah rezah alizañir kuturuñik meñizapanez hat rez kek tat mañohopenen pi am kaev ravat het nameñizotu? ⁸Evo, rotap pi zuamam hatevetet zakep tat meñizohopanezap ok. Oñ tokat ne Añaraboz Nanë epov maot eromaz porah ne añarab hamaraharin eteman paru Godiz homehot am mañ mañohopan, ma tair?” pot pi parun mañah.

Aban nañariv Godin mañ mañah-ñetiv

⁹Met aban nari parumauz, “Dei tin tamegiri eveg,” pot hat parum abatañ bat hel batat modarizañ bat hor batooh-pori hehan Iesu ñeti epov parun mañah, ¹⁰“Met aban nañariv parup Godin mañ mañapanez hat tup ahomakeh lokah. Met poñariviz nap pi Parisi abanap, met modap pi takes monis boohap. ¹¹Parup poñariv lokat hehapuh Parisi abanap pim main rouvat het pimauz abatao bat hel batat Godin epat mañ mañah, ‘O God, met ne eteamohon aban modari hori tovai samah. Tat paru nari modarizatü givogü bamah, ma modariz añahol bamah, ma hori modañ

amun tamah, oñ ne parum tamah-pot nat tinam tamohop ev. Oñ aban takes moniñ bamah-hori akapuz zut ne nakez, povoz niin biñ nañamoh. ¹²Met God, orah rezah sandeñik aliz nasikaro ne nimaz homet gipiz nain hez, ma orah rezah nem monisir nonair naituz gamoñ biivai samohon 10 ravamahan gamö honeo bat nim tup ahomakeh biamoh.’ ¹³Pot pimauz abatao bat hel batat hat bon tovai aban mod takes moniñ boohap pataek rouvat het pim hori tovai emoohavoz homet zakep tat marañ teurat, ‘Mai oe,’ hat pim gagao tok rizat Godin epat mañ mañah, ‘O God, ne home horivonañap eveg, nemaz zakep tat neñiz,’ pot hah.” ¹⁴Met Iesu ñeti epov parun mañat maot epat mañah, “Rotap epat añoman ari hatevetei. Met God parupim mañevokaron hatevetehapuh pi takes monis boohapuz zakep tat pim horiv olahan maot pimatak sah, met modapuz zakep nat, pim home horiv am pinañ hehan sah. Met rotap aban tairap pimauz abatao bat hel batat hahopanez pop God maot bat hor batapanen abatao bonop ravapan, oñ tairap pimauz abatao bat hor batat hepanez pop Godihö pi abatavonañap bavatapan,” pot mañah.

Iesuhaz ñaro goeri bat emah

Matiu 19:13-15; Mak 10:13-16

¹⁵Met narah añarab nari parum ñaro goerih Iesu maras bizapan hat pihaz bat emah. Tahan pim mañairooh-abanari porin etet ñai mañat, “Sei, sei,” pot mañah. ¹⁶Tahan Iesu hatevetet aban porin epat mañah, “Evo, ari tovai paru bagaa batotunei, oñ ze manepeken ñaro goe okori nehaz bat emap. Met ñaro goe okori, ma parum zut ravat hepanezari Godiz masakavoz roketak hepan, povoz nehaz bat emap. ¹⁷Met rotap epat añoman ari hatevetei. Ñarohol parum papaholoz irih het tovai samahavoz zut aban tairap Godiz irih het natotuz pop pim masakavoz roketak rekot naketü,” pot hah.

Aban nonair naitunañapuz ñetiv

Matiu 19:16-30; Mak 10:17-31

¹⁸Met Zuda aban ahö nap Iesun epat at mañah, “Añairameñ tinap ae, met ne tair tohoman nem tin pohao het hemaz pov nanapan?” ¹⁹Pot mañahan Iesu piin epat mañah, “Met God nenap pi tinapug, ni tairaz nemaz tinap neen nañeñ? ²⁰Met ni ñeti kateñir ah ñe epeñiz hodad, Ni tovai aban modapuz añap botun, ma ni tovai mod nap men ñomotun, ma ni tovai givogï totun, ma ni tovai aban modapuz ñeti moregao haotun, met nim nonopur papapuz abatañ bat hel batat tin metovai sohoz.” ²¹Met pot mañahan aban pop Iesun epat mañah, “Met ne goerahanañ nim nañameñ-okat tin tovai emohot petev ñeti katë map hameñ-okon baval hat hatovai emamoh.” ²²Pot hahan Iesu piin etet epat mañah, “Met ni hon nen navoz tin homet nakez, povoz sat nimotü map bat gamö rezat

modari maneken monis nanapanen ni moni pos bat paru añarab moniñ bonori manovai sekepuh ni emeken deip honeo sohopain. Met ni pot tekë, povoz tokat abarah seken Godihö pohao het hekez hañ tin pov ni nanapanen bat hek.”²³ Pot mañahan aban pop ñeti povon hatevetehapuh pim nonair naitü ahoam oraeh, povoz pim lopori honoñai ahoam tat zakep heris ravat heh.

²⁴ Tahan Iesu pim loporih honoñai tahavon etet pot hah, “Met aban nonair nai ahoam biamahan oraezari kez tatahoh Godiz masakavoz roketak sat hepan. ²⁵ Met bol kamer ahö nap dimiñ meameg-ba napuz puoroh lip hat sapanez pap tat hepan, met povoz zut paru nonair nai ahotunañari Godiz masakavoz roketak sat hepanez bapap tat honoñai ahov tapan.” ²⁶ Pot hahan pinañ honeo heh-añarab pori hatevetet at mañah, “Ui erom, povoz tairari God pimeri bavatapanen tin hepan?” ²⁷ Pot at mañahan Iesu parun epat mañah, “Met añarab parumauhö añoh-okot rekot natotü, oñ God nonair nai mapotü tin tamahapuhö rekot paru poek sapanez nonor ba ou batapan.”

²⁸ Pot hahan Pitahö Iesun ñeti hañiv epat mañah, “Met ni hatevet, dei deimotur deimeri betet ninañ honeo dari ev emameg.” ²⁹ Pot mañahan Iesu parun epat mañah, “Ne rotap pimau arin epat añamoh, Tairap Godiz masakavoz ñetiv modarin mañapanez hat, pim zeir hamar ma añar ñaro ma nonor papar naner bos betet sohopanezap, ³⁰ Godihö ev ham eparah mamog bat het betet sohopanez potü ritou metat mod tin bat hepanez hañ potü ahoam pi manohopan. Tapanen pi tokat abarah pohao tin het hepan,” pot mañah.

Iesu ñomapanez bar mañah-ñetiv

Matiu 20:17-19; Mak 10:32-34

³¹ Met Iesu pim mañairooh-abanari bavizat pat naek honat epat parun mañah, “Erohol, arin epat añoman hatevetei. Met petev dari Zerusalem zeitak sakan ne Añaraboz Nanepuz ñetiv batam propet abanari menahan hez-potam netapanen rotapuv ou ravapan. ³² Met paru pot netapanez porah navat aban pat Godiz hodad nat hez-nari manapanen porihö nemaz ñeti horiv hat neen ñaike nañat gim lolov neñizat birepenañ nourat zirah nevizat ur noñomapan. ³³ Tapanen aliz nasikaro bon tapanen zeirevaizasik baviriri navatapanen ne maot bal haom.” ³⁴ Iesu pot parun mañah, oñ paru hatevetehapuh Iesuz pot mañahavoz kapot iz ravat hehan paru kut tat in balavi tat epat nae nap mañah, “Met ñeti tairao ok hamah batah,” pot hah.

Etañ kutap batin batah-ñetiv

Matiu 20:29-34; Mak 10:46-52

³⁵ Met nonoroh sohot Zeriko zeitaz totoi honoohan aban etañ kut tat et narë heh-nap non helevavok toutat pi añarab sat em toohan monis

manapan hat mañ mañohot heh. ³⁶Met aban pop poek het hatevetehan añarab ahovokaro nonoroh honohot haohan pi hatevetet epat at mañah, “Ae, met tairari ok emohot hamah?” ³⁷Pot hahan paru narihö, “Iesu Nasaret zeitakap ok nim totoi emamah,” pot piin mañah. ³⁸Tahan pi ñeo ñarah epat hah, “Iesu Devidiz ro iz mimip ae, ni nemaz zakep tat neñiz.” ³⁹Pot ñeo ñarah hahan añarab Iesuz garos emooh-pori kaev ravat, “Erom ae, ni tovai okat haotun,” pot piin mañah, oñ pi maot ahoam epat hah, “Devidiz ro iz mimip, ni nemaz zakep tat neñiz.” ⁴⁰Pot hahan Iesu gaa tat epat hah, “Ari piin ev nem totoi emapanez mañei.” Pot mañahan aban nari pim marasiz bat totoi emahan ⁴¹Iesu piin epat at mañah, “Met neohö ni tair netomaz hat nem abatao hameñ?” Pot mañahan aban pop epat hah, “Nem ahop, nem etañ kut tat hezaek ni haken maot tin etemaz zait toh,” ⁴²pot mañahan Iesu epat mañah, “Met nim homeo neohö batin navatomaz badae bateñ, povoz ni ok tin haraveñig eterë.” ⁴³Pot hahan pim etañ nen tapuraham ligilahan tin etehapuh pi Godiz biñ haovai Iesunañ honeo sah. Tahan añarab pinañ honeo hehari etet paru amun Godiz biñ ravah.

Sakiasiz tahat ñetiv

19 ¹Met Iesu Zeriko zeitak sa berevat am sapanez zeitazañ soohan, ²⁻³met aban takes moniñ boohariz aban ahö nap pim abatao Sakias pop pi monir zeirurumanañap, oñ pi aban tekup, povoz añarab ahovokaroz ñaravatak Iesu emoohan Sakias amun Iesun etepanez zait tat pi mazeo tovä ravat etepanez pap tahapuh, ⁴zuam garos ravat porü hat sahapuh zi namedek helat kañarah bahatak toutat het Iesu pim totoi emahan eteh.

⁵Met etet hehan Iesu pim irih honat piin et revah tat etehapuh pot mañah, “Sakias, ni hamarrah zuam ereken deip nim zeimakeh sat hepain.” ⁶Pot mañahan Sakias pi biñ ravahapuh zimedez bahatak toutat hehaekanañ maot hamarrah erat Iesun mañah, “Kar, emeken sopain.” Pot mañat parup bavizat pim zeimakeh sapanez soohan añarab ahovokaro hehaek etehapuh pot nae nap mañah, ⁷“Ui, met aban akap aban hori tamahapuz zeimakeh parup sapanez sahag etei.” Pot hat paru loporizaro kaev ravah.

⁸Tahan parup pim zeimakeh sa lokahapuh Sakias Iesun epat mañah, “Nem ahop, met nem nonair nai ahoam oraezaek baverat natü añarab bonori manom, ma añarab moreg metat monis givogï booh-pori moni posihar main ne namanotü, oñ neohö moni mod nasikaro nas revah bizoman ahö ravapanenahoh paru manom.” ⁹Pot mañahan Iesu epat mañah, “Erom, ni Abraamiz iz mimip non horioroh sooñiek petev beteñ, povoz nimerinañ ari ze epamakeh hezari ne maot Godizari ba avatat non tinaoroh eñehog ari poek hezei. ¹⁰Met ne Añaraboz Nanep paru tairari

non tinaorö betet tokat hañ horiv bapanezat ravat samah-poriz ne mel tat paru maot neneri bavatat non tinaoroh meñeman sohopanez hat emoh,” pot mañah.

Gog abanari monis manah-ñetiv

Matiu 25:14-30

¹¹Pot mañahan añarab hatevetet epat homeh, Peti pi Zerusalem ze ahö potak sapanen pi añaraboz aban ahop bavatat meñepanen darimaz tin korav ravat hepan. Pot paru ganö homeoh, povoz Iesu parun ñetiv epat mañah, ¹²“Met aban abat ahovonañ nap pi ze hotoh natak sapanez homet heh. Met poek sapanen gavman aban ahop pim ze heh-posiz korav ahop bavatat meñepanen pi maot emat pim ze posiz ahop ravat hepan. ¹³Pot homeh, oñ garos pi poek nas heh-porah pim gog abanari 10 poriz as hahan emahan paru honep honep monis 20 kina 20 kinahar manat epat mañah, ‘Met ne sat hemaz porah moni anoh-epeñinañ gogoñ tohopeken tair ravapanen tokat ne maot emat moni revah bepekez poñ honeo epeñinañ ne bom,’ pot mañat sah. ¹⁴Met pim zeitakari pimaz ahoam kaev ravat heh, povoz ze hotoh potak sapanen parum ahop bavatat meñepanez hat sah-pov paru hatevetet aban modap pim tokat meehan sat gavman aban ahopun epat mañah, ‘Met dei aban okop deim korav ahop ravat hepaneze kaeveg, ni deim ahop ravat hepaneze bavatat meñetun.’

¹⁵Pot sat mañahan aban paru pimaz kaev ravat heh-pop am parum korav ahop hepaneze bavatat meñehan heh. Tahan pi maot pimatak emahapuh pim gog aban moniñ manat sah-pori moni manah-poñinañ gogoñ toohan tair ravah-ñetiñ mañapanen hatevetepan hat asiv meehan sahan emah. ¹⁶Met garos emah-pop ahopun epat mañah, ‘Erom ae, ni eterë, monis naneñin ne maot gogot tat moni 200 kina epeñ bat revah bizohon oraehaek ev.’ ¹⁷Pot mañahan pi pat, ‘Erom, ni nem gog aban tinap, gog avit nanohon tin korav ravat heñ, povoz petev ni ze 10 potakaroh hez-añarab poriz korav ravat hekë.’ ¹⁸Pot mañahan aban modap emat piin pot mañah, ‘Erom ae, met nim monis naneñin ne moni gogot tat moni 100 kina bat revah bizohon oraehaek ev.’ ¹⁹Pot mañahan pim ahop pat, ‘Tin teñ, povoz ni ze 5 potakaroh hez-añarab poriz korav ravat hekë.’

²⁰⁻²¹Pot mañahan modap emat epat piin mañah, ‘Nem ahop ae, met ni aban kez modariz zakep natap, ma modarihö gipiz mapotü ñedeamahan nimauhö emat belat bameñip, ma modarihö moni gogot tamahan nimam hañiv bameñ, pot nimaz mod narihö hahan ne hateveteohö, povoz moni gogot tomaz nañeñiek, ganö toman nim monis bon tapan hezavoz ne ñaihet tat moni 20 kina naneñ-pos am dim giv tet narah el hatat ba iz batohon hehaek eveg, nimau maot ba.’ ²²Pot mañahan pim ahop pat,

‘Met ni aban hori bisin gogot natap, met nimauhö okat nañeñivoz homet epat nañom, Met ni nemaz aban modarihö gipiz ñedeamahan nemauhö belamohop ev, ma modarihö moni gogot tamahan nemam hañiv bamoh, pot nañahan ni hatevetet barotap bateñ. ²³Povoz bonaiz nem moni nanoh-okos am basat moniñ biameg-zeimakeh bizeken oraepanen nemau emat moni okos bovai moni revahas honeo bom nak, oñ ni ganö teñ.’ ²⁴Pot mañat totoi het hateveteoharin epat mañah, ‘Met ari pim moni bat hez-okos bat aban moni gogot tin tat moni ahos 200 kina bat hez-okop manei.’ ²⁵Pot parun mañahan paru hatevetet epat piin mañah, ‘Erom ae, met moni 200 kina pi havat hezag, tairaz okat hameñ?’ ²⁶Pot hahan pi pat, ‘Met rotap epat añoman hatevetei. Met aban tairap ne nai manoman tin korav ravat hepanez pop mod nai amun manoman bat hepan, oñ tairap tin korav naravotuz pop manomaz poi pihanañ maot bat aban modap manom. ²⁷Met nemaz kaev ravat ne zeï epesiz korav narav hemaz hah-pori ev nem havasiz nakoe bat emepeken ne etet heman men ñomei.’ Pot aban ahö pop hah.” Pot Iesu ñetiv parun mañah. ²⁸Met Iesu ñeti pov parun mañahapuhoh Zerusalem zeitak sapanez garos ravat soohan paru pim tokat sooh.

Iesu Zerusalem zeitak sah

Matiu 21:1-11; Mak 11:1-11; Zon 12:12-19

²⁹Met sohot dañ nao Oliv mañamah-povoz totoi Betpasir Betani zeï potakaroz nakoe sat hehapuh pim mañairooh-abanarihanañ nañariv garos sapanez meet ³⁰pot mañah, “Met arip zeï totoi aripim etet hez-okatak sat etepeken zeï namakez dorovok bol donki ro nap napuhö hel natout hezap kitï urapanen hepanen etet bitom baviat ev bat emei. ³¹Met baviat bat emepekez tohopeken napuhö, ‘Tairaz arip emat bol okop baviameg?’ pot at añapanen, epat mañei, ‘Darim Amip bol donki epop bat sakan gog nav tapanez hahan deip ev emat bameg,’ pot mañei.” Iesu pot mañat meehan sah.

³²Met Iesu parup sapanez mañahan mañairooh-aban poñariv sat Iesuz hahat tahan hehan parup etet, ³³bol donki rop baviroohan aban mauri etet epat at mañah, “Ae, met tairaz ari deim donki okop baviameg?” ³⁴Pot at mañahan parup pat, “Met darim Amip epop bat sakaz hahan emeg.” ³⁵Pot hat donkip baviat Iesuhaz bat emahapuh mañairooh-abanari parum dim revahari donki ropuz revah Iesu toutapanezaek bizahan pi helat toutah. ³⁶Tahan añarab ahovokaro parum dimir giv revahatü taput tat nonoroh betevai soohan Iesu donkipuh toutat het potuz revah sooh. ³⁷Met sohot pi Oliv dañevok hehaekanañ nonoroh er horat soohan añarab ahovokaro pinañ honeo emoohan ñetiñ mañovai emooh-pori Iesuz gog navor nao tovai emoohan eteohavoz homet Godiz biñ ravat pim abatao bat hel batat ñeo ñarah epat haovai emooh,

38 “Darim Amip ev Godiz abat ahovonañ emamah-epop tin metohopan. Met abarah pinañ honeo hezari tin hepanen dari Godiz abatao bat hel batovai sook.” *Buk Song 118:26*

39 Met pot haovai soohan Parisi aban nari añarab poriz ñaravatak soohaekanañ kaev ravat epat Iesun mañah, “Erom ae, ni eperin mañeken bon tap.” 40 Pot mañahan Iesu pat, “Met rotap epat arin añom, añarab eperi nemaz hamah-okov nak hepan, povoz heleñ bal hat parum hamah-okat hahopan,” pot Iesu parun mañah.

Iesu Zerusalem zeitakariz iñ hah

41 Met Iesu Zerusalem zeitaz totoi sa berevat zeï potan etehapuh pi añarab poek hehariz homet zakep tat iñ hah. 42 Tat epat hah, “Met ari añarab zeï epatakari, Godinañ tin honeo hepekez nonoroz hodad hegitin tin ravah narab, oñ petev pi ba iz batahan hezaek ari bapap tat hez. 43 Povoz tokat arimeriz kaev ravat hepanez nari emat arim zeï epat barom emeet hel temerah hamar ahoam betevai sa em tapanen helat hel temeranañ karah karah ravapanen paru rao rao emat 44 arim zeï okatak lokat añarab okoek hepanezari map men ñomat arim hel zeï okoñ ur edat heleñ map bavetepanen main main ravat oraepan. Met God pim nonoroh eñepanez hat emahan ari kos rez maneg, povoz tokat arimaz kaev ravat hepanez pori emat ev hahö-okat etapan,” pot mañah.

Iesu aban nair nai biit zum toohari ruah *Matiu 21:12-17; Mak 11:15-19; Zon 2:13-22*

45 Met Iesu Godiz tup ahomakez temeraz kohat lokat etehan aban nari ideholor anumaihol bizat zum tohot heh.ⁱ Met pot tahan hehan Iesu emat etet mogao tahapuh ruovai 46 epat mañah, “Met Baiñetinavoz Tepatak epat menahan hez, Nem tup ahomak añarab nemaz homet mañeo nañohopanezamak ev. Pot menahan hez, oñ ari ñeti pov ba iz batat añaraboz moni ahos moreg metat bamegiek givogï tamegivoz zut ravamahan pim tup epamak bahori batameg,” pot mañah.

47 Met Iesu Zerusalem zeitak tup ahö pomakeh aliz mapoñik pi lokat Godiz ñetiv añarabon mañohot heh. Toohan paru aban anumaihol bareñ elat mañarooh-poriz ahorir aban ñeti kateñiz mañairoholor aban korav ahö modari pi ur ñomapanez zait tat 48 nonoroz mel tooh, oñ añarab ahovokarohö pi parun mañoochan zaitivonañ tinam hatevetehot heh, povoz aban ahori pi ur ñomapanez non naorö bon heh.

ⁱ 19:45 Pavar 45 -Met pori añarab bat Godiz homet bareñ elohopanez hat bat em bizat zum tat monis bohohot heh.

Pim tovai emoohavoz at mañah*Matiu 21:23-27; Mak 11:27-33*

20 ¹Met aliz nasik Iesu Godiz tup ahomakeh het añarabon pim ñeti tinao mañohot hehan paru aban anumaihol bareñ elat mañaroohariz ahorir aban ñeti kateñiz mañairaholor aban korav modari emat ²piin epat at mañah, “Erom ae, met tairapuhö ni ahop ba navatat gog tovai emameñ-okoñ tookez nañahat emat ok tameñ?” ³Pot at mañahan Iesu pat, “Met ne garos arin amun navoz at añoman hañiv nañepek. ⁴Met God Zoanin mañahan añarab ivov memeoh, ma hamarrah aban napuhö mañahan tooh?” ⁵Pot at mañahan parumam giz ñun ñun epat nae nap mañah, “Met dari, ‘Godihö Zoanin mañahan tooh,’ pot hakan pihon, ‘Met tairaiz pi ñetiv haañoohan ari barotap navat toog?’ pot darin añapan hez. ⁶Ma pin, ‘Aban napuhoam Zoanin mañahan tooh,’ pot mañakan añarab mod eperi hatevetet Zoan pi Godiz propet abanap ravat heh, pot paru pimaz homet hez, povoz dari mogao etat heleñ bat ourapan hezavoz dari piin hameg-epat namañotü.” ⁷Pot nae nap mañat Iesun hañiv epat mañah, “Met Zoaniz het toohavoz kapot dei unun.” ⁸Pot mañahan pi pat, “Kar, ne arin Zoaniz toohavoz at añohon hañiv nanañ teg, povoz ne amun arim tairapuhö neen nañahan tamoh-kap pot arin bar naañotü,” pot Iesu parun mañah.

Avasiz korav ravat hehariz ñetiv*Matiu 21:33-46; Mak 12:1-12*

⁹Iesu pot mañat maot aban naritü bavatat ñetiv añarabon epat mañah, “Met aban nap pim ham ahö nar hehaek avas menat greip mar nañ elat ñedeh. Tahapuh aban mod nari korav meñet pot mañah, ‘Met ari uloñ badat utap tapanen bain ivov matut tepekepuh nemaуз nao nevizat nao arim bei.’ Pot mañat paru korav meñet aban maup hotoh pataek sat heh. ¹⁰Met sat hehapuh tokat aban mau pop pot homeh, Peti nem greip uloñ avasik utap hatahan bain ivov matut tahao ev, pot homet pim gog aban nap av posik korav heharihö bain ivov manapanen bat emapanez hat meehan sah. Tahan aban korav heh-porihö meehan sah-pop iv pov manapanez kaev ravat biñinañ urahapuh upaip meehan maot sah. ¹¹Pot metahan emahan aban avasiz maup gog aban mod napuhoen meehan sahan aban korav hehari hori taput metat biñinañ urat bahori batat upaip meehan maot sah. ¹²Tahan tokat maup gog aban mod napuhoen meehan sahan aban korav heh-porihö taput urat betehan maot sah. ¹³Tahan av posiz maup pot hah, ‘Tair tom batah? Met nem ro tin ne pimaz ahoam zait tat hezap meeman sapanen paru, ‘Ae aban ahop ev,’ pot hat pim ñeo hapanen paru hatevetepan.’ Pot hat pim rop meehan sah. ¹⁴Tahan paru avasiz korav hehari ro popun etet epat nae nap mañah, ‘Ae, av epesiz

maupuz rop ok meehan emahag, etei. Met papapuzatü pihar bapan hezag, dari pi zuam bat ur ñomakapuh av epes darim pohao bak.’ ¹⁵Pot hahapuh pi basat avasiz bin binivok betet ur ñomah.” Pot ñetiv mañat aban poek hatevetet heharin epat at mañah, “Met tokat greip avasiz maup emat aban av posik korav hehari tair metapan ari homeameg? ¹⁶Peti pi emat aban hori pori map men ñomapan. Tat aban tin av posik korav ravat hepanez nenari meñepanen hepan.” Pot mañahan añarab hateveteh, met pi parumaz homet ñeti epov hah, povoz epat paru hah, “Evo, hameñ-okat dei etapanez kaev.”

¹⁷Pot hahan Iesu parun etet epat mañah, “Met Baiñetinavoz Tepatak ñeti epov menahan hezaek ari rekö hameg,

Met aban nari zeì namak demapanez bah nar bat etet, ‘Horir ev,’
pot hat betehan oraehan bah tapur zeimakez tok bah kapot tatar
bavatah. *Buk Song 118:22*

Met pot menahan hezavoz kapot tair homeameg? ¹⁸Met aban nap bah porah baholat ñodapan, povoz pim aboi ur kelapan, oñ bah porahö aban napuz revah ñodat urapanezaek map sak elapan,” pot mañah. (*Met Iesu pimauz homet baharati bavatat parun pot mañah.*)

¹⁹Met Iesu ñeti epov mañahan aban ñeti kateñiz mañairaholor aban anumaihol bareñ elat mañaroohariz ahori hatevetet pot homeh, Peti pi darimaz homet aban korav hoririti bavatat ñeti okov hah, pot paru hodad ravah, povoz pi bat demapanez homet heh, oñ añarab poek hehari pimaz ahoam zait tah, povoz paru Iesu bapanen añarabohö paru bahori batapan hezavoz homet ñaihet tat pi nav, oñ am heh.

Takes monis manoohavoz at mañah

Matiu 22:15-22; Mak 12:13-17

²⁰Tahapuh met pi bapanez nonoroz am mel tovai aban mod nari pi hehaekaz meepanez tat parun epat mañah, “Met añarab modariz tamahavoz zut ari pim nakoe sat at mañohopeken pi ñeti hori nao hapan, povoz dari rekot pi bat gavman ahori haz basakan pi ñevok bizat pim ñetiv hatevetepan.” Pot mañat meehan paru aban moreg metapanez pori Iesuz nakoe sah. ²¹Tat epat piin at mañah, “Añairameñip ae, met ni aban ñeti rotapuñihar hameñip. Tat ni dei añarab kaev ravakaz homet nakez, oñ aban ahö ravat hezarir betezari dei mapori ni Godiz nonoroh tin sookaz ñeti rotap povohar añañameñip, povoz niin at nañakan hatevetet hañiv dein bar añ. ²²Met dari takes monis Sisa popuz gavman abanari manameg-pov tin, ma horiv ok tameg? Ni tair homeameñ?” ²³Pot at mañahan Iesu parum pi moreg metapan hat at mañah-pov zuam hodad haravahapuh pi parun epat mañah, ²⁴“Met moni hel nas bat neen nañairei.” Pot mañahan paru moni nas batezat piin mañairahan pi etet parun at mañah, “Met akö epopur abat epov tairapuzao ev?” Pot hahan

paru epat hah, “Met Sisaz akopur abatao ok.” ²⁵ Pot hahan Iesu ñeti hañiv parun epat mañah, “Met povoz tairatü Sisa aban ahö popuz au ravat hez-potü paru manei, oñ tairatü Godiz au ravat hez-potü pi manei.” ²⁶ Pot mañahan paru home midin tat heh. Met paru añaraboz ñaravatak hehaek pi ñeti hori nao hapanen ñevok bizapan hat at mañah, oñ pi ñeti tinao hahan paru hañiv mañapanezao bon, povoz paru ñeti hañiv piin namañ.

Añarab ñomat maot bal hapanez Iesun at mañah

Matiu 22:23-33; Mak 12:18-27

²⁷Met paru Sadiusi aban porihö ñomamahari maot bal nakaotü, pot haoharihanañ-nari emahapuh, ²⁸Iesun epat at mañah, “Añairameñip ae, Mosesihö ñeti darim tovai sookazao pot menahan hez, Met aban nap añap bat het ñaro navat hepanepuh ñomapanen aban popuz bosip hepanezaek añ hapurü pop bapanepuh ñarohol batapanen pim nanepuz ñarohol ravapan, pot menahan hez. ²⁹Met ñeti nao epat amun niin nañakan hatevet. Met aban nari 7 batahan heh. Tat nanë garosikap añap bat hehaek ñaro nap navat het abup ñomahan, ³⁰pim bos tokatizapuhoz añ tapup bat pi amun ñaro navat het ñomah. ³¹Tahan mod tokatip amun añ tapup bat ñaro navat het ñomah, met aban 7 pori añ nen popuam bat ñarohol navat bonoam het ñomovai sohot map bon tah. ³²Tahan tokat añ popuhoz ñomah. ³³Met aban 7 porihö añ hon nen pop bat ñomovai soohan paru maporiz añap pot ravat heh, povoz tokat ñomamahari bal hapanez ari hameg-porah añ pop abü tairapuz añap ravat hepan?”

³⁴Pot at mañahan Iesu ñeti hañiv parun epat mañah, “Met petev ham eparah añarab het nae nari bamah, ³⁵oñ tokat God hapanen ñomapanezaekanañ maot bal hat tin hepanezi porihö porah nae nari navotü, oñ am hepan. ³⁶Met porihö bal hapanezaek pim ñarohol ravat het enzoliholoz zut hepanepuh maot nañom pohao het hepan. ³⁷Met ari añarab ñomat maot bal nakaotü, pot hamegivoz ne arin epat añom. Met Moses tepatak añarab ñomat bal hamahavoz ñeti nao pot menahan hezaek ari rekö hakameg, oñ tair tat ari tin hodad narav? Met zi namedek itañad rai rai hat bon narav hehan Godihö Mosesin epat mañah, ‘Moses, ne nim iz mimihol Abraamir Aisakir Zekopoz korav ravat hezap ev,’ pot piin mañah. ³⁸Met God ñomat bon tamahariz korav narav, oñ pi eteamahan añarab mapori biririam hezaek pi korav ravat hez. Povoz porihö ñomahaekanañ sat pinañ biriri hez, pot arin ev añamoh.” ³⁹Pot mañahan aban ñeti kateñiz mañairaholohanañ nari epat hah, “Okat hat ni ñeti tinao añeñ.” ⁴⁰Pot hat paru at ñe modañ at mañapanez bapap tat am heh.

Iesu Sadiusi narin Kristoz kapotaz at mañah

Matiu 22:41-46; Mak 12:35-37

⁴¹Met Iesu añarab porin maot epat mañah, “Met aban nari arin epat añamoh, ‘God Kristo ari eñizapanez au hahan hez-pop pi Devid ahö ravat

heh-popuz ro mimip ou ravat hepan,' oñ pot arin añamahavoz homet epat añoman ari homei. ⁴²Met mamog Devid Buk Song Tep potak epat menahan hez,

Godihö nem Amipun pot mañah, 'Nem mar giñasiz nakoe ev emat touteken,

⁴³ nimaz kaev ravat hepanez pori bat hor batat nim eñañiz irih neohö meñeman ni parum revah hekë.' *Buk Song 110:1*

⁴⁴Met ev Devid Kristo popuz homet, Nem Amip, pot hah-pop tair tat pim ro iz mim nenap ou ravapan?"^j Pot pi parun at mañah.

Aban ñeti kateñiz mañairoholoz mañah
Matiu 23:1-36; Mak 12:38-40; Ruka 11:37-54

⁴⁵Met pot mañahan añarab hatevetet hehan Iesu pim mañairooh-abanarin maot epat mañah, ⁴⁶"Met ari tovai paru ñeti kateñiz mañairaholoz tamahat totunei. Met paru pori parum dim tovë tinari meamahapuh añarab togü manat hezaek sat biñ ravat het sarem tamahan añarab parun etet, 'Deim ahoi ae,' pot mañohopanez paru zait tat het pot tovai samah. Met arim topour zeñik lokat topourameg-porah paru pori sat garosik tek tinañik toutapanez paru zait tat toutamah, ma gipizor anumai bareñat biñ ravat topourat nameg-porah paru bol ahö tinañihar parum bat napanez zait tat an tat bamah. ⁴⁷Met aban pori paru amun añ hapuriholoz zeñik sat meñizamah bon, oñ paru sat añ hapurihol moreg metat parum nonair naitur zeñ parum bamahan añ pori betez hez. Met paru pot tamaharihö modari parun etet, 'Mañeo tin hamahari ok,' pot hahopanez hat mañeo toveam beri haz hahot hez. Met paru aban pot tamah-pori tokat ñevok bizat hañ hori ahov manapan, povoz ari hodadeo bat parum tamahan añoh-epat tovai totunei." Iesu parun pot mañah.

Añ hapurip moni bizahasiz ñetiv
Mak 12:41-44

21 ¹Met pot mañat Iesu etehan Godiz tup ahö pomakez romevok pimaz homet moniñ bat emat bizoohaek aban monir zeirurum ahotunañari moni ahoñ bat em bizooch. ²Tahan pi etet hehan añ hapuri monir zeirurum bon nap haret pim moni mav nasikaro nen bizahan oraehat bat emat bizah. ³⁻⁴Tahan Iesu epat hah, "Met paru aban okori parum monis ahoam oraenzaek nañ bat em bizahan ahoam am oraenz, met añ hapuri okop pim monis oraepanez homet nakez, oñ am map bat em

^j 20:44 Pavar 44 -Met Kristo pi pohao hezap ok, povoz Devidiz ahop heh, oñ hamarah Maria batahan abanap ravahaek pi Devid tapupuz ro iz mimip ou ravah. Met Parisi aban pori, Iesu pi Kristo Godihö meepeanez au hahan heh-tapup ok, pot pimaz hom namee, povoz Iesu at ñe pov parun mañahan hañiv hapanez bapap tah.

bizah, povoz añ okop moniñ ahoam Godiz taevavok ok bizah, oñ aban mod moniñ ahoam bizah-okori Godiz taevavok aviam ok bizah,” pot mañah.

Tup ahomak hori ravapanez mañah

Matiu 24:1-2; Mak 13:1-2

⁵Met Iesu pot mañat bon tahan pim mañairooh-aban narihö epat piin mañah, “Añairameñip ae, met hel tin ahoñinañ tup tin demahan hez-epamaker nonair nai tinatü añarab Godiz homet bizah-epotun ni eterë.”

⁶Pot hahan Iesu ñeti hañiv parun epat mañah, “Erohol, ari tup ahö epamaken etet hamegivoz ne rotap arin epat aňom. Met paruhö tup tové epamak heleñinañ tin kez demovai helahan hezaek aban ñai narihö map ur edapanen ñodat, hel nao hel modavoz revah naoraetü, oñ map mainor pain ravat oraepan,” pot mañah.

Honoñai mapoñ ou ravapan

Matiu 24:3-14; Mak 13:3-13

⁷Met Iesu pot mañahan pim mañairooh-abanari piin epat at mañah, “Met tairarah nim tup epamakez ñeti hañ-okov tapan? Ma tairañ garos ou ravapanen etet dei hodad tat, ‘Rotap pim añah-pov totoi ravahan ev tah,’ pot hak? Povoz ni dein bar añeken hatevetet hodad tak.” ⁸Met pot mañahan Iesu ñeti hañiv parun epat mañah, “Met ganö aban nari epat moreg arin etapan hezavoz tin homet etevai sohozei. Met tokat aban narizaro honep honep emat nem abatao hat pot moreg aňohopan, ‘Met ne tapup ev,’ pot hapanen mod nari emat, ‘Kristo ou ravapanez hahan hehao ou haravah,’ pot hapanen ari barotap batat paru pot hapanez porinañ honeo ravotunei. ⁹Met tokat zei ñai ahov ou ravat nae nap menohopanen ari hatevetehopek. Ma aban nari ñai tat gavman aban ahori menat ruohopanen ñetiv hahopanen hatevetehopek. Tat ari zuam zageri tat ahoam home midin totunei, oñ tapanez pov am tohop, met pot tapanez porah ne zuam naemotuzarah ok. ¹⁰Oñ añarab nari zei nasikanañ bal hat emat zei modasikarinañ nae nap menohopan, ma aban togü nat bal hat sat aban togü modatanañ nae nap menohopan. ¹¹Ma zeisikaroh gin ahov berevohopan, ma hamarrah do do ahoñ tohopan. Ma añaraboh lam horiv ou ravat hepan, ma abarah red ahö navor nao ou ravapanen añarab etet ñaihet pimau tat hepan.

¹²Met garos pot natotuz porah ari nari avat sat paru ur kakam etohopan, ma arim topour zeñik ari nari lokepeken aban ahö ravat hepanez-pori avat ñevok evizat kakamavoz zeimakeh emerizohopan, ma paru ari nem abatao hahopekezavoz kaev ravat ari nari beri akahopanepuh avat sat gavman aban ahoriz nakoe eñehopanen hepek.

¹³Tapanen arihö rekot nem ñeti tinao paru porin amun bar mañohepek.

¹⁴Met paru ari avat sat ñevok evizohopanez porah ari ñaihet tat home midin tohopekepuh, ‘Dari hañ tairao hak?’ pot homehotunei, ¹⁵oñ ne arim hahopekezat hodad tinao anohoman, ari hodadeo bat ñeti tin navor nao mañohopeken paru hatevetet, Ui ñeti hañ tairao eperin mañak batah, pot paru homet pap tat hepan.

¹⁶Met aban nari parum naner bos tairari nemaz homet hepanezariz kaev ravat bat ñai abanari manohopanen paru bat men ñomohopan. Ma papahol amun taput parum ñarohol metohopan. Ma ñaro nari amun parum nonor papaz zu taput metohopanen men ñomohopan. ¹⁷Met ari nemaz homevai emohopekezaek añarab mapori arimaz kaev ravat mogao etohopan. ¹⁸Met pot etohopanen God arimaz korav ravat hepan, povoz ari tovai ñaihet totunei, ¹⁹oñ rez kek tat kaev narav hepek, povoz ari nenañ honeo pohao tin het hepek.” Pot Iesu parun mañah.

Honoñai ahov berevapanezao

Matiu 24:15-21; Mak 13:14-19

²⁰Met Iesu pot mañat maot epat mañah, “Met ñai abanari ahovokaro emat Zerusalem zeï epat barom meeapanen ari etet epat hapek, ‘Rotap emenat zeï epat map bahorï avatapanez ev tah,’ pot hapek. ²¹Met tokat pot etapanez porah añarab Zudia zeisik hepanezari parum zeïñ betet paru bareet dañeñik sapan. Ma paru Zerusalem zeï epatak hepanezari zeï epat betet sapan, ma añarab adasik hotoh sohopanezari maot zeï ahö epatakaz naemotü, oñ poekanañ am bareet naekam sapan. ²²Met pot tapanez hamoh-porah God hapanen Zerusalem añarab horï tovai emamahavoz hañiv bapan. Met batam aban nari ñeti epov Baiñetinavoz Tepatak menahan hez-povoz rotapuv tokat hamoh-porah ou ravapan. ²³Mai zakep, met pot tapanez porah añ ñaro ñekeñinañ ravat hepanezari, ma añ ñarohol maok batat apetei manohopanezari paru bareet bar baram sapan, pot homeamoh. Met porah God mogao tat hapanen horivor honoñai ahö mapoñ Zuda añarabotï ou ravapanen hatevetepan. ²⁴Met ñai aban emapanez pori añarab nari en raveñinañ men ñomapan, met mod nari kez tat basat zeï patatak kakam zeimakeh memerizapan. Tat ñai aban pori Zerusalem zeit map ur edat mez horï batapanen betezam hepan. Oñ tokat God maot hapanen ñai aban pori zeï pos betet maot sapan,” pot mañah.

Añaraboz Nanep maot erapan

Matiu 24:29-31; Mak 13:24-27

²⁵Met Iesu pot mañat maot epat mañah, “Met porah gitapur ñonisir zeizañ parum petev tamah-okat betet pat navor nao tohopanen añarab etet basat em tat hepan. Ma hamarrah iv haveñ ahö ravat ñai horiv tohopanen añarab ñaihet tat, ‘Tair tat okat tamah batah,’ pot hahopan.

²⁶Tapanen abarah zeizañir nonair nai hezatü parum non samahañ betet patatü betez betez sohopenen añarab etet dei dei tat epat hahopan, ‘Met ham eparah hori tairao ou ravapanezavoz akat tamah batah?’ pot hahopan. ²⁷Tapanen ne Añaraboz Nanep kez ahovor aliz ahovonañ unitak rouvat eroman paru neen etepan. ²⁸Met nonair nai hori añoh-potü kapot tat ou ravohopenen ari ñaihet totunei, oñ tin bal haz rouvat epat homehopek, Met pi maot emat eñizat tinaek eñepanen tin hekaz hahan hez-pov totoi ev haravah.” Pot Iesu parun mañah.

Ziñin etet hodad ravameg-ñetiv

Matiu 24:32-35; Mak 13:28-31

²⁹Pot mañat Iesu ñeti modao epat mañah, “Met zi mapoñiz tamahat ari homei. ³⁰Met zi geleñ berevat zi tae mageñ meet het tor ravovai samahan ari etet epat hameg, ‘Git kezao ravapanez ev tah,’ pot hameg. ³¹Povoz zut tokat ari etepeken nonair nai añamoh-epotü ou ravapanen, ‘God añaraboz korav ravat hepanezao ev ou ravapanez tahan okat tah,’ pot hapek. ³²Met ari hatevetei, Zuda arim nari am hepanen hamoh-epotü ou ravapanen etepan. ³³Met tokat abarar hamarar nonair nai map bon tapan, oñ nem haovai emamoh-mapoñ pohao am het hepanepuh bon natotü,” pot mañah.

Parumauz tin korav hepaneze mañah

³⁴Met pot mañat Iesu maot epat parun mañah, “Erohol ae, arimauz tin korav ravat hezei. Met ham añarab nari gipiz ahotü novai iv kezañ nohot rumurovai ham eparaz nonair naituz ahoam homevai samah, oñ ganö ari unun hepeken ne maot emom hezavoz ari tovai parum tamahat totunei. ³⁵Met nem emomaz pov, emap bivok mezamahan zuam pek hat bamahavoz zut zuamam zeir ham maposikaroh añarabotü ou ravapan. ³⁶Povoz orah rezah ne maot emomaz homet etet hezei. Tat God ari kezao anohopanez hat mañ mañohopeken horivor honoñai tairañ ariti ou ravohopanez añoh-poñ ou ravapanen ari rez kek tat kez tovai sohot hori naravotü, oñ emomaz porah nem taevavok tin rouvat hepek,” pot mañah.

³⁷Met Iesu orah rezah Godiz tup ahomakez temeraz kohat lokat het añarabon ñeti tinañihar mañohot hehan kutur ararao ravooohan pi poekanañ sat Oliv dañ povok orooh. ³⁸Met pi pot tohot heh-porah añarab ahovokaro pataraham bal hat tup pomakez romevok sat hehan pi emat parun ñetiv mañoohan paru zaitivonañ het hatevetehot heh.

Zudas paru Iesu bapanez hah

Matiu 26:1-5,14-16; Mak 14:1-2,10-11; Zon 11:45-54

22 ¹Met berë tu nak hepaneze poñ nohopanez aliz poñiz garosikas pim abatao Pasova mañooh-pos totoi ravah. ²Tahan aban

anumaihol bareñ elat mañaroorhariz ahorir aban ñeti kateñiz mañairahol topourat paru epat nae nap mañah, “Met añarab mapori zeï epatak emat hezaek dari tair tat Iesu bat ur ñomak? Met dari pot takan añarab eperi etet kaev ravat ñai tat dari emenapan hez.” Pot paru hah.

³Met porah Seten Iesuz mañairooh-aban nap Zudas pim abat modao Iskeriot popuz loporih hodadeo manah. ⁴Tahan pi sat aban anumaihol bareñ elat mañaroorhariz ahorir tup ahomakez korav hehari, Iesu mañairapanen bapanez parun bar mañah. ⁵Tahan paru aban ahö pori ñeti povon hatevetet biñ ravahapuh paruhoen pi moni nas manapanen Iesun mañairapanez mañahan, ⁶Zudas gu hat añarab bon hepandez narah Iesun mañairapanen, paru pi bapanez nonoroz mel tooh.

Mañair aban nañariv gipiz arö tah

Matiu 26:17-25; Mak 14:12-21

⁷Met berë tu nak hepandez aliz poñiz garosizasik Zuda parumeri meñizahan tin hehavoze homehopanez hat bol sipsip rop urapanen napanez pos^k al tezahan ⁸Iesu Pitar Zon meepeze tat epat mañah, “Met arip sat darimeri meñizahan tin heh-poveze homet anumair gipiz nakaz potü arö tat bizohopeken dei emakan dari nak.” ⁹Pot mañahan parup epat hah, “Met deip taek sat pot tookan ari emepeke?” ¹⁰Pot hahan pi parupin epat mañah, “Met arip zeï ahö akatazañ sohot etepeken aban nap iv ñerë ahovok ivov holat nonoroh emat arip zeï anat mamog ravat sapan. Tapanen arip pim tokat sohot etepeken pi sat zeï tairamakeh lokapanez ¹¹ pomakeh arip amun sa lokat aban maupun epat mañei, ‘Met darim añairamahap epat hat deip emeehan emeg, “Nem mañairamoh-abanarinañ darimeri meñizoohavoze homet toutat anumair gipiz nakaz zeï giruv taek ev hez?”’ ¹²Pot piin at mañepeken pi zeï girü ahö agarë revah navok tin tapanen hepandezavon añairapanen arip zeï girü povok darim anumair gipiz nakazatü arö tat bihohopeken dei emak.” ¹³Met pot mañat meehan aban poñariv sat etehan Iesuz mañat meeh-pot ravahan parup tovai sahapuh parumeri meñizoohavoze homet napanez anumair gipiz arö tat bizooh.

Iesu beretar bain ivov manah

Matiu 26:26-30; Mak 14:22-26; 1 Korin 11:23-25

¹⁴Tahan paru gipiz napanez Iesur pim aposor abanari emat togü manahapuh ¹⁵pi parun epat mañah, “Met ne kakamao hatevetemaz pov narav hez-eparah arinañ honeo darimeri meñizoohavoze homet gipiz epotü dari honeo nakaz neeh zaitiv ahoam hez. ¹⁶Met rotap epat arin añom, Ne petev ev hamarrah arinañ het namoh-epotü maot nainotü, oñ

^k 22:7 Pavar 7 -Met aliz posiz abatao Pasova pot mañooh.

tokat God añaraboz korav ahop ravapanez porahahoh darimeri metooh-epovoz kapot tin ou ravapanen ne maot nom.”

¹⁷Pot mañat Iesu bain ivov kapurah mañar bizahan hehaek Godin biñ mañat pot hah, “Ari mapori epov bat novai sei, ¹⁸met ne bain iv epov arinañ honeo ev het noh-epekanañ maot nain hemapuh tokat God añaraboz korav ahop ravapanez porah ne iv magei nao maot nom.” ¹⁹Pot mañat pi beret bat maot Godin biñ mañahapuh bapezat pim mañairooh-abanari manat epat mañah, “Nem aboi ev, ari bat nei. [Met nem aboi arim horivoz hañiv ravapan, povoz petev kapot tat nat nemaz homet am tokat novai sohozei.” ²⁰Met pot mañat manahan nah. Tahan pi bain ivov kapurah mañar meehan hehaek bat epat mañah, “Met Godiz au hahan hezat non mageiorö ou ravapanez ne nourapanen nem uveo non hamoh-poorö ba ou batapanez homet bain iv epov ari anom.”] Pot pi parun mañah.

²¹Tat maot epat mañah, “Met hatevetei, aban ñai abanarin mañairapanen navapanez pop ev dari arü epesik honeo toutat hez. ²²Met ne Añaraboz Nanep Godiz hahan hez-taput netapan, oñ ni aban tairap ne navapanezarin mañairekez pop zavaruzap ni hañ hori ahov bekë.” ²³Pot pi hahan paru mañairooh-abanari parumam epat nae nap mañah, “Met pim añah-okat darihanañ tairapuhö metapan batah,” pot hah.

Tairap ahop ravat hepan hah

²⁴Met Iesuz mañairooh-abanari paruhanañ tairap garos ravat modariz ahop ravat hepan, pot parumam kez ravat nae nap hahot heh. ²⁵Tahan Iesu parun epat mañah, “Met ham eparah aban korav ahori kez tat modariz korav ravat parun tohopanezat mañamahan tovai samah. Ma korav porihö parum irih hepanezeri parum abatañ bat hel batat, Darim korav okori tinam eñizamah, pot parumaz homehopanez korav porihö zait tat pot tamah, ²⁶oñ ari parum tamah-okat tovai totunei. Met arihanañ tairap ahop ravapanez popuhö modari gog tairao tohopanezaek sat meñizohopan, ma pim abatao bat hor batat modariz asit metohopan. ²⁷Met ari hodad, ham eparahaz aban ahori gipizoz gogot nat, oñ am upai toutat hezan parum irih asit metamaharihö gipiz tezat manamah. Met ne arim ahop pot tamoh bon, oñ ari eñizohomaz asit ev etamoh.

²⁸Met aban modari ne honoñai nañ netovai emoohan ari nevetet soog bon, oñ nenañ honeo emoog. ²⁹Met nem Papap ahop ravat hemaz hahan hezavoz zut ne amun arin ñeti tapuv epat añom, ³⁰Met ne añaraboz ahop ravat hemaz porah ari nenañ honeo het gipiz nohot hepek, ma arim aban ahori tek tinañik toutat hepekepuh dari Israel añaraboz mimihol 12 poriz ro mim petev toguñ 12 ravat hez-pori ñevok bizapanen ari ñetiñ hatevetet an tepek,” pot mañah.

Pita Iesuz bavai mañapanez mañah

Matiu 26:31-35; Mak 14:27-31; Zon 13:36-38

³¹Met Iesu pot parun mañat Saimon Pitan epat mañah, “Saimon ae, ni hatevet, met Seten hori pop ari nimeri nehanañ bareet main ravat

sepekez homet ari moreg etohopanez Godin at mañahan gu hakah, ³² oñ Saimon, God neñizohopanen ni nemaz homeme hez-pov bon natotuz homet piin mañ mañamoh. Tapanen ni kos rez nanekezaekanañ maot nenañ honeo ravekez porah nemaz homet hezari bakez batooken paru amun nemaz tin homehopan.” ³³ Pot mañahan Pita epat hah, “Nem ahop ae, met paru ni navat kakam zeimakeh nemerizapan, povoz ne honeo navat am nemerizapan, ma ni ur noñomapan, povoz ne amun deip honeo ur oñomapan.” ³⁴ Pot hahan Iesu piin epat mañah, “Pita, rotapuum niin epat nañom, Met kutur epatak id hohor bizap ñeo nakam hepanen navokaro nao nemaz niin at nañapanen, ‘Evo, ne pimaz unun,’ pot nemaz bavai mañekë.” Pot Iesu Pitan bar mañah.

Iesu ñetĩ navokaro parun mañah

³⁵ Pot mañat parun epat mañah, “Met batam ne ari emeehon arim monisir nonair naitü oraehan am soogipuh ari naiz tekĩ tat hegi?” Pot at mañahan paru epat hah, “Evo, dei naiz tekĩ nat tinam tovai soog.” ³⁶ Pot hahan pi parun epat mañah, “Kar, batam añoh-okat ari hatoo, oñ petev epat arin añom, Met tokat nem gogov tohopekez porah arim monĩ nas oraepan, povoz pos honeo bat sohopek, ma arim kitü amun honeo bat sohopek, ma honoñai ahov aritĩ ou ravohopan hezavoz homet en kaizañ amun bat sohopek. Met ni nap kaizas bon hekë, povoz nim dim nap modap manat monis bekepuh en kaizas zum tek.” ³⁷ Pot mañat Iesu epat mañah, “Met batam Baiñetinavoz Tepatak nemaz epat menahan hez, Met paru pimaz epat hapan, ‘Met pi aban horip ok.’ Pot hat aban horĩ tohopanezarinañ honeo meñepanen hepanezap ok. Pot menahan hezavor met nemaz mod menahan hezañiz rotapuv petev ou ravapanez ev tah.” ³⁸ Pot hahan paru pim en kaizañiz mañah-povoz kapotaz hodad nat het epat hah, “Deim ahop ae, met en kaiz nasikaro ev dei bat hezag eterë.” Pot hahan pi badede namañ, oñ am epat mañah, “Kar, nen okeg, bat hezei.”

Iesu Godin mañ mañahat ev *Matiu 26:36-46; Mak 14:32-42*

³⁹ Pot mañahapuh berevat pim toohat tat Oliv dañevokaz maot sahan pim mañairooh-abanari pinañ honeo sah. ⁴⁰ Met poek paru sa berevahapuh pi parun epat mañah, “Met Seten moreg etapanen ganõ ñodepek hezavoz God eñizohopanez homet piin mañ mañohozei.” ⁴¹ Pot mañat paru hehan pi hotoh heriam hon ravat rariñ rez bareñat epat mañ mañah, ⁴² “Apai, niuhö rekot nem kakam hatevetemaz toh-epov nehanañ bazei manekez zait toh, met nem zaitivok homemaz pot ne natotü, oñ nim zaitivok hañin hezatam am tom.” [⁴³ Pot mañahan enzol nap abarahanañ pi bakez batapanez erah. ⁴⁴ Met Iesu map honoñai ahov

tat Godin am kezao ahoam mañ mañohot hehan pim midir bavas uvevoz zut berevat hamarrah el ñodah.] ⁴⁵Pot pi tat mañeo hat bon tahapuh bal hat mañairooh-abanarihaz boreurat sahan pimaz homet paru zakep ahov toohaek gom tat au unun orat heh. ⁴⁶Tahan pi honat parun epat mañah, “Ae, tairai z ari au orat hez? Met ganö Seten moreg etapanen ñodepek hezavoz homet bal hat Godin mañ mañohozei,” pot mañah.

Paru emat Iesu bah-ñetiv

Matiu 26:47-56; Mak 14:43-50; Zon 18:2-11

⁴⁷Met Iesu pot mañoochan abanari emahan Iesuz mañairooh-porihanañ nap Zudas popuhö parum garos emat pim nakoe haret batot napanez tovaiaim ⁴⁸Iesu epat mañah, “Zudas, met ne Añaraboz Nanep nemaz kaev ravat hepanezari navapanez hat ni emat ne tot neinekë hat ok teñi?” pot mañah.

⁴⁹Met mañairooh-aban modari rotap paru Iesu bapanez emahan etet hodad tahapuh Iesun epat mañah, “Deim ahop ae, met deim en raveñinañ eperi menaka?” ⁵⁰Pot mañovaiam paruhanañ aban nap pim en raves bat aban anumaihol bareñ elat mañarohariz ahopuz gog aban nap parum totoi hehaek menahan bazei manahan hat kap giñasiti poe men el beteh. ⁵¹Tahan Iesu epat hah, “Erom nen okeg, ni gaa ta.” Pot hat pi aban popuz gagavok hat kapoe hehaek maras bizahan maot tin ravah.

⁵²Tahan paru aban anumaihol bareñ elat mañarohariz ahorir tup ahomakez haitokoroh korav rouvat heharir aban korav ahö modari pi bapanez emah-porin Iesu epat mañah, “Met ne aban ñaip hat ari ñaitunañ ne navepekez hat emegi?” ⁵³Met ne Godiz tup ahomakez temeraz kohat het orah rezah arin ñetiv añoohon ari ne nanav, oñ petev arim tepekezat ev ravahan ari ne navepekez emegiek, Seten kutur ahovonañ hez-popuz kezao ahö ravat hepanezarah ev,” pot mañah.

Pita Iesuz bavai hah-ñetiv

Matiu 26:57-58,69-75; Mak 14:53-54,66-72; Zon 18:12-18,25-27

⁵⁴Met paru Iesu bat marañiz demat aban anumaihol bareñ elat mañarohariz ahopuz zeimakehaz basahan Pita hotoh heriam parum tokat soohan basat lokah. ⁵⁵Tahan Pita amun zei pomakez romevoz kohat sat lokat itiñad mañarahan ñadoohaek añarab toutat heh-porinañ honeo ravat toutat heh. ⁵⁶Met poek toutat hehan itiñad tin rai rai hahan as ñari nap emat piin etet epat hah, “Ae, met aban epop amun pinañ honeo hehap ev.” ⁵⁷Pot hahan Pita epat hah, “Eñarim ae, ne nim hameñ-popuz unun.” ⁵⁸Pot mañat paru am hehan aban nap emat piin etet epat mañah, “Met ni parunañ honeo heñip ev.” Pot hahan Pita epat hah, “Erom, ne nim hameñ-pop bon.” ⁵⁹Pot mañat aviam hevai aban mod nap emat kez ravat epat hah, “Met aban okop ari hamegin pi Galili poriz ñevonañ

hamahan dei hateveteamegiek, peti pi amun akapunañ honeo soohap emat ev hez.” ⁶⁰Pot hahan Pita maot epat hah, “Evo erom, nim hameñ-okovoz ne hodad nat hez.” Met pot mañovaiam id hohor bizap ñeo hahan, ⁶¹met Iesu rouvat hehaekanañ havoe tat Pitan et mereehan Pita pim, “Kutur epatak id hohor bizap ñeo nak hepanen ni nemaz navokaro nao bavai hakë,” pot mañahavoz pi maot homet, ⁶²iñidoh sat zakepiv ahoam tat kezao iñ hahot heh.

Iesun ñebul mañovai uroohat ev

Matiu 26:67-68; Mak 14:53-65; Zon 18:12-14,19-24

⁶³Met aban Iesuz korav heh-pori Iesun ñebul mañovai urooh. ⁶⁴Tat pim etañik givor demahan pi et narë hehan paru urovai epat mañooh, “Met ne aban tairapuhö ni nouramoh-epopuz abatao haz.” ⁶⁵Pot honep honep paru piin mañat met pi bahori batat ñeti hori nañir nañ amun piin mañooh.

Iesu ñevok bizah-ñetiv

⁶⁶Met zeit al teehan paru Zudaholoz koravorir aban anumaihol bareñ elat mañarohariz ahorir aban ñeti kateñiz mañairahol togü manat hehan paru Iesu bat emat meñeh. ⁶⁷Tahan aban ahö porihö epat piin at mañah, “Met ni Kristo God eñizapanez hahan hez-tapupu?” Pot piin at mañahan pi epat hah, “Met arim neen nañeg-okovoz hañiv añoman ari barotap navatotü, ⁶⁸ma ne arin at ñe nao añoman ari hañiv neen nanañotü. ⁶⁹Oñ ne Añaraboz Nanep God map ahopuz mar giñasiz nakoe tek tinatak toutat hem.” ⁷⁰Pot mañahan paru epat hah, “Ae, ni Godiz rop ma patap?” Pot mañahan pi epat hah, “Met rotap arimauhö ok hakameg.” ⁷¹Pot hahan paru nae nap epat mañah, “Met pimauhö okat hakahan dari hat haveteg, povoz aban mod nari ñeti mod nañ hapanez hat dari ev naketü.” Pot paru hah.

Pailat gavman ahopuhaz Iesu basah

Matiu 27:1-2,11-14; Mak 15:1-5; Zon 18:28-40

23 ¹Pot haovai tapuraham bal hat Iesu bat gavman ahop Pailat popuhaz basat ²pi ñevok bizapan hat kapot tat epat mañah, “Met aban epop dei Zuda añaraboz takes moniñ Sisa popuz gavman abanari namanotuz hori pov parun mañoohan dei hateveteogi. Met batam God Kristo eñizapanez au hahan hez-tapup ne ev, ma ne arim ahop, pot pimauz hori pov haohan dei hateveteogi. Met pot parun mañoohaek añaraboz homeo pihö ba in balavi metooh, povoz nihaz ev bat emeg.” ³Pot mañahan pi Iesun epat at mañah, “Met ni rotap Zudaholoz ahopu?” Pot mañahan Iesu hañiv epat mañah, “Ni rotap nemaz ok hameñ.” ⁴Pot mañahan Pailat aban anumaihol bareñ elat mañarohariz ahorir añarab

modarin epat mañah, “Met ne hatevetehon aban epop ur ñomapanez pim hori tah-nao ou narav hez.” ⁵Pot hahan paru kez ravat maot piin epat mañah, “Met pi Galili zeisik kapot tat añarabon mañovai emoohaek ev zei epesikahoe emat taputam mañoohan añarab hatevetet loporizaro hori ravat hezaek gavman abanarinañ nae nap menapanezat ravat hez.” Pot paru Pailatin mañah.

Erod ahö popuhaz pi basah

⁶Tahan Pailat hatevetet epat at mañah, “Met aban epop pi Galili zeisikanañapu?” ⁷Pot at mañahan paru gu hahan pi pot homeh, Met Erod pi Galili zei posiz ahop ok, povoz petev pi ev emat Zerusalem zei epatak hezaek epop meeman pihaz basat pim tahat ñetiv mañapanen hatevetepan. Pot pi homet meehan, ⁸paru Iesu Erodihaz basahan Erod Iesun etet biñ ravat heh. Met pi houloam Iesuz red navor nao tooh-ñetiñ hatevetevai emohot Iesu red nao tapanen pi etepanez homet zait tat heh, povoz pihaz basahan etet biñ ravahapuh, ⁹pi Iesun ahoam at mañoohan Iesu hañiv nak am heh. ¹⁰Tahan aban pi bat sah-pori maot Iesuz homet kez ravat, “Pi hori tovai emooh,” pot moreg poñ Erodin ahoam mañooh. ¹¹Pot mañoohan Erodir ñai aban pim irih heh-pori Iesun ñebul mañovai ñaike hat ñeti horiñ mañooh. Tat paru aban ahopuz meamah-dim tin nap pi memet maot Pailatihaz meehan basah.

¹²Met Pailatir Erod nae nap mogao tat hehaek aliz posik Pailat Iesu pihaz meehan basahavoz Erod biñ ravahapuh parup maot ñod reet heh.

Pailat pi zirah urapanez gu hah

Matiu 27:15-26; Mak 15:6-15; Zon 18:13–19:1-16

¹³Met Iesu maot Pailatihaz meehan poek basat meñehan hehan Pailat aban anumaihol bareñ elat mañaroorhariz ahorir korav modarir añaraboz as hahan paru totoi em topourahan, ¹⁴pi parun epat mañah, “Met ari aban epop nehaz bat emat neen epat nañeg, ‘Met aban epop añarabon mañoohaek parum homeo ba in balavi metooh,’ pot nañeg, oñ ari hatevetet hegin ne piin at mañoohon, ari pimaz hameg-povoz kapotaz rotapuv ou narav. ¹⁵Met Erodihaz meehon basahan pi amun hatevetehan aban epopuz hori nao ou narav tahan maot meehan nehaz ev bat emeg. Povoz aban epop ur ñomapanezavoz hori nao nat, pot arin ok añamoh. ¹⁶Povoz nem ñai abanarin mañoman pi birepenañ urapanen baverevoman sapan.” Pot parun mañah. [¹⁷Met Zudahol parum tohat Pasovaz homet gipiz arö tat nooh-porah orah rezah kakam zeimakeh heh-porihanañ nap añarabohö tairap baverevapanez haoh-pop Pailat hatevetet baverevoohan sooh.]

¹⁸Met Pailat Iesu baverevapanez hahan paru añarab ahovokaro togü manat hehaek ñeo ñarah epat hah, “Evo, aban akap ur ñomap, oñ

Barabas pop baverev meeken sap.”¹⁹ Met Barabas pop pi batam aban hori modarinañ honeo ravat Roma gavmanihol ruapanen sapan hat paru zeĩ ñai metovai pi aban nari men ñomovai toohavoz hat Roma ñai abanari pi kakam zeimakeh memerizahan hehaek baverevapanez Pailatin mañah.²⁰ Met Pailat Iesu baverevapanen tin sapanez zait tah, oñ añarab pi ur ñomapanez hahan Pailat maot baverevapanez añarab porin mañahan paru hatevetet²¹ kaev ravat map ñeo ñarah piin epat mañah, “Pi zirah ur ñomap, zirah ur ñomap.”²² Pot hahan pi maot parun epat mañah, “Met pi hori tairao tahavoz homet ari okat hameg? Met piin at mañohoek ur ñomapanezavoz hori nao bon, pot arin ev añamoh. Povozev nem ñai abanarin mañoman birepenañ pi urapanen baverev meeman sapan.”²³ Pot parun mañah, oñ paru hatevetet map gitait ravat hel hel haovai epat mañah, “Mañeken zirah ur ñomap.” Pot paru ahoam hahot hehapuh Pailat honep, povoz pimar hahan ritou metahaek pi am betezam gu hah.²⁴ Tat epat hah, “Met arim hameg-okatam mañoman ñai abanari pi basat ur ñomapan.”²⁵ Pot pi hahapuh Barabas aban modari men ñomah, ma hori ahö modañ toohan memerizah-pop baverevahan sahan, pi ñai abanarin añaraboz hahat tapanez mañahan paru Iesu bah.

Iesu zirah urah-ñetiv

Matiu 27:32-44; Mak 15:21-32; Zon 19:17-27

²⁶ Tahapuh paru Iesu nonoroh basooan aban nap pim abatao Saimon pop pi Sairini zeisikanañap zeĩ ahö potakaz sapanez hat emoohan nonoroh paru bavizahapuh ñai abanari pi bahapuh Iesuz zir meñelet pim eñatak sohopenez mañahan ñelet tokat sooh.

²⁷ Pot tahan añarab ahovokaro Iesuz zakep tat pim tokat emoohapuh paruhanañ añ nari iñir zakep ahov tovai emooh.²⁸ Tahan Iesu borourat epat parun mañah, “Zerusalem añ eperi, nemaz iñ okov haotunei, oñ arimauz iñ haovai arim ñaroholoz amun homet iñ hahozei.²⁹ Hatevetei, met tokat honoñai nañ ariti ou ravapanez porah añ ñarohol batat hepanez pori parum ñaroholoz iñ hat epat hapan, ‘Met paru añ ñarohol navat het apetei naman hez-pori tin hez.’³⁰ Met pot hapanez porah honoñai nao añaraboti ou ravapanen ñaihet tat etet, ‘Ui, met dañ akañ tolat emat dari ba iz avatapan nak,’ pot hapan.³¹ Met ne ze ñolomedez zut tin hez-epop hori epov netapan, povoz Zerusalem añarab ze lopori hop hop tat hezamedez zut ravat hezari tair metapan? Rotap hori ahoñ metapanen kakamao hatevetepan.” Pot Iesu parun mañat sah.

³² Met paru ñai abanari aban mod hori tooh-nañariv Iesunañ honeo ur ñomapanez basah.³³ Met sohot ham naraz abatao Gag Hatai, pot mañooh-poek berevahapuh paru Iesu zirah urat aban hori tooh- nap pim mar giñasik ze porah urat modap pim mar gavenesik ze porah urah. Tat baval hat bareñah.³⁴ Tahan Iesu epat hah, “Apai, parum tamah-epovoz

kapotaz hodad nat het tamah, povoz hañ horiv metotun, oñ bavetet unun manekes ne ev nañamoh,” pot hah. Met ñai abanari pim dim batezah-pori heleñinañ ekerë nao¹ tohot paru tairari modari ritou metah-pori pim dimir giv nap nim main main gamö rezat bah.

³⁵Met añarab etet hehan Zuda aban ahoi Iesun etet kek haovai pimaz ñeti horiv epat hah, “Met pi modari batin batoohap ak, oñ pimauhö pim heris batin navat hez. Met pi Kristo batam God eñizapanez au hahan hez-tapupu? Povoz pimauhö pim heris batin batapanen dari etek.” Pot paru mañah. ³⁶Tahan ñai abanari amun ñebul mañat pim nakoe emat bain iv sepeleo napanez manat ³⁷epat mañah, “Met rotap ni Zudaholoz ahopu? Povoz nimauhö nim heris batin bateken dei etek,” pot hah. ³⁸Met zi nasik epat menah,

ABAN EPOP ZUDAHOLOZ ABAN AHOP EV.

Pot menat pim gagaiz revah teritak urahan heh.

³⁹Met aban hori toohañariv Iesuz nakoe urahan hehaekanañ napuhö Iesun epat ñebul mañah, “Met ni God dei eñizekes au hah-tapup pot haoñip eveg, nimauhö tin ravat er horekepuh deipihoen batin avateken erak.” ⁴⁰Pot mañahan aban hori modapuhö piin ser mañat epat mañah, “Oir erom, okat haotun, met ni God hañ horiv netapanez homet ñaihet nata? Met darip karar ñomak, ⁴¹deipim hori toogivoz hañiv paru tin etahaek bat ñomopainez ev teg, oñ aban deipim ñaravatak hez-epop pi horiv bonop ev.” ⁴²Pot hat aban nen tapupuhoam Iesun epat mañah, “Iesu, ni añaraboz korav ahop ravat hekez porah nemaz unun manotun.” ⁴³Pot mañahan Iesu hañiv epat piin mañah, “Petev ñomopainepuh deip honeo abarah ham tinarah nem Papap hezaek sat hepain,” pot mañah.

Iesu ñomah-ñetiv

Matiu 27:44-56; Mak 15:32-41; Zon 19:28-30

⁴⁴⁻⁴⁵Met gitauputak 12 kirok ravoohan gitap mañat hehaek zeit kutur ravamahavoz zut hamar map rau rau tat hehan sohot hapanezai 3 kirok toohan zeit kutur manat hehaek maot al teet gitap mañah. Tahan Godiz tup ahomakez kohat zei girü goevor ahov bamain batat dim giv ahö tinar badahan hehaek pimauhö dimiez lopotak tok kelat emat ek narav main ek narav main ravah. ⁴⁶Tahan Iesu ñeo revah ñarah epat hah, “Apai, nem pulip navat nemaz tin korav ravekë.” Pot hat pi ñomah.

⁴⁷Met ñai abanariz ahop totoi hehaek pim tat ñomahavon etet Godiz abatao bat hel batat epat hah, “Met rotap pi aban tinap ak ñomah.”

⁴⁸Met añarab metapanezat etepan hat poek sat hehari pim ñomahavon etehapuh borourat parum zeitakaz zakepivonañ parum uloñik urovai sah. ⁴⁹Met paru aban Iesunañ ñod reet heharir añ Galili zeisikanañ Iesunañ honeo emooh-pori hotoh heriam rouvat het etet heh.

¹ 23:34 Pavar 34 -Met kasiv tamegivoz zut heleñinañ ekerë pov tah.

Iesu helevoz kohat bavizah-ñetiv*Matiu 27:57-61; Mak 15:42-47; Zon 19:38-42*

⁵⁰⁻⁵¹Met aban mod nap Zosep pi Arimatia zeitakanañ emat poek heh, met pi aban tinap, ma Godiz masakavoz roketak hekaz pov ou ravapanez zait tat homet hehap. Met pi Zudaholoz kaunsor aban ahop ravat hehaek kaunsor aban ahö modari Iesu ur ñomapanez hahan pi parunañ honeo ravat gu nak. ⁵²Met Zosep pop Pailat ahopuhaz sat Iesuz heris bapanez at mañah. ⁵³Tahan pi gu hahan Zosep giv nar bat Iesuz heris zirah urahan hehaek bañizat bahapuh giv porah el hatat basat hel puorö mamog paru hel ahovok menahan hehaek bizahan oraeh. Met hel pui poroh paru garos ñomah-mod nap poek basat naviz. ⁵⁴Met basat bizah-aliz pos Praide, paru zeirevai gogot natotuz alizasiz homet añahol gipiz nohopanezatü bareñat bizahan oraehas ok, met hapanezai ararao ravoohan parum gogot natotuz pos totoi ravahan Zosep pot tah.

⁵⁵Met Zosep pot tah-porah añ Galili zeisikanañ Iesunañ honeo emah-pori honeo sat hel puoroh heris bizahaekan eteh. ⁵⁶Tat paru boreurat zeitak sat pim herisik ur memelapanez botevor uer ulagí tinavonañao bat bizahan oraeh. Tahan met parum gogot nat hepanez pov ravahan Baiñetinavoz Tepatak menahan hezatam tat paru gaa tat am heh.

Iesu maot bal hah*Matiu 28:1-10; Mak 16:1-8; Zon 20:1-10*

24 ¹Met paru gogot nat heh-aliz pos bon tahan Sande aliz pos maok al teevaiam soohan añ Iesuz herisik ulagí tinavonañañ ur memelapanez hah-pori bal hat potü bat pi bizahan oraeh-poekaz sah. ²Tat etehan hel puorö merizahan heh-hel ahö pos napuhö bahavoe tat betehan oraeh. ³Tahan paru hel puoroh kohat lokat etehan darim Amip Iesuz heris bizahan oraehaek bon. ⁴Tahan paru home navor nao homehot hehan, aban nañariv parupim dimir giv map peñ hat livaliv toohañariv parum nakoe ou ravahan, ⁵añ pori ñaihet pimau tahapuh dei dei tat hamaran etet hehan aban poñariv parun epat mañah, “Met ari tairaz ñomamahari bizamahaek aban birirí haravat hezapuz emat mel tameg? ⁶Met pi epekam hez bon, oñ bal hat hasah. Met batam ari pinañ honeo Galili zeisik heg-porah pi arin epat añoohavoz homei, ⁷‘Met ne Añaraboz Nanep navat aban horiri manapanen zirah nourapanen aliz nasikaro bon tapanen zeirevaizasik maot bavirirí navatapanen bal haom.’ Pot arin haañahavoz homet hodad ravei.” Pot aban poñariv parun mañah.

⁸Met pot aban poñariv mañahan añahol Iesuz garos mañahavoz maot homet hodad ravah. ⁹Tat borourat kohat poek hehaekanañ berevat mañairooh-abanari 11, met añarab Iesuz homet heh-modari hehaek, sat abanañariviz mañahan hateveteh-pov parun bar mañah. ¹⁰Met añ

poriz nariz abatañ ev, Maria Magdala zeitakanañap, met Zoana, met Maria modap pi Zemis popuz nonop. Met añ porir añ parunañ honeo sooh-modari aposor abanarin emat mañah. ¹¹Tahan paru hatevetet barotap navat het epat hah, “Met añ eperi ñeti betez tairao ev emat dein añamah batah.” ¹²Pot hat modari am hehan Pita bal hat porü hat sat hel puoroh berevat pi kohat nas, oñ iñidoham het tok rizat etehan Zosepehö dim Iesuz heris el hatat bizahan oraeh-nen por oraehan pi eteh. Tat pi maot borourat home midin tovai, “Tair tah batah?” pot hat pim modari hehaekaz sah.

Aban nañariv soohan Iesu emah

Mak 16:12-13

¹³Met añahol parun pot mañah-aliz nen tapusik aban mañah-porihanañ nañariv Zerusalem zeitakanañ Emeas zei potak sapanez hat nonoroh sooh. Met Emeas zei pot Zerusalem zei potaz hotoh heriam 11 kilomitz zut heh. ¹⁴Met Iesu urahan tah-ñeti pov parup nae nap mañovai soohan, ¹⁵Iesu emat parupinañ honeo soohan, ¹⁶parup piin eteh, oñ Iesu ev, pot hodad nat am soohan ¹⁷Iesu parupin at mañah, “Eroñariv ae, arip ñeti tairao haovai emoogin ne ev emoh?” Met Iesu pot at mañahan ñeti parupim haovai emoh-povoz parup zakep heris ravat gaa tat rouvat heh. ¹⁸Tat aban poñariv napuz abatao Kliopas popuhö Iesun epat mañah, “Met aliz haopat epesikaroh Zerusalem zeitak map hezari poek tah-ñetiv hodad hez, oñ ni nenap hodad nata?” ¹⁹Pot at mañahan Iesuhoe ñeti hañiv parupin epat mañah, “Met paru poek tair tahan haohao arip ok hameg?”

Pot at mañahan aban poñariv Iesu pimaun pim metah-ñetiv epat mañah, “Met Nasaret zeitakanañ aban napuz abatao Iesu pop propet aban God mañoohan hatevetet haoh-nap Godiz taevavok añaraboz ñaravatak sohot kezavonañ red povor kao añairovai baiñeti tinao añovai sooh. ²⁰Tahan aban anumaihol bareñ elat mañaroohariz ahorir aban ahö modarihö aban pop Pailatihaz basahan pi hatevetet gu hahan ñai abanari basat zirah urahan ñomah. ²¹Met dei pimaz pot homeog, Pi Roma ñai abanari ruapanen Israel darim zeis betet sapan. Pot homet heg, oñ pi ur hañomah-ñetiv haovai emoogin ni ok emeñ. Met epovoz amun haovai emoog, Aliz haopat epesikaro bon tahan ²²petev aliz epes al teeaiam deihanañ añ nari Iesu bizahan oraehaek sat etehan, ²³pi bon tahan borourat emat epat dein añah, ‘Dei sat etegin Iesu oraeh-teketak enzoliñariv het epat añah, “Iesu biriri haravah.”’ Pot mañahan añahol emat dein añahavoz dei home midin tat hez. ²⁴Met paru emat dein añahan aban nari sat Iesu bizahan oraeh-poek etehan pi bon tahan maot emat epat hah, ‘Ae, Iesu bizat merizahan hehaek bonon dei etegig, rotap añahol ok añah,’ pot paru dein añah.”

²⁵⁻²⁶Parup pot hahan Iesu hañiv epat mañah, “Arip kut tat ok hameg. Batam God hahan hatevetet haoh-propet abanari pot hahan hez, “Tokat Godihö Kristo eñizapanez au hahan hezap meeapanen erat kakamao hatevetet ñomat maot birirí ravapanepuh bal hat abarah helat Godiz redevor alizavok hepan.’ Batam pot hat menahan hez-pov arip rekö haovai emamegiek barotap navat tegi?” ²⁷Pot at mañat Iesu maot batam aban Moses ma Godiz propet aban modari pimauz ñeti mapoñ menahan hezavoz kapot parup tin hodad tapanez badede mañovai sooh.

²⁸Met pot ahoam mañovai sohot zeí sapanez sooh-potak berevahapuh Iesu am sapanez toohan, ²⁹parup rez kek tat piin epat mañah, “Erom ae, met zeit haravapanez tah, povoz ni emeken deipinañ darip orak.” Pot mañahan Iesu aban poñarivinañ parupim zeimakeh sa lokah. ³⁰Tahapuh parupinañ het gipiz napanez tat paru toutat Iesu beret bat mañeo hat bapezat manah. ³¹Tahan poekahoh parup piin etet pimaz hodad ravovaiam Iesu toutat hehaek bon tah. ³²Tahan parup epat nae nap mañah, “Ae, Iesu deipinañ emat Godiz ñetiv badede añoohan deip zakep horiv tat emoogiek maot lop tinarizaro ravat biñ pimau raveg.”

³³Pot parup nae nap mañovai tapurah bal hat parupim zeit betet Zerusalem zeitakaz maot sah. Met poek sat berevahan Iesuz mañairooh-abanari 11 porir met Iesuz homet heh-modari paruparo karar togü manat hehaek, aban poñariv emah. ³⁴Tahan parupin mod porihö epat mañah, “Met rotap darim Amip maot birirí haravahan Saimon piin et hareh.” ³⁵Pot parupin mañahan parupihoen modarin Iesuz ñetiv haovai soohan Iesu emat parup bavizat sat tah-ñeti pov bar mañat epat mañah, “Met deipinañ gipiz nakaz tat Iesu beret bat bapezat Godin biñ mañat anahan deip poekahoh pimaz hodad raveg.” Pot parun mañah.

Iesu ou ravahan eteh-ñetiv

Matiu 28:16-20; Mak 16:14-18; Zon 20:19-23; Aposor 1:2-8

³⁶Pot paru nae nap mañovaiam zuam Iesu parum ñaravatak ou ravat rouvat hehapuh epat parun mañah, “Ari lop tinarizaronañ hezei.” ³⁷Pot mañahan paru piin etet ñaihet horiv tahapuh dei dei tat, “Ae ui arimau, rizop emah,” pot hah. ³⁸Tahan Iesu parun maot epat mañah, “Evo eñarohol, ari tairaiz neen etet ñaihet tat hez? Ma tairaiz ari lop houlorizaronañ hez? ³⁹Met ari nem eñar marah nourahaekan etei. Tat rotap pi tapup ev, pot hapek. Met epat añom, Rizopuz herisik rekot ari ut urat hatevetepeke? Evo pot bon, oñ ev nem herisik bat hatevetei. Tat rotap pi rizop bon, oñ ‘Tapup ev,’ pot nemaz hapek.” ⁴⁰Pot mañovai pim eñar maran mañairahan paru pim urah-mormor poñin eteh. ⁴¹Tat paru, Au tapup ev, pot homet biñ ravat barotap batapanez zait tah, oñ maot pot homeh, Rotap darim Amip ma patap ev, pot tinam barotap navat het home midin tat homeohan Iesu parun epat mañah, “Met nem gipiz nomaz

natü oraeza?” ⁴²Pot mañahan paru pis arö tat bizahan oraeh-*nap* bat Iesu manahan ⁴³bat nahan paru eteh.

⁴⁴Tahan pi parun epat mañah, “Met batam ne arinañ het epat arin haañoh, ‘Met Mosesir, ma propet abanari, ma Buk Song ñetiñik nemaz menahan hez-poñiz rotapuv totoi ou ravapan.’ Pot arin haañoooh, met petev nemaz menahan hez-poñiz rotapuv ou haravahan ari ok et hareg.” ⁴⁵Pot mañat parun Baiñetinavoz Tepatak pimaz menahan hez-ñeti poñiz parum homeo kut hehaek tin hodad tat barotap batapanez badede mañah. ⁴⁶Tat pi parun epat mañah, “Eñarohol, epat menahan hez, Kristo pop kakam ahov hatevetet ñomapanen aliz nasikaro bon tapanen zeirevaizasik maot bal hapan. ⁴⁷Tapanen pim gog aban nari Zerusalem zeitak kapot tat añarabon pim abatao bar mañat epat mañovai sohopan, ‘Met arim loporizaro boreurepeken God hori tovai emameg-poñ ol betepan.’ Pot mañapanen modari hatevetet paru amun modarin mañovai sohopanen ze i maposikaroh an pap manat sohóp. Pot tep potak nem ñetiv menahan hez. ⁴⁸Met ari ev añamoh-map epeñin et haregiri eveg, modarin mañovai sohopek. ⁴⁹Met garos ari Zerusalem ze i epatak hepeken nem Papap tairap ari anapanez au hahan hez-pop ne abarahanañ meeman arihaz emat arinañ honeo het eñizat bakez avatohopan.” Pot Iesu parun mañah.

Iesu abarah helah

Mak 16:19-20; Aposor 1:9-11

⁵⁰Pot mañahapuh paru honeo ze i pot betet sat Betani zeitak sah. Tat Iesu pim marañ meehapuh God paru meñizat masakao manohopanez mañovai ⁵¹teri taputanañ God pi abarah bat helahan iz ravat sah.

⁵²Tahan paru etet biñ ravat pim abatao bat hel batahapuh Zerusalem zeitak maot boreurat sat heh. ⁵³Tat aliz mapoñik Godiz tup ahomakeh lokat piin biñ mañohot heh.

(Iesuz ñetiv aban Rukaz menahat nen ev.)